

NGANO MAN NGA BATOK AKO SA GIORGANISA NGA RELIHIYON



Salamat kanimo, Igsoong Neville.

Makapanglingkod na. Una, okupado gayud ako karong adlaw hangtud nga wala ko na natagad ang pipila ka atimanon nga mga masakiton. Adunay pipila ka mga tawong nagkinahanglan nga maiampo nga anaa sa pribadong mga problema, nga unta akong pakighinabian. Apan ang pipila karon sa mga...usa sa maong mga grupo, sa pagtoo ko ang giingon ni Billy gikan pa kini sa Canada, sa duha o tulo pa ka mga nagkalainlaing mga lugar, Karon, nagaanhi sila dinhi, kahibalo na mo, ug moistar kanunay sa mga hotel ug mga motel sa tanang higayon. Ug moadto ako sa pagpakigkita kanila, magpakighinabi kanila ug iampo sila nga gikan pa sa tanang dapit sa tibuok kalibutan, ug sa Asia, sa Europa ug tanan nang dapit. Adlaw-adlaw, sa dihang ania kami, mangabot ang mga tawo. Adunay unom ka gatus ang anaa sa listahan, nga nanaghulat alang sa pribadong mga pagpakighinabi, ug busa nga medyo kini malisod. Apan ang mga tawo nga grabe na ang sakit ug ang mga gikinahanglan na dayon nga iampo, aba, gipanguhaan kong magpakighinabi kanila.

² Lamang, bueno, tungod nga atua ako sa sulod uban sa mga trustee board, diha sa usa ka gamay nga paghisgot-hisgot uban sa akong board sa mga trustee dinhi sa iglesia, gikinahanglan namo nga magpulongpulong pipila na ka minuto ang milabay. Ug sulod niadtong higayona nakagahin ako og mga usa ug tunga sa oras, ug aduna niadto og pipila ka mga tawo nga maania unta dinhi niadtong orasa aron nga igaampo. Kung ania man sila dinhi, gusto ko nga magkaaduna og pagpang-ampo alang kanila sa niining orasa. Busa, kung buut nila, ang kadtong mga tawo nga angay unta nga igaampo, bueno, kung makaduol lang sila dinhi karon samtang nga ang piyanista, kung kinsa man kini, moanhi na ug—ug nga ihatag kanato ang naandan na nga tuno sa “The great Physician now is near, the sympathizing Jesus.” Karon ang kadtong mga igaampo, kung buut nila, kung pila man kabuok wala ko kahibalo. Ug kamo ang maong mga kaigsoonan, siguro. Mga Igsoon, nag-antus pud ako og ayo diha sa kaugalingon kong lawas. Dala-dala ni Jesus sa Iyang lawas, ang pag-antus, aron nga mamahimo Siyang takus nga matang nga Tigpataliwala, tungod kay Siya ingon nga Dios nagpakatawo aron nga mahimong moantus Siya. Mahimo Niyang bation ang pagsakit diha sa balatian. Ug mao kana kon ngano nga mianhi Siya aron buhaton ang usa ka panghimayad.

Ug diha niini Niya gisugo ang Iyang Iglesia sa pagpadayon sa Iyang buluhaton.

³ Ug aduna ko'y—aduna ko og hataas nga pagtamud sa propesyong medikal, sa mga pag-opera ug uban pa, nga—nga may mga kaarang nga gikahatag kanila sa Dios aron buhaton ang ingon nianang mga butang sa lawas, sa pag-opera ug pag-ibot sa mga ngipon nga nangadaot na, ug uban pa. Ginahatagan ko kana'g bili. Apan nagaabot ang mga higayon sa diha nga ang mga niini lagpas na sa ilang—ilang kahibalo, sila—dili na sila kahibalo kung unsay ilang buhaton. Kita n'yo? Ug sa hunahuna ko, kung ingon-ana, aduna kita'y usa ka hingpit nga katungod, sama sa buhaton nato diha sa natural, kung mopakunsulta kita sa atong doktor sa pamilya, tingali usa—usa ka doktor didto sa barrio, usa ka maayo og tigulang na nga doktor nga dala-dala ang usa ka parol ug latason ang kaumahan nianang gabhiona, aron pangitaon ka, aron tambalan ka. Ug kung mapakyas siya sa paghibalo, moadto siya sa usa nga medyo mas taas-taas pa kay kaniya og diyutay. Iya kang igapadala ngadto sa usa ka espesyalista. Ug karon kung nga maong espesyalista dili niya makuha, ako—malipayon ako nga aduna kita'y usa pa ka dalangpanan, ang gamhanang Mananambal.

⁴ Ug dili Siya nagakapakyas, dili kining Usa, tungod kay Siya ang maong Magbubuhat Mismo. Ug nagbuhat Siya og usa ka pamaagi alang kanato. Karon, kung aduna ma'y unsa man nga gahum sa pagpang-ayo sulod sa akong kaugalingon aron buhaton kini, ako—moanha ako dinha ug buhaton kini. Ako—malipay gayud ako nga buhaton kini. Apan, kung gahum sa pagpang-ayo, wala ako, walay uban pa nga tawo ang aduna og gahum sa pagpang-ayo. Apan gisugo kita, kita n'yo, gikan kang Cristo, aron mag-ampo alang sa mga masakiton, Kinsa mao ang nagdeposito na sa maong gahum sa pagpang-ayo. Kita n'yo? Ug nagadangop lang kita, sama sa naandan na, aron mosulat og tseke para niana. “Ug bisan unsay inyong pangayoon sa Amahan pinaagi sa Akong Ngalan,” kana'y pirmado na nga blangko nga tseke, “bisan unsa ma'y inyong pangayoon sa Amahan pinaagi sa Akong Ngalan, pagabuhaton Ko kana.” Pagkamaanindot nga saad! Dili gayud mapakyas. Ug natabangan ko na ang akong mga igsoong lalaki ug babaye, sa tibuok kalibutan, sa niining mga deposito . . . o sa pag-widro niining mga papel de bangko diha sa Bangko sa Dios, sa Dugo ni Jesus Cristo. Ug nagmalampuson kini kaayo. Kanunay Niya gayud kining ginabayaran, ug tungod kay atua na daan didto ang deposito, nakita n'yo, “Siya—Siya—Siya gisamaran tungod sa atong mga kalapasan, tungod sa Iyang mga labod kita nangaayo *na*.” Kita n'yo, tapos na kini tanan. Ug malipayon kami karong gabhiona tungod sa inyong pagtoo.

⁵ Nagtoo ko nga si Billy ang nag-ingon kanako nga ang usa ka igsoong lalaki gikan pa sa Canada o kung asa man. Ug husto ba? Ikaw ba ang maong igsoon nga gikan pa sa Canada? Ug—ug taga-

asa man ka, igsoon? [Ang maong igsoon nagaingon, “Amihanan lang sa Fort Wayne, sa Kendallville.”—Ed.] Kendallville, Indiana, gikan sa Fort Wayne. Gikasal ako kaniadto sa Fort Wayne. Mahinumduman ko pa og ayo. Nagkaaduna ako og daghang panagtigum didto sa Redigar Tabernacle. Siguro kahibalo ka na kung asa kana dapit. Ug mahinumduman ko, nga usa pa ka batan-ong lalaki, naglingkod pa ako niadto sa tiilan ni Paul Rader, didto sa Redigar Tabernacle, ingon nga usa pa ka batang-ong ministrong estudyante. Usa siya ka halangdon nga tawo, si Igsoong Paul, ug mao man usab si Igsoong Redigar, mga inilang tawo sa pagtoo. Namahulay na ang ilang kalag karong gabhiona. Ug karon, samtang usa pa niadto ako ka batan-ong lalaki, ginapaninguhaan kong ipadayon kung unsay ilang gibilin, kung unsay gibilin ni Jesus para sa Iyang Iglesia sukad pa kaniadto.

6 Karon, dala ang tanang pagtoo nga aduna ako, nagaduol ako aron igaampo kamo. Ug ako—dili ako nagaduol nga nagapamasin lamang. Dili gayud nato gustong moduol sa ingon nianang paagi. Dili, dili kana husto. Nagaduol kita, nga nagatoo nga maangkon nato kung unsay atong gipangayo, kita n’yo, nasayod nga gisaad na kini sa Dios. Ug nagaduol kita nga may kasiguradohan sa atong kasingkasing nga si Cristo ang maoy nagsaad, ug gipaninguhaan ninyo mga kaigsoonan nga ipahimutang ang inyong pagtoo diha sa altar, gihimo ang tanan nga mahimo ninyo, nagaduol ako aron nga ipahimutang ang akong pagtoo usab uban kaninyo karong gabhiona. Kita n’yo?

7 Ug, karon, aduna kita ug usa ka dakung altar nga nagaabot hangtud sa kalangitan, ug ibabaw nianang altar napahimutang ang atong Halad, ang Anak sa Dios. Kita n’yo? Kini ang maong nagkadugo nga Halad. Dili mahimo nga ang Dios molantaw og lagpas niana nga walay pagtahud Niini, kita n’yo, kay Kana mao ang Iyang Pulong, “Kini mao ang Akong Anak nga pinalangga, patalinghugi ninyo Siya.”

8 Gusto kong hangyoon si Igsoong Neville, ang atong elder, kung makaanhi siya sa atubangan karon kauban ko samtang nagapadayon kita. Gusto ko nga ang tibuok iglesia . . . Unsa kaha kung imo kining igsoong lalaki, imong bana, imong anak nga lalaki, imong amahan? Iyaha kini sa kung kinsa man, timani. Kita, inubanan sa tanang kamatinuuron nga aduna kanato, moduol karon sa Dios alang niining mga kaigsoonan.

Iduko nato ang atong mga ulo.

9 Maluloy-on Langitnong Amahan, among ginadala nganha sa Imong Presensiya karon, pinaagi sa altar sa grasya, bisan pa man nga nagatindog kami tupad sa usa ka gamay’ng lingkuranan nga kahoy, kung unsa kini kanhi, dinhi sa yuta, apan ang among pagtoo nagasulbong padulong didto sa halangdong altar nga nagadilaab didto, kon diin si Jesus (ang mahumot nga Manluluwas sa atubangan sa Dios, ang maong Halad

nga Dugo gikan sa Kalbaryo) Nga midaug na sa tanan nga sakit, sa tanan nga balatian, kamatayon, impyerno, ug sa lubnganan, ug nabanhaw ug mikayab ngadto sa Langit, aron sa paglingkod sa too sa Iyang Pagka-Halangdon. Ug kami, pinaagi sa pagtoo, nagaduol, nga ginabayaw ang among mga kaugalingon nganha sa grasya sa Dios, sa pag-ingon ibabaw niining altar, ngadto sa gamhanang Magbubuhat sa Langit ug yuta, “Dawata kami, Ginoo, samtang nga nagaduol kami sa Ngalan ni Ginoong Jesus.”

¹⁰ Ania ang among mga kaigsoonan, ug ang usa kanila gikan pa didto sa Fort Wayne, dinhi sa mga estado, ug ang uban gikan pa sa Canada paingon dinhi, nga nanganhi alang sa niining pagka-balaanong takna. Tali kini sa kamatayon ug kinabuhi, Ginoo. Ania’y duha ka lalaki, nga mga batan-on pa, daghan pang mga pagpangalagad ang nahibilin kanila alang Kanimo, Ginoo, duha ka sundalo, mga Cristohanon nga nagatoo Kanimo. Ug nangbangkaw ang kaaway, ug kanang makahihilo nga bangkaw miigo ngadto kon asa man sa ilang lawas, ug nangbalik sila, miatras usá balik ngadto sa ospital sa grasya sa Dios, alang sa pagpasig-uli, alang sa pagka-ayo, aron nga mahimo silang makaduol ngadto sa pinaka-unahan pag-usab, nga nakataas na ang taming, paingon sa pagpakiggubat. Nanganhi sila aron sa pagpakighiusa og puwersa sa pag-ampo uban kanamo, Ginoo. Ug manglakaw kami aron atubangon ang kaaway.

¹¹ Sa Ngalan ni Jesus Cristo, pangbuhii sila. Ginamandoan ka namo sa Ngalan ni Jesus Cristo, pangbuhian mo sila.

¹² Sila’y mga manggugubat sa pagpakig-away. Ug, ingon nga Imong alagad, nagasulong ako karon aron sa pagpamandong sa akong mga kamot diha kanila, nga may pagtoo, nagatoo nga, “Kining mga ilhanan maganunot kanila nga nagatoo,” ang ingon sa atong Ginoo, ang atong halangdong Pangulong Kapitan sa maong pagpakiggubat, “kung pagapandongan nila sa ilang mga kamot ang mga masakiton, mangaayo sila.”

¹³ Ginabuhat ko kini sa Ngalan ni Jesus Cristo. Hinaut nga ang gahum sa balatian nga nagagapus sa lawas niining igsoong lalaki, pagabuhian siya, sa Ngalan ni Jesus Cristo.

Ang gahum sa balatian nga nagagapus sa lawas niining igsoong lalaki, pagabuhian siya. Sa Ngalan ni Jesus Cristo, mohawa na kini.

¹⁴ Dios nga Makagagahum sa Tanan, ang Magbubuhat sa Langit ug yuta, ang Tag-iya sa Kinabuhing dayon, ug ang Maghahatag sa tanang maayong gasa, ihatud ang Imong mga pagpanalangin sa niining among mga gipanalanginan. Ug nahisulat na kini diha sa mga Kasulatan, nga, “Kung magaingon ka niining bukid, ‘Bumalhin ka,’ nga dili magduhaduha diha sa imong kasingkasing, kondili nga toohan ang kung unsa’y imong giingon matuman gayud, maangkon mo kung unsay imong

giingon.” Nagatoo ako nga ang ilang balatian mihawa na sa ilang lawas. Karon nga nahisulti na kini; karon mamatuman na kini. Amen.

¹⁵ Sa Ngalan ni Ginoong Jesus Cristo nagatoo ako nga gawasnon na kamo. Sa Ngalan ni Jesus Cristo nagatoo ako nga nakalingkawas na kamo. Amen.

Nagatoo ba usab ang iglesia? [Nagaingon ang kongregasyon, “Amen.”—Ed.] Kung ingon-ana mamatuman kini.

¹⁶ Karon, aduna pa ba’y uban dinhi nga gusto gayud mahinumduman diha sa pag-ampo, mahimo ba nga ipataas ninyo ang inyong kamot? Sige, duolon nato Siya karon samtang ginapandongan ninyo sa inyong kamot ang usa’g usa dinha, “Kining mga ilhanan maganunot kanila nga nagatoo.”

¹⁷ Labing balaang Dios, tungod sa pagtoo makita namo si Jesus, nagatoo kaming ania Siya karon. Iyang ginabantayan ang Iyang Pulong. Ug nag-ingon Siya, “Kay diin gani ang duha kon sobra pa nga nagkatigum sa Akong Ngalan, anaa Ako sa ilang taliwala.” Karon, Langitnong Amahan, tugoti nga ang gahum sa Dios nga Makagagahum sa tanan mao ang mohikap niining mga tawo, Ginoo, samtang nga nagkinuptanay ang kamot nila sa usa’g usa, ginapandongan ang usa’g usa. Ang ulahing sugo nga Imong gisulti ngadto sa iglesia, “Kining mga ilhanan maganunot kanila nga nagatoo. Kung pagapandongan nila sa ilang mga kamot ang mga masakiton, sila’y...mangaayo sila.” Imong gisaad kini, ug among ginatoohan kini. Busa karon nahimo na kini, ug ginadayeg Ka namo tungod niini, sa Ngalan ni Jesus Cristo. Amen.

¹⁸ Ug sa Ngalan ni Jesus Cristo hinaut nga dihogan sa gahum sa Dios kini nga mga panyo paingon sa mga masakiton ug sa mga nanginahanglan. Ug sa diha nga dalhon na ang mga niini ug ipandong sa mga masakiton, hinaut nga matuman kini nga mangaayo sila. Mabasa namo diha sa Biblia nga sa nanagkuha sila gikan kang San Pablo, og mga panyo, mga tapis; nga nanghawa sa mga tawo ang mahugaw nga mga espiritu, ug nangayo ang mga balatian. Ug, Amahan, nahibalo kami nga dili kami si San Pablo, apan nasayod kami nga Ikaw sa gihapon si Jesus. Ug nagaampo kami nga Imong ipahanugot kini nga mga paghangyo alang sa Imong kahimayaan. Amen.

¹⁹ Wala ko kahibalo kung aduna ba’y...kung nagapadayon na ba ang pag-teyp, o dili pa. Napaandar na ba kini? Kung dili pa, gusto ko nga ipaandar na nila kini niining higayona. Nagtoo ko nga nagaandar na. Karon, nagalaum ako nga dili ko kamo mapakapoy karong gabhiona. Nagasugod ako nga mga tunga sa oras o traynta’y-singko minutos nga mas sayo. Ug karon, usa kini ka pang-Sunday school nga leksyon, ug nahunahunaan ko nga tingali makapaayo kini kung maipa-teyp ko kining anaa sa

akong kasingkasing. Ug papaingon na kita ngadto sa usa—usa ka bag-ong hugna, bag-ong tabernakulo, tanan bag-o.

²⁰ Ug karon gusto kong mobasa sa pipila ka mga Kasulatan. Kung gusto kamong mobasa dungan kanako, gusto kong mobasa gikan sa Nahaunang Samuel, sa ika-8 nga kapitulo, ug gusto natong sugdan sa ika-4 ngadto sa ika-10 nga bersekulo; ug dayon, aron dili magdugay, sa ika-19 na ngadto sa ika-20. Ug aduna ko'y pipila ka mga lista sa mga Kasulatan ug mga basihanan nga nahisulat na dinhi, aron nga kung kamong mga igsoon aduna ma'y ballpen o lapis, o unsa man, papel, nga gusto ninyong basihan ang mga niini o nga matiman-an kini, makuha ninyo ang mga niini, o, si Mr. Maguire magkaaduna og—og—og teyp niini.

²¹ Ug gusto ko nga kining teyp mapahinungod sa mga ministro, sa mga kaigsoonan ko, sa mga ministro nga nasayup pagsabot kanako, ilabina na sa mga kaigsoonan sa mga pangdenominasyon nga kasimbahanan. Ug nga halos tanan mga denominasyon.

²² Ug ang akong hilisgutan karong gabhiona maoy; *Ngano Man Nga Batok Ako Sa Giorganisa Nga Relihiyon*. Ug gusto kong mobasa karon alang sa usa ka pagpasiuna, o usa ka pagbasa sa Kasulatan, aron nga siguradohon kining basi gayud sa Kasulatan, gusto kong mobasa gikan sa Nahaunang Samuel 8:4-10, dayon sa 19-20. Para sa akong mga makita nga mga tigpaminaw, nagasalig ako sa pagpauli ninyo nga inyong isulat kini nga mga Kasulatan ug nga basahon kini og maayo. Ug ngadto sa mga kaigsoonan nga magapaminaw niini nga teyp, nagasalig ako nga dili lang usab ninyo nga palungon ang maong teyp sa dihang may nasulting butang nga dili tingali kamo miuyon, kondili nga pangitaon usab ninyo ang Dios diha niini, tan-awon kung kini ba sumala sa Kasulatan. Nagtoo ko nga katungdanan nato kini sa atong kaugalingon ug ngadto sa Mensahe alang niining panahon.

²³ Nagatoo ako nga ang tanang mga kasimbahanan adunay mga Cristohanon sulod niini, ug piho nga dili gayud ako nagasulti batok sa mga Cristohanon. Apan ang hinungdan nga nabuhat ko kung unsa ang nabuhat ko na, ug nasulti kung unsa ang nasulti ko na, maoy tungod sa pagdihog sa Balaang Espiritu sa Pulong.

²⁴ Karon atong basahon diha sa Nahaunang Samuel, sa ika-8 nga kapitulo, sugod sa ika-4 nga bersekulo, ug basahon ang ika-10, nga magka-lakip, usá.

Unya ang tanang mga anciano sa Israel nanagtigum sa ilang kaugalingon, ug ming-adto kang Samuel sa Rama,

Ug sila ming-ingon kaniya, Ania karon, ikaw tigulang na, ug ang imong mga anak nga lalaki wala managlakaw . . . wala managlakaw sa imong mga dalan:

karon himoi kami og usa ka hari aron mamaghuhukom kanamo sama sa tanang mga nasud.

Apan ang butang wala makapahimuot kang Samuel, sa diha nga sila nanag-ingon, Hatagi kami og usa ka hari aron mamaghuhukom kanamo. Ug si Samuel nag-ampo sa GINOO.

Ug ang GINOO miingon kang Samuel, Pamatia ang tingog sa katawhan sa tanan nga ilang giingon kanimo: kay sila wala magsalikway kanimo, apan nagsalikway kanako, aron ako dili mahimong hari sa ibabaw nila.

Sumala sa tanang mga buhat nga ilang gihimo sukad sa adlaw nga ako nagdala kanila gikan sa Egipto hangtud niining adlaw, nga sila mingbiya kanako, ug nanag-alagad sa laing mga dios, mao usab ang ilang gibuhat kanimo.

Busa karon pamatia ang ilang tingog: apan ikaw magatultol kanila, ug magasaysay kanila sa kinaiya sa hari nga maga-hari sa ibabaw nila.

Ug si Samuel nagsugilon sa tanan niining mga pulong sa GINOO ngadto sa katawhan nga nagapangayo kaniya og usa ka hari.

²⁵ Karon sa ika-19 nga bersekulo ug sa ika-20 para sa konklusyon.

Apan ang katawhan nagdumili sa pagpamati sa tingog ni Samuel; ug sila ming-ingon, Dili; apan magabaton kami og usa ka hari sa ibabaw namo.

Aron kami usab mahisama sa tanang nasud; ug nga ang among hari magamaghuhukom kanamo, ug magauna...magauna kanamo, ug moaway sa among mga gubat.

²⁶ Ang Ginoo magdugang sa Iyang panalangin ngadto sa pagbasa sa Iyang mga Pulong. Karon, ingon nga usa ka pang-Sunday school nga klase, buut kong ingnon nga gusto natong paninguhaon nga mamahimong ingon ka—ingon ka mapaminawon kutob sa mahimo nato ngadto sa Pulong.

²⁷ Ug nasayod kita nga—nga usahay adunay mga butang nga masulti, (ug pipila ka mga kasimbahanan), nga nakapandol sa tawong natudloan nga supak sa kung unsa ang ilang... nagakadunggan. Pananglitan, adunay usa ka lalaki nga gisultihan ako sa miaging adlaw, nga usa ko ka higala nga ania naglingkod karon, ingon niya, “Sa dihang pagsulti mo, Igsoong Branham, sa ingon ka daku nga pagtoo nga aduna ako kanimo, ug nga ginatoohan, sa diha nga gisulti mo nga ‘wala’y impyerno nga Walay-Katapusan.’” miingon, “Mora’g gusto ko niadtong maluros sa akong lingkuranan. Ug ingon ko nga, ‘Siguradong nasayup gayud kining tawhana.’” Ug dayon

miingon pa, “Ug gipadugay-dugay mo pa kami. Ug miingon ka dayon, ‘Adunay usa lang ka porma sa Kinabuhing Walay-Katapusan, ug nagagikan kana sa Dios.’” Ug mao kana’y atong ginapangita, kita n’yo.

²⁸ Ug wala’y Kasulatan nga nagaingon nga adunay Impyernong Walay-Katapusan. Tungod kay, ang pagka-Walay Katapusan wala gayu’y sinugdanan, ni may pagkatapos man. Busa nag-ingon ang Biblia “gibuhat ang impyerno para sa Yawa ug sa iyahang mga anghel,” mao nga dili kini nga Walay-Katapusan. Adunay panahon niadto nga kini wala pa, ug moabot ang panahon nga kini mawala, pag-usab. Apan mahimo nga pangsilotan sila didto, pinaagi sa kalayo ug azufre, ug sa mga bung-aw sa kalayo, sulod sa pagkataas kaayo nga panahon, apan matapos kini sa kaulahian tungod kay ang impyerno dili nga Walay-Katapusan. Ug kung aduna pa’y impyernong Walay-Katapusan, gikinahanglan nga magkaaduna ka’y Kinabuhi nga Walay-Katapusan aron makapuyo ka sa usa ka impyerno nga Walay-Katapusan. Ug kung Walay-Katapusan pa kini, ingon-ani na unta kini sa una pa, ug kanunay kang sa impyerno na sa una pa ug kanunay kang mapa-impyerno. Kita n’yo, busa walay ingon niana nga butang.

²⁹ Busa, nakita n’yo, ang pagka *Walay-Katapusan* mao ang “wala gayu’y pagkasugod o pagkatapos man.” Ug adunay usa lang ka porma sa Kinabuhi nga Walay-Katapusan, ug kana mao ang sa Dios, nga nagagikan sa Griyegong pinulongan nga *Zoe*, nga nagkahulogan og “Ang Mismong Kinabuhi sa Dios.” Ug sa diha nga gikapanganak kita pag-usab sa Espiritu sa Dios, nahimo kitang Walay Katapusan kauban sa Dios, tungod kay aduna kita’y bahin sa Iyang Kinabuhi, nga nagapahimo kanatong mga anak nga lalaki ug anak nga babaye sa Dios, kung ingon-ana aduna kita’y Kinabuhing Walay-Katapusan. Ug ang Kinabuhi nga ania kanato, pagabanhawon sa Dios ang lawas tungod sa maong Kinabuhi diha sa kaulahiing adlaw, apan ang Espiritu sa Dios nga ania kanato ang maong nagapabanhaw, tungod kay kini mao ang Espiritu ni Cristo nga anaa kang Cristo, ang nagapabahi sa atong mga lawas ug nga nagapabanhaw usab kanato, uban Niya, aron sa paglingkod sa—sa—sa Kahimayaan ug nga maghari uban Kaniya.

³⁰ Karon sa hilisgutan na, karon, daghan na akong mga naagihan sa dugay na niining mga katuigan, ug nagpabilin sa gihapon kini nga tabernakulo. Bisan pa, nga naordenahan ako sa usa ka Missionary Baptist nga simbahan, pinaagi kang Doktor Roy E. Davis, mga trantay-tres na ka tuig ang milabay, dinhi sa Jeffersonville. Karon ako, sukad niadto, atua ko sa maong organisasyon sa hamubong panahon, sa pipila ka bulan, hangtud nga adunay miabot nga butang sa iglesia nga dili subay sa kasulatan, ug gisultihan ko siya nga dili ko mahimong uyonan kadto. Ug busa ako, siyempre, gisugo nga “buhaton gyud kini

kay kon dili,” ug gipili ko ang kay-kon-dili. Busa mao kana ang usa ka butang nga ako gayud ginatoohan, nga kini ang Pulong sa Dios. Ug ang gisulti ko sa maong tawo nga usa—usa ka batid nga magtutudlo, “Kung mapakita mo kana kanako diha sa Pulong sa Dios.”

“Apan mao gyud kana,” ingon niya, “mao kana ang atong ginatudlo.”

Ingon ko, “Apan gusto ko nga gikan kini sa Pulong, kita n’yo, sa Pulong sa Dios!”

³¹ Ug dili tungod nga dili ako nahisakup sa usa ka organisasyon nga nahimo akong batok sa organisasyon, kondili mapasalamaton ako sa akong mga igsoon, nga kanila ako nagapakigsulti karon, nga nagkaaduna ko’y mga pagdapit, nga siguro, halos sa tanang denominasyon, ilabina sa grupo sa mga Full Gospel, ug bisan sa daghan pang uban nga mga kaiglesiahanan. Gihangyo ako nga mouban sa ilang mga pag-fellowship ug nga mopasakup kanila, apan nagpabilin ako nga nagkinaugalingon. Tungod kay, kung unsa man nga impluwensiya nga aduna ako, dili ko gusto nga ipahamtang kini sa usa ka grupo sa mga tawo. Ang gusto kong ipahamtang maoy kung unsa ang gikahatag sa Dios kanako, ang pag-ampo alang sa mga masakiton, nga mabenepisyohan sa tanang mga anak sa Dios sa tanang organisasyon. Wala gayud Siya nagdumili kanako sa pag-ampo, o sa dili pag-ampo alang niining usa tungod kay nahisakup sila sa *Ingon niini-ug-ingon niana*, ang kasingkasing sa tawo ang ginatan-aw sa Dios.

³² Ug karon, sa sugod pa lang, ang hinungdan nga wala ako nagpahisakup kanila ug nga nagsulti pa batok niini, maoy, una, tungod kay wala ako nagatoo nga subay sa Kasulatan ang pag-organisa sa Cristianismo. Nagatoo ako nga wala kini sa Kasulatan. Ug mao kana kung unsa ang akong paninguhaan, karong gabhiona, nga paningkamotan pinaagi sa grasya sa Dios, nga pamatud-an kaninyo nga dili kini uyon sa Kasulatan, walay-pagsubay ang magkaaduna og unsa man nga organisasyon.

³³ Karon, sa una pa lang, ginatawag nato kining “relihiyon,” ang pulong nga *relihiyon* maoy “usa ka pangtabon,” nagkahulogan nga matabonan ang usa ka butang. Karon, si Adan aduna niadto og usa ka relihiyon, apan kaugalingon niya mismo kining gihimo, gikan sa mga dahon sa higuera, ug wala kadto magpulos. Naghimo siya sa kaugalingon niyang teorya ug nagsulay paghimo og usa ka pamaagi nga makahilingkawas, aron makakaplag og kaluwasan sa butang nga iya mismong gibuhay, ug gisalikway kini sa Dios, gikan kang Adan diretso paingon sa kaulahiing organisasyon. Wala gayud sukad, ug sa grasya sa Dios pamatud-an nato kini karon pinaagi sa Biblia. Usa ka pangtabon lang ang relihiyon. Gihimoan ni Adan ang iyang kaugalingon og usa ka pangtabon nga gikan sa mga

dahon sa higuera, gihimo niya kini, mismo, sa pagsulay niya sa pagbuhat og usa ka butang.

³⁴ Apan nanginahanglan ang Dios og kamatayon, usa ka panghimayad. Karon, adunay dakung kalainan tali sa relihiyon ug kaluwasan, kita n'yo, kaluwasan. Usa ka pangtabon ang relihiyon. Kita n'yo? Usa ka Pagpakatawo pag-usab ang Kaluwasan, usa ka gasa nga gikan sa Dios. Usa ka Pagpakatawo pag-usab ang Kaluwasan, usa ka regalo nga gikan sa Dios, ug dili kini mabuhay ni kinsa man nga tawo o unsa man nga grupo sa mga tawo. Usa ka indibidwal kini nga gikahatagan sa Dios niining regalo. Ug kini nga mga regalo sa Kinabuhi nga Walay-Katapusan gikatagana nang daan sa Dios ngadto sa tagsatagsa sa wala pa gani kita nagkaaduna og kalibutan, sumala sa Kasulatan. Nag-ingon ang Biblia, diha sa Pinadayag, nga ang moabotay nga anticristo sa kalibutan, pagalimbongan ang tanan nga nagpuyo ibabaw sa yuta, kinsang mga ngalan wala mahisulat sa Basahon sa Kinabuhi nga iya sa Cordero sa wala pa ang pagkatukod sa kalibutan. Kita n'yo? Ang Dios, pinaagi sa Iyang daang-pagkahibalo, nakita na kung kinsa ang mangduol ug kung kinsa ang dili mangduol, mikanaug si Cristo sa paghatag og pamaagi sa kadtong mga mangduol. Kita n'yo, nahibalo sa uban pa.

³⁵ Kung Siya'y Dios, gayud, kinahanglan nga wala Siya'y kinutuban. Ug kung Siya wala'y-kinutuban, dili Siya mahimo nga wala'y-kinutuban nga dili makagagahum-sa-tanan. Dili Siya mahimo nga makagagahum sa tanan nga dili anaa-sa-tanang-dapit. Dili Siya mahimo nga anaa-sa-tanang-dapit nga dili nahibalo-sa-tanan. Mao nga, nakita n'yo, ang tanan niana mao ang nagapahimo Kaniya nga Dios.

³⁶ Busa, nahibalo na Siya sa katapusan sa kinasugdanan pa lang. Nahibalo Siya kung kinsa ang moduol ug kung kinsa ang dili, ug nahibalo Siya nga adunay ingon ka daghan ang moduol, busa gipadala Niya si Cristo alang sa pagpanghimayad sa kadtong mga moduol. Karon, walay bisan unsa man nga ginabuhay nato nga aduna ma'y kahilambigitan niini. Nag-ingon si Jesus, "Ang tanan nga gihatag na Kanako sa Amahan," gihatag na, tapos na, "magaari Kanako. Ug walay makahimo sa pag-ari gawas lamang nga pagadanihon siya sa Akong Amahan." Kita n'yo? Karon, kita n'yo, anaa na kini tanan sa kahibalo sa Dios.

³⁷ Moingon ka, "Igsoong Branham, nakasulod na ba ako?" Wala ko kahibalo. Nagalaum ako nga ako nakasulod na. Panlimbasugan nato ang atong kaugalingong kaluwasan uban ang kahadlok ug pagkurog. Karon, gikatakda nang daan ang Iglesia sa pagtagbo sa Dios nga walay buling o kunot. Karon, kung kita ang niana nga Iglesia, gikatakda na kitang daan uban niana nga Iglesia. Karon susiha ang inyong kaugalingon pinaagi sa Pulong, dayon masuta ninyo kung unsa na gayud kita ka halayo.

³⁸ Karon, karon, ang Cristianismong pang-organisasyon dili gayud makahatag og ingon niana nga kasiguradohan. Dili. Nanag-ingon ang uban kanila, “Magduol ka ug ipahayag nga si Jesus mao ang Cristo ug magpabautismo sa iglesia.” Ginabuhat pud sa Yawa ang maong butang. Nagatoo siya, mismo, nga si Jesus mao ang Cristo, ug nagapangurog. Kita n’yo, husto kana.

³⁹ Wala gayud nagsugo ang Dios, bisan asa man sa Kasulatan, nga magkaaduna gayud og unsa man nga organisasyon. Walay lugar sa Biblia alang niana. Gisugdan ni Adan ang usa ug napakyas kini.

⁴⁰ Ug dayon gisulayan ni Nimrod ang pagtukod og usa ka organisasyon. Kung usa ikaw ka magsasaysay, ug nahibalo ka sa kasaysayan sa Babilonia, basaha ang iya ni Hislop nga *Ang Duha Ka Babilonia*, makakaplag ka og dakung kahayagan. Nga, si Nimrod, kining tawo sa sala, gipanghiusa ang Babilonia ug ang tanan nga gagmay niining kauban nga iglesia, o ang mga kasikbit sa palibot niini, nga maoy usa ka tipo sa—sa pagtalikod sa Cristianismo sa niining kaulahiing adlaw, ug naghimo og usa ka pagkadakung lugar ug nga ang tanang uban pa kanila nanaghimo’g . . . nagbayad og buhis ngadto niini. Ug didto nagtukod siya og usa ka tore ug gisulayan pag-organisa ang tanan nga mga tawo, apan napakyas kini. Napakyas kini.

⁴¹ Si Korah, diha sa Numeros 16:1, kung gusto n’yong basahon, gisulayan sa gihapon ni Korah ang mao mismong butang. Nahiusa niya ang tanan nga mga Levita, ug nakuha niya ang . . . pila sa mga inilang tawo, mga halangdon nga mga tawo, mga bantugan nga mga tawo, balaan nga mga tawo, ug siya ug si Dathan nagkahiusa ug nanag-ingon, “Dili kini husto, nga ang usa ka tawo magpalabaw-labaw kanatong tanan.” Ug busa magkauban nga gisulayan nila nga masugdan ang usa ka organisasyon, ug mingduol sila sa atubangan ni Moises ug ni Aaron, kinsa gipili sa Dios alang sa maong buluhaton, ug gisultihan ang mga niini nga sobra na kuno ang pagpadaku sa mga kaugalingon niini, nga balaan man kuno ang tibuok kongregasyon, ug nga aduna kuno sila’y katungod sa . . . “Diha sa panon sa mga magtatambag adunay kasigurohan,” siyempre, ang ingon nila. Wala kana nagaaplikar sa Cristianismo. Sa giyera kana. Himatikdi, usa ka daku kaayong pagkalahi.

⁴² Mahimo kang mokuha og usa ka Kasulatan, ug ingnon, “Milakaw si Judas ug gibitay ang iyang kaugalingon” ug “lakaw og buhata ang mao sa gihapon,” kung gusto mo, apan wala kana nagapahusto niini.

⁴³ Gipili sa Dios si Moises ug gipili sa Dios si Aaron, ug mao kadto ang mensahe sa maong panahon. Ug bisan kung unsa pa ka maayong tan-awon ang pikas nga bahin, supak kadto sa panghunahuna sa Dios. Ug kinahanglan nga mamahimong

panghunahuna nato ang panghunahuna sa Dios. “Tugoti nga ang hunahuna nga anaa kang Cristo maanaa kaninyo.” Ug ginapadayag sa niining Biblia ang hunahuna ni Cristo. Ug ang tibuok nga Basahon sa Pinadayag, nga gitawag og Apocalipsis, mao ang kapadayagan ni Jesus Cristo. Ug makita nato kung giunsa Niya pagkondena sa maong butang, kung giunsa nga wala Niya kini ilha, ug pagahisgotan nato kini taudtaod. Sige.

⁴⁴ Si Korah, nagtoo ko nga matinuuron siya niadto sa iyang pagbuhat. Nagtoo ko nga ang maong tawo dili—dili tuyo nga mobuhat og dili maayo. Nagtoo ko nga tungod kadto sa kaburong sa maong tawo nga wala nakita ang pagpanglihok sa kamot sa Dios ug nga mahibaloan ang mga Kasulatan, ug mao kana ang hinungdan nga gidala niya kini ngadto sa mga pagpangatarungan.

⁴⁵ Ug mao gayud kana ang mga nobenta porsiyento sa mga problema karon, nga atong ginapaninguhaan ipasulod ngadto sa programa sa Dios, ang atong mga panghunahuna. Ug nga dili kita unta angay nga magpanaghap, man lang. Siya ang nagadala sa atong panghunahuna. Angay natong isurrender ang atong panghunahuna ngadto sa Iyang kabubut-on. Inyo bang nasabtan karon?

⁴⁶ Si Korah, nga may maayong katuyoan, milibot nga dala ang mini nga doktrina, nga ginasultihan kining mga igsoong lalaki, ug ginapakita kanila pinaagi sa pagpangatarungan, nga dili lamang si Moises ang gipanalanginan sa Dios, ang propeta, ang mensahero, ug nga siya lang ang gipanalanginan, kondili nga, “Ang tibuok kongregasyon balaan man,” miingon siya, “ug karon adunay katungod ang tibuok kongregasyon nga buhaton *kini*, ug adunay katungod ang maong kongregasyon nga buhaton *kana*.” Ug busa nakuha nila ang matarung nga mga lalaki, ang mga Levita. Karon, pinili kana sa Dios, nga mahimong tawgon sa karon, “mga ministro,” Ang Levita mao ang ministro sa templo. Dili ba nga gitawag sila ni Moises alang niini? Ug, ania, siya nga wala gayud hingdoul niini nga wala’y- . . . wala’y pagtahud. Giingnan niya sila nga mokuha og mga incensario, ug nga dagkotan kini og balaan nga kalayo, ug butangan ang ibabaw niini og incienso, ug nga itabyog-tabyog kini nga balaang incienso, nga mao ang sugo sa Dios. Ug nangtigum sila aron organisahan ang usa ka pundok sa mga kalalaken-an nga maoy mokontrola sa iglesia, kon diin usa ka tawo ang gisugo sa Dios nga buhaton ang ingon niana.

⁴⁷ Ug, sa gibuhat nila kadto, ug napayukbo si Moises tungod nga nasayod siya nga gisugo siya sa Dios alang nianang buluhaton. Ug miingon ang Dios, “Ipapadala kanila kadto nga mga incensario sa itaas dinhi atubangan sa tabernakulo.” Ug sa diha nga ginasugdan na nila sa pagtabyog-tabyog ang ilang mga incensario nga puno sa kalayo, ug nga mikuyanap ang incienso, giingnan sa Dios si Moises ug si Aaron, “Pahalayo kamo gikan

kanila! Panggawas kamo gikan kanila!” Kay, wala midugay human niadto Iya silang gitawag nga “mga makasasala, mga dili-magtotoo.”

⁴⁸ Ug ang sala mao ang dili-pagtoo sa Pulong sa Dios. Nagapangawat ka tungod kay wala man ka nagatoo. Nagapamakak ka tungod kay wala man ka nagatoo. Nagapanapaw ka tungod kay wala man ka nagatoo. Kung usa ka pa ka magtotoo, dili mo buhaton ang mga ingon niana. Adunay duha lang ka kupo, kana’y pagtoo ba o ang dili-pagtoo, gikontrola ka ba kaha sa usa o sa laing usa.

⁴⁹ Karon, ang Dios, sa kinasugdanan, mao ang Pulong, ug nahimo Siyang unod ug nagpuyo ipon kanato. Siya kaniadto ang Pulong, Siya karon ang Pulong! Ug sa diha nga nagapuyo ang Dios sulod kanimo, ang Pulong sa Dios kini nga nagapuyo sulod kanimo, kon diin nga mahimo mong puntohan ang tanan nga Iyang ginasulti pinaagi og “Amen.” Mao kana ang Dios nga nagapuyo sulod kanimo.

⁵⁰ Karon kung inyong mahimatikdan, kining inosente nga mga tawo nga dala-dala pa ang incensario sa ilang kamot, balaan nga kalayo nga anaa sa ilang kamot, gipabuka sa Dios ang yuta ug gipanglamoy sila, ug gipahalayo sila gikan kang Moises tungod kay gipahalayo ni Moises ang iyang kaugalingon gikan kanila. Ug gipasidan-an ni Moises ang kongregasyon, “Ayaw gayud pag-uban-uban sa ingon niana nga matang sa grupo. Pahilayo kamo kanila!” Karon, nasayod na mo sa mga Kasulatan, basaha ang ika-16, ika-17, ika-18, bisan pa, ang kapitulo, ug makita ninyo kini. “Ipahilayo ang inyong mga kaugalingon sa niining mga makasasala, makasasala nga dili-motoo. Panggawas kamo gikan kanila, kay nagpadulong sila sa kalaglagaan, ug ang tanan nga aduna kanila.” Ug sa diha nga sila . . . nabugwal ang yuta ug mibuka dala kining mga kalalaken-an nga nagkupot niining balaan nga kalayo. Inosenteng mga kalalaken-an nga nalimbongan sa tawo.

⁵¹ Mao gihapon sa karon! Daghang mga kalalaken-an nga nagakahulog sa lit-ag sa tradisyon, nga dala ang Balaan nga Pulong sa iyang kamot, ug nga gikatoohang mowali gikan Niini. Nakita ko ang usa ka tilimad-on nga miagi sa nawong sa usa ka ministro bag-ohay lang, usa ka ministrong Methodist, usa niadto ka ministrong Methodist hangtud sa miaging Dominggo sa gabii. Ug sa iya akong gitan-aw, nagatoo ko nga makahuloganon kini kaayo kanimo, igsoon, ang makagawas na.

⁵² Karon, kita n’yo, nagakupot og mga incensario, kalayo nga nagapasunog og kahumot sa atubangan sa Dios, ug mga kamot kadto nga nagadala niana, pero nangalaglag sa gihapon dala ang maong incensario sa ilang kamot, tungod kay naningkamot sila sa pagbuhat og usa ka butang nga matinuuron, bisan pa man, nga batok sa Pulong sa Dios, diha sa pagpaninguhang

motukod og usa ka organisasyon. Nanag-ingon pa, “Sobra na ang pagpadaku mo sa imong kaugalingon. Kinsa ba gayud ka nga moingon nga anaa kanimo ang tanang Pulong sa Dios?”

⁵³ Nangapakyas sila nga makita nga si Moises mao ang—ang mensahero niadtong panahona. Kita n’yo, aduna kaniya ang MAO KINI ANG GINAINGON SA GINOO. Wala’y bisan kinsa man kaniadto nga kapareho niya dinhi sa yuta. Aduna kaniya ang Mensahe, ug napakyas ang mga tawo nga makita Kini. Ug si Moises niadto ang eksaktong may MAO KINI ANG GINAINGON SA GINOO. Sigurado. Bueno.

⁵⁴ Karon makita nato ang mao gihapon nga butang sa karon, maayong mga kalalaken-an, halangdong mga kalalaken-an, bililhong mga kalalaken-an nga nagapaningkamot pagwali sa Pulong sa Dios (nga anaa sa ilang kamot) pinaagi sa kung unsang tradisyon nga gihimo sa tawo. Putlon *dinhi*, ug kulangan *dinhi*, ug himoon nga ingon *niini*, ug “Ari ka pagpamiyembro sa iglesia ug pulihi ang imong gipamiyembrohan,” ug nga mamatay na diha sa espirituwal pinaagi niana nga Pulong nga anaa sa ilang kamot! Kita n’yo?

⁵⁵ Dili nila mahimong toohan ang mensahero sa Dios o ang Iyang Mensahe alang sa maong adlaw. Dili nila masabtan kon ngano nga ang usa ka gamhanang Dios dili mamuhat nga uban sa tanang grupo sa mga tawo, ug nga itugyan lang kini diha sa usa ka tawo.

⁵⁶ Unsa na ka daghan kanila ang nahinabi ko karong adlaw, “Unsa may among buhaton, Igsoong Branham? Nahibalo kami nga husto ka, apan unsa may among buhaton? Palagpoton man kami sa among organisasyon, wala na kami uban pa nga maadtoan.” Naluoy ako kanila; apan aduna gyu’y usa ka Dapit. Moingon mo, “Bueno, mamatay kami sa kagutom.”

⁵⁷ Miingon si David, “Bata pa ako kaniadto, ug karon tigulang na, ug wala gayud ako nakakita og matarung nga gibiyahan, ni ang kaliwat niya nga nagpakilimos og tinapay.”

⁵⁸ Eksaktong sa ingon niana gihapon nga hinungdan nga ilang gisalikway si Jesus. Nasabod na gayud sila kaayo sa ilang denominasyon, ug sa balaang mga kaparian ug balaang mga bilding, ug balaang kasimbahanan ug balaang mga templo, napakyas sila nga makita ang Dios sa Iyahang tawhanong templo. “Ikaw, ingon nga tawo lang, nagpaka-Dios sa imong kaugalingon.” Kita n’yo, nasabod na gayud kaayo sila niini! Nasabod na gayud kaayo kini nga mga kalalaken-an nga si Dathan ug sila mao’y mga husto. Nasabod na gayud kaayo si Nimrod nga mahimo niya ang butang nga dili na ang mga tawo mahadlok sa kapungot sa Dios. Sigurado gayud si Adan kaniadto nga kung matabonan niya ang iyang pagkahubo dili na kini makita sa Dios. Dili mo mahimong tabonan kini, Dios ang kinahanglan motabon niini. Kita n’yo? Kita n’yo? Ang programa

sa Dios ang nagatabon niini, dili ang sa imo. Kanunay'ng ingon na niana sa una pa, nagakapakyas sila nga makita si Jesus sa Iyahang templo, ang Dios nga napadayag sa unod.

⁵⁹ Sa karon medyo nagapabati gayud kini og dili maayo kanako sa diha nga ang mga Pulong sa Dios nagkaputol-putol na tungod sa mga tradisyon. Ug may mga tawong matinuuron ang kasingkasing nga nagtindog dinha ug nadungog kana nga Pulong, ug nasayod sila nga Kini ang Kamatuoran, apan dili mangarisgar nga molihok, tungod kay lahi ang gitudlo kanila sa ilang tradisyon. Ang pagpanghugas og mga kalaha ug mga kolon, dayon, mga igsoon, padayon ka na. Apan alang kanato, ug alang kanako ug sa akong panimalay, pilion namo si Cristo, ang Pulong. Kita n'yo?

⁶⁰ Hisgotan lang nato sa kadali ang Juan 3, si Nicodemo, usa ka magtutudlo ug pangulo sa usa ka dakung denominasyon nga gitawag og Sanhedrin. Gihiusa nila ang ilang mga kaugalingon, ug nanaghimo sila og ilang mga tradisyon. Ang—ang usa sa maong Fariseo ug usa sa maong mga Saduceo, ug aduna pud sila og ilang denominasyon kaniadto, ilang panagkalahi, ug busa sila. . . Usa ka magtutudlo kini nga tawo, usa ka pangulo nining bantugan nga Sanhedrin, usa ka makahibulong nga tawo sa pagpanudlo. Nahibalo siya sa mga Kasulatan, sa pagdahum niya. Nahibalo siya niini pinaagi sa ilang tradisyon. Dili ba nga nagaingon man si Jesus, “Nahimo n'yong, pinaagi sa inyong tradisyon, inyong gipakawalay pulos ang mga Kasugoan sa Dios”?

⁶¹ Kita n'yo, tungod sa ilang mga tradisyon! Unsa man kana? Ginapahimutang ang ilang kaugalingong interpretasyon sa Pulong, imbis nga pasagdan lang Kini, kung unsay ginaingon Niini. Moingon sila nga dili ingon niini ang pasabot Niini. Nahimatikdan ba ninyo, nga mao kana sa gihapon nga tingog ang gigamit sa Yawa ngadto kang Eva, aron sugdan ang unang organisasyon, kita n'yo. “Siguradong ingon *niining* paagi gyud kini. Dili kana buhaton sa Dios, kahibalo ka.” Kita n'yo, mao sa gihapon kini. Mao ra sa gihapon kini sa karon.

⁶² Karon mahimatikdan nato nga miduol kini nga pangulo kang Jesus. Ang una nga butang, karon, miduol siya nga nagpangita og Kinabuhi nga Walay Katapusan, miduol siya nga nagpangita og kaluwasan. Bisan pa, nga usa ka lalaki nga anaa sa iyang maong kabutang, usa ka magtutudlo sa Israel, apan usa ka magtutudlo sa Israel nga miduol ngadto sa usa ka Lalaki nga wala gayud kita'y rekord nga nakaeswela man lang. Usa ka edaran nang tawo, tigulang nga sacerdote, manggialamon, ang miduol sa usa ka batan-on pa nga Lalaki. Pinili sila sa katilingban niadto, dato nga tawo nga miduol sa usa ka Timawa nga wala gani og lugar nga ikapatongan sa Iyang ulo, aron ipangutana Kaniya ang dalanon ngadto sa kaluwasan ug Kinabuhi. Una pa lang, sila nga mga taga-Sanhedrin, sa maong

pagpahayag ni Nicodemo, aduna sila'y nakita nga butang kang Jesus nga wala sa uban nga kalalaken-an sa ilang organisasyon. Nakita nila nga adunay butang diha Kaniya, tungod kay ingon niya, "Rabbi, nahibalo kami nga Ikaw." "Kami," oo, dili lang nila mapahayag kini, tungod kay palagpoton gyud sila. Kita n'yo? "Nasayod kami nga Ikaw usa ka Magtutudlo gikan sa Dios, kay wala gayu'y makahimo niini nga mga butang nga Imong ginabuhay gawas lamang kon ang Dios anaa uban kaniya. Nasayod kami niana!" Oh, sus! Organisasyon!

⁶³ Karon, mahimatikdan nato nga si Jesus mao ang kapadayagan sa Dios. Karon, "Wala gayu'y makahimo niini nga mga butang gawas lamang kon ang Dios anaa uban kaniya." Nasayod sila nga aduna gyu'y butang nga lahi nianang Tawhana. Siya mao ang Kahayag sa maong panahon. Siya mao ang Saksi sa Dios.

⁶⁴ Nakita usab ni Korah ang mao gihapon nga butang kang Moises. Wala sila niadtong panahona og usa ka tawo nga sama kang Moises. Siya ang Balaanong saksi sa Dios, niadtong panahona, sa gahum sa Dios. Nakita kini ni Korah ug sa iyang grupo diha kang Moises. Nasabtan nila nga dili mahimo nga si Moises kini; dili mahimo nga ipabuka ni Moises ang Dagat nga Mapula, dili mahimo nga maipadala ni Moises ang mga hampak ibabaw sa yuta. Dios kado nga anaa kang Moises, ug, tungod kay gina-representar sa Dios ang Iyang Kaugalingon diha sa usa ka saksi o sa usa ka kahayag sa maong panahon, napakyas sila nga makita Kini. Gusto ni Korah nga mohimo og usa ka pundok sa mga kalalaken-an, ipasulod ang bisan unsa man.

⁶⁵ Dinha maayo ang organisasyon, ang pagpasulod sa tanan na nga mga basura, ug tawgon kini "Cristianismo." Ipaeskwela ang usa ka batan-ong lalaki ngadto sa usa ka tulonghaan nga walay ihibalo mahitungod sa Dios sama sa usa ka Hottentot nga walay ihibalo mahitungod sa usa ka Egyptian night, ihatud siya didto ug hatagan siya'g edukasyon ug pakat-onon og sikolohiya, ug tunolan siya og pagka Ph.D., ug degree sa pagkadoktor o bachelor of art, o butang o unsa man nga sama niana. Ug ipadala siya aron isangyaw ang Maayong Balita, nga wala pa gayud gani naluwas, nga ipanghimakak pa ang ulay'ng pagkapanganak ug ang pagkabanhaw, ipanghimakak ang Balaanong pagpang-ayo, ipanghimakak ang Gahum sa Dios, ipanghimakak ang mismong mga sukaranan nga hinungdan niini namatay si Jesus, ipanghimakak ingon nga dinihogan ang Marcos 16, ipanghimakak ang "kining mga ilhanan maganunot kanila nga nagatoo" sa dihang giingon Mismo ni Jesus ang maong mga Pulong, ipanghimakak pa gayud ang Mga Buhay 2:38, ipanghimakak nga dinihogan ang tanang uban pa nga mga Kasulatan. Ug pilion ang tradisyon sa tawo nga wala sila'y hibangkaagan, ug sige-sige nga itudlo kini. Ug sa dihang sultihan mo sila sa Kamatuoran ug ipakita kanila

ang Kamatuoran, naulaw sila nga molihok, tungod sa ilang organisasyon.

⁶⁶ Mao gihapon ang gibuhat ni Korah. Nakita niya ang Dios kang Moises. Nakita niya nga mao kadto ang Igpalihok sa Dios nga nagapamuhat pinaagi niini. Ug nakita ni Nicodemo ang Dios diha kang Cristo, “Wala gayu’y tawo nga makahimo niini nga mga butang gawas lamang kon ang Dios anaa uban kaniya.” Atua na si Nicodemo sulod sa mao nga organisasyon, nga nagapaninguhang mogawas. Si Korah usab atua sa gawas, nga nagapaninguhang motukod og usa nga aron niyang sudlan. Magkalahi kana. Naninguha si Nicodemo nga makakaplag og kaluwasan, nga makagawas sa organisasyon; makasulod siya niini sukad nga batan-on pa siya niadto, gilaayan na siya niini. Gusto niyang mamaluwas. Apan naninguha si Korah nga tukoran ang iyang kaugalingon og usa—usa ka dapit kon diin nga mamahimo siyang usa ka bantugan.

⁶⁷ Ingon niana ang mga tawo sa karon. Mao kana ang problema sa Cristianismo, aduna na kita’y daghang mga pagpanundog. Ug ang atong Pentecostal nga mga kaigsoonan, pasayloa n’yo ang maong sinultihan, kasalikwaot niini, karnal nga mga pagpanundog! Pasagding magpatungha ang Dios og usa ka tawo ug hatagan kini og usa ka butang, ug ang tanan na sa nasud maninguhang sundogon kana nga tawo. Wala n’yo ba naamgo nga inyong ginapatay ang kaugalingon n’yong panon? Pagmodula kamo og football... “Ug ang grasya,” sama sa pagkasulti ni Pablo niini, “dalaganon nato kini nga lumba nga malahutayon.” Ang maong tawo nga dala na ang Bola, ayaw pag-ilogang kini sa iyang mga kamot, paninguhang nga maprotektahan n’yo siya. Apan imbis nga ingon niana, tungod kay dili man siya miyembro sa inyong organisasyon, paninguhang n’yo pa nga ilogon Kini gikan kaniya. Usa ka tawo nga pagkabakikaw, dili niya mahimo, mapandol pa gani siya sa mga bulak diha sa sapin sa salog, ug dayon paninguhang pa nga ilogon Kini kanimo. Tinuod gyud kana. Karon, sa espirituhanon kana nga pagkasulti, ang pasabot ko. Pasayloa ko, akong... Bueno, kung mapandol gani siya sa usa ka butang sama sa Mga Buhat 2:38, sigurado siyang madagma. Kung mapandol man siya sa Marcos 16, unsaon pa man niya pagkabuhat niini? Kita n’yo? Ang pinakahinungdanon nga mga pagtulon-an ni Cristo. Ug ang mismong butang nga gikahisgotan niadto sa Konseho sa Nicaea, nagakapandol sila sa gihapon niini human sa tanan na niining mga katugan.

⁶⁸ Naninguha, naninguha si Korah nga makatukod og organisasyon, aron siya makasulod niini. Ug si Nicodemo nga dugay na sa sulod niini, naninguha nga makagawas niini. Gidawat si Nicodemo, ug migawas. Nalaglag si Korah nga anaa sulod niini, sa iyang pagpanglimbasog, nalaglag siya diha sa kaugalingon niyang pagpanglimbasog. Oh, sus!

⁶⁹ Ang organisasyon nga atua si Nicodemo sulod niini, nahibalo nga si Cristo pinadala sa Dios, maoy giingon niini. Si Nicodemo, diha sa ika-3 nga kapitulo dinhi, ang nagpahayag niini, “Rabbi, nasayod kami nga Ikaw usa ka Magtutudlo nga pinadala gikan sa Dios, kay wala gayu’y tawo nga makahimo niini nga mga milagro nga Imong ginabuhat gawas lamang kon ang Dios anaa uban kaniya.” Ug ang mao ra nga grupo, tungod sa ilang organisasyon, gitawag Siyang “Beelzebu,” tungod sa Iyahang gahum sa pagpagula og mga yawa, ug miingon pa, “Iyang ginalimbongan ang atong mga tawo sa Iyahang mga Doktrina.” Mao ra gihapon nga butang kini sa karon. Unsang paglimbong?

⁷⁰ Miingon si Jesus, “Ginabuhat Ko lamang ang kanang makapahimuot sa Amahan, ginatuman Ko lamang ang mga Pulong sa Dios,” tungod kay Siya ang Pulong. Wala Siya’y uban pang buhaton kondili ang Pulong.

⁷¹ Apan, tungod sa ilang organisasyon, tungod sa ilang pamaagi, aduna sila’y mga kalalaken-an nga nangagapus. Nasayod sila niini sulod sa ilang mga kasingkasing, apan dili tugotan sa ilang organisasyon nga tumanon kini. Kung ingon niana, aron nga mapahilayo, aron mapugngan ang mga tawo sa pagbiya sa organisasyon (“ang tanan nga tawo nagasunod-sunod na Kaniya”), aron nga mapugngan ang mga tawo sa pagbiya sa organisasyon ug sa pagsunod sa Kamatuoran sa Dios (nga Siya mao ang Kamatuoran “Ako mao ang Kamatuoran, ang Kahayag”), aron nga mapugngan sila sa pagsunod Niana, ming-ingon sila nga Iyang ginalimbongan ang mga tawo. Hunahuna kini! Usa ka Tawo, nga nasayran niya diha sa iyang kasingkasing nga kadto Mao ang Dios, nga anaa ang Dios Kaniya (“wala gayu’y makasulti niining mga butanga, o makabuhat niining mga butanga, gawas lamang kon ang Dios anaa uban kaniya”), nasayod niana ug ginasulti kana ug nga ginapahayag kana, ug dayon talikuran ug tawgon Siyang “Beelzebu, ug usa ka maglilimbong sa mga tawo,” sa ilang mga tawo, “tungod sa Iyahang Doktrina.” Oh, sus!

⁷² Nasayod niadto si Nicodemo nga usa kadto Siya ka Propeta. Karon, usa kadto sa mga anaa sa sulod sa organisasyon nga igong nahigugma sa Dios ug igong nahadlok sa Dios, ug naila pinaagi diha sa Daang Tugon nga aduna sa niini nga Tawo ang maong mga kinaiyahan ug nga napamatud-an ug napanghimatud-an, nga usa ka Propeta nga pinadala gikan sa Dios. Ang maong tawo, pagapasidunggan ko siya bisan man kon mianha siya sa kagabhion, nakaabot gayud siya didto. Labi pa siyang maayo kay sa daghan sa atong mga magtutudlo sa karon, dili man sila mangduol. Sa kaulahian miabot gyud si Nicodemo. Busa, ayaw siya kondenaha, kung wala pa gihapon ka nakaabot. Naila ni Nicodemo nga usa kadto Siya ka Propeta, busa may kahadlok siya sa Dios. Dili niya mapasagdan nga mapahilayo kadto nga Tawo gikan kaniya, ang maong Kahayag niadtong Panahona.

Bisan pa kon unsa Kini ka sukwahi, bisan unsa pa'y igaingon sa iyang organisasyon nga sukwahi Kini, nakita niya ang Dios nga nagapanghimatuod niadto nga Tawo ug naila niya nga usa kadto Siya ka Propeta. Ug kung usa Siya ka Propeta, nagaabot sa propeta ang Pulong sa Ginoo, ug nahibalo Siya sa Iyang ginahisgotan. Kita n'yo? Mao nga miadto siya kang Jesus, gusto niyang masayran kung unsaon pag-angkon sa kaluwasan. Kung kini man nga Tawo usa ka Propeta, anaa Kaniya ang Pulong sa Dios, ug mahibalo Siya sa dalan sa kaluwasan.

⁷³ Apan kung unsa man niadto ang gikinahanglan nga makat-onan ni Nicodemo mao usab ang kadaghanan sa mga tawo karon, sa mga denominasyon niining adlaw, nga kinahanglan makat-onan usab. Kung unsa unta ang angay nasayran niadto ni Nicodemo, mao usab sa karon ang angay unta nasayran sa mga tawo, sa niining mga denominasyon. Siya labaw pa kay sa usa ka Propeta. Miadto siya Kaniya aron hibaloon, hangyoon Siya nga isulti kaniya kung hain man ang dalan sa Kinabuhi, ug si Jesus Mismo mao ang Kinabuhi. Ang nakapanag-iya sa Anak may Kinabuhi. Busa dili siya, kinahanglan moduol aron makakaton og pagtulon-an, kinahanglan moduol siya aron dawaton ang maong Persona. Ingon niana kini karong gabhiona! Ang maong Ulohang-Bato sa Pamag-ang gisalikway na pag-usab. Unsa man ang Ulohang-Bato sa Pamag-ang? Kini ang Pulong, siyempre. Si Cristo, Siya mao ang Pulong.

⁷⁴ Kinahanglan makat-onan niya ang usa ka butang. Sa hunahuna niya, “Bueno, karon, usa ka Propeta kining Tawhana, usa lang Siya ka Propeta.”

⁷⁵ Busa, nahimatikdan ba ninyo, wala gyud gitubag ni Jesus ang iyang pangutana, Iya lang gibadlong siya tungod sa iyang pagkabuta. Labaw pa sa usa ka Propeta, Siya mao ang Pulong ug ang nagasidlak nga Kahayag sa Pulong! Siya ang Dios nga nagasidlak pinaagi sa usa ka igpalihok, nga nagapamatuod nga kini mao ang Dios nga anaa sa Tawo. Siya ang Pulong. Sa Nahaunang Juan, sa unang kapitulo . . . San Juan, sa unang kapitulo, diay, nga nagaingon, “Sa sinugdan mao na ang Pulong, ug ang Pulong uban sa Dios, ug Dios ang Pulong. Ug ang Pulong nahimong tawo, ug mipuyo ipon kanato.” Ug ania ang Pulong sa Dios nga nagasidlak pinaagi niining gamayon og mahuyang nga porma sa lawas sa usa ka Tawo, ug nakapabuta kini sa organisasyon. Apan mianhi Siya aron manguha og mga indibiduwal. Labaw pa sa usa ka Propeta, Siya mao ang Pulong! Siya ang Kinabuhi. Dili nga . . . Dili na Niya kinahanglan nga tudloan kamo sa kung unsa nga Kinabuhi nga moabot pa, Siya ang kana nga Kinabuhi Mismo! Siya mao ang Kinabuhi. Siya ang Kahayag. Siya ang Kinabuhi. Siya ang Kinabuhing Walay Katapusan, nga maoy anaa Kaniya, ug Siya lang ang maoy Maghahatag sa Kinabuhing Walay Katapusan. “Ang nagpanag-iya sa Anak may Kinabuhi.” Busa kinahanglan kamong . . . dili

lang kinahanglan nga aduna kamo og pagpanudlo sa Pulong bahin Kaniya, kinahanglan nga maangkon ninyo Siya.

⁷⁶ Moingon ka, “Oh, nagalingkod gayud ang mga tawo ug ginatun-an kana nga Biblia ug ang tanan na nga mga Griyegong pinulongan, ug kung unsa ang mga kahulogan niini, ug ang mga panulbok, ug uban pa.” Ug wala ma’y nahibaloan bisan unsa man bahin sa Dios! Kita n’yo? Wala! Ang siya nga aduna—siya nga aduna og—og—og porma lang, siya nga aduna og plano? Siya kining maong nagpanag-iya sa Anak, nga nagpanag-iya Kaniya, sa maong Persona. Siya ang Maong aduna og Kinabuhi.

⁷⁷ Nahibalo si Nicodemo nga Siya ang nasayod bahin sa Kinabuhi, apan wala gayud siya nahibalo nga kadto Siya ang maong Kinabuhi nga Walay Katapusan. Ingon niana kung unsa gayud ang maong Lalaki nga iyang kaestorya niadto, ang Mensahero, ang Kahayag alang sa maong panahon, ang Kahayag alang sa kalibutan. “Ang Kahayag nagadan-ag sa taliwala sa kangitngitan, ug ang kangitngitan wala makabuntog kaniya. Siya gipadala ngadto sa Kaugalingon Niyang mga tawo ug ang Kaugalingon Niyang mga tawo wala modawat Kaniya.” Ngano man? Ngano man? Tungod kay organisado na sila kaayo, nahilig-on na sa mga pagpanghugas og mga kolon ug mga kalaha, ug sa mga tradisyon, nga nangapakyas silang makita ang Pulong nga nahimong tawo.

⁷⁸ Nahitabo kini utro. Nahitabo kini pag-usab. Kanunay nga ginapahitabo pag-usab sa kasaysayan ang kaugalingon niini. Oo, nahibalo siya nga aduna Siya—nga nasayod Siya bahin sa Kinabuhi, apan wala nahibalo si Nicodemo nga Siya mao ang Kinabuhi. Ingon niana kini sa karon. Daghan kaayo ang naninguha paghimo kang Jesus nga, oh, usa ka halangdong Magtutudlo, moingon pa gani sila nga usa Siya ka Propeta. Apan sa diha nga sulayan mong ingnon nga Siya ang Dios, sobra na kana. Kita n’yo? Apan Siya ang Dios kaniadto, ug Siya ang Dios karon, ug kanunay Siyang magpabilin nga Dios. Kana lang. Husto kana.

⁷⁹ Himatikdi, wala gayud Niya gisultihan si Nicodemo, karon, sa diha nga miduol siya ngadto Kaniya, wala gayud Siya nag-ingon, “Karon, Nicodemo, aduna Ko’y dakung pagtahud kanimong, nga ikaw usa—usa—usa ka magtutudlo sa Israel. Sultihan ta ka kung unsa, nagapangita ka og Kinabuhi nga Walay Katapusan, tingali angay mong dugangan pa ang imong kahibalo. Dili mo mapamulong sa husto ang imong pagpanulti.” Binuang. “O, tingali angay mong paninguhaon pa ang mas hataas nga katungdanan sa inyong denominasyon, aron maangkon mo ang Kinabuhing Walay Katapusan.”

⁸⁰ Mao kana kung unsa ang gipankingamotang buhaton sa daghan kaayong mga tawo sa karon, uh-huh, usa ka mas hataas pa nga katungdanan, gusto nilang mamahimo nga gikan sa—

sa pagka-pastor ngadto sa pagka-state presbyter, o—o ngadto sa pagka-obispo o unsa man nga sama niana. Wala kana kahilambigitan sa Dios og bisan unsa man.

⁸¹ Bantayi kung unsa ang Iyang gihimo atubangan sa ingon niana nga tawo. Iya siyang gisaway tungod sa iyang pagkawalay-hibalo bahin sa panahon nga iyang gikapuy-an, “Ang pasabot mo Kanako nga usa ikaw ka magtutudlo sa Israel ug dili makasabot niining mga butanga, sa dihang,” ingon Niya, “nga ang tawo kinahanglan igaanak pag-usab?”

⁸² “Aba,” miingon siya, “ako nga usa na ka tigulang nga tawo, mosulod pa sa tagoangkan sa akong inahan?”

⁸³ Ingon Niya, “Ug usa man ikaw ka obispo, usa ka cardinal, usa ka state presbyter sa iglesiang Pentecostal,” o kung unsa pa man, “usa ka inilang lalaki sa organisasyon, ug wala ka nasayod sa Kasulatan?”

“Oh, aduna man mi og Moises.”

⁸⁴ “Kung nakaila pa kamo kang Moises, nakaila kamo unta Kanako, tungod kay siya kadto ang maong naghigot bahin Kanako.” Kita n’yo? Apan dili sumala sa ilang mga tradisyon, sa ilang—ilang organisasyon, lahi kadto. Apan naghigot gayud si Moises bahin Kaniya, ug Siya kadto ang Maong gihigotan niadto ni Moises, ug sa gihapon wala nila naila kini. Ngano man? Nahigapos na gayud nila ang ilang mga kaugalingon sa mga tradisyon, nga wala na nila naila kini.

⁸⁵ Ug ang kaisogon ko nga nagabasa, nga nagapaminaw niini nga teyp, ayaw palunga kini karon. Sa makadiyut lang, inatbangay nga tan-awon nato kini nga butang. Gihigugma ko kamo, mga magbalantay man kamo. Ug wala ko ginasulayan nga mamahimong nahibalo-gayud-sa-tanan. Kung ingon niana nga pagpaila ang ginapakita ko kaninyo, kung ingon-ana palunga ninyo ang teyp ug iampo ninyo ako. Ginapaninguhaan ko lang nga ihatud kaninyo ang usa ka butang nga Matuod. Ayaw kini ipalagpas kaninyo.

⁸⁶ Karon, ginatahud ko ang kahan-ayan sa tawo, ug uban pa, apan sa diha nga manggitukod na kamo niining mga organisasyon... Tan-awa ninyo ang mga Fariseo, dili makighilambigit sa mga Saduceo, tungod kay ang mga Saduceo wala nagatoo sa—ni sa manolunda o—o sa espiritu man, o sa pagkabanhaw, o unsa man, ug ang mga niana aduna ang mga Fariseo, ug magkaaway sila sa usa’g usa. Karon ang oneness nagatoo sa usa ka butang, ug lahi usab ang ginatoohan sa trinity, ug lahi usab ang sa Methodist, ug lahi usab ang sa Presbyterian, ug nagabutang mo og ginagmay’ng mga koral. Ug unsay inyong nakuha? Panagkabulag sa pagkamanagsoon. Labot pa, makita nato kana sa Biblia taudtaod, kung unsa kini, ug kung unsa ang ginasulti sa Dios niini.

⁸⁷ Karon, wala, wala gyud siya gisultihan sa Dios nga magpakahanas pa. Iya lang siya gibadlong tungod sa pagkawalay-hibalo sa maong butang. “Ikaw nga usa ka magtutudlo sa Israel, ug wala nasayod niining mga butanga? Kung gisuginlan ko man ikaw og yutan-ong mga butang, ug dili mo kini masabtan. . .” Hunahunaa! “Usa ka magtutudlo, usa ka hataas nga katungdanan sulod sa usa ka iglesiang orthodox, obispo, cardinal, ug dili mo man lang masabtan ang pang-masuso nga porma sa mga natural nga butang nga akong ginasulti kanimo, unsaon man nimo pagpakasabot sa espirituhanong mga butang nga gikan sa Langit?”

⁸⁸ Apan ang usa ka walay-nakat-onan nga dugay nang mangingisda nga dili gani makahimo pagsulat sa kaugalingon niya nga ngalan, nasabtan Kini, kita n’yo, ug nga nahimong pangulo sa iglesia sa Jerusalem, si Pedro. Kita n’yo? Oh, “Ang tanan nga gihatag Kanako sa Amahan, magaduol siya.” Kita n’yo? Makita nila Kini. Ginatooan nila Kini. Manglihok sila tungod Niini, sa pagkasayod nga walay bisan unsa man ang makapugong kanila.

⁸⁹ Sama lang sa mag-uuma. Dili maayo ang magpatawa, apan aron lang sa pagpahulagway. Nag-estorya sila nga may usa ka mag-uuma nga nagpalumlum og usa ka himongaan, ug wala sila niadto og igong kadaghanon nga mga itlog, nagbutang siya ilalum niini og usa ka itlog sa pato. Sa pagkapusâ na sa itlog sa maong gamay nga pato, siya ang pinakakataw-anan tan-awon nga binuhat nga nakita sukad-sukad sa niining mga manok. Aduna siya’y taas og kataw-anan nga nawong, ug mouban-uban siya nga mokwak-kwak imbis nga mo-klak-klak, ug—ug mokaon ang tanan nga mga manok ug mo-klak-klak didto sa nataran. Ug dili kadto ang iyang pagkaon, gayud. Busa usa niana ka adlaw ang tigulang nga himongaan gigiyahan siya didto sa luyo sa balay, aron manakup og pipila ka mga dulon, ug sa pikas didto sa bungtod adunay usa—usa ka lanaw. Ug nahitabo nga mihuyop ang hangin nga gikan sa maong lanaw, ug nakasimhot siya og tubig. Ingon niini gayud ang iyang kinaiya. Ang tigulang nga himongaan miingon, “Klak, klak, klak, klak, balik na!”

⁹⁰ Miingon kini, “Kwak, kwak, kwak,” dire-diretso na paingon sa tubig. Ngano man? Usa kini ka pato, sa sugod pa lang. Bisan giunsa pa pagklak-klak sa himongaan, pato kini sa gihapon.

⁹¹ Ug ingon niana usab kini sa usa ka tawong gikatakda nang daan ngadto sa Kinabuhing Walay Katapusan. Pagkakita niya sa Kahayag sa Dios, walay igong mga organisasyon sa kalibutan ang makaklak-klak kaniya aron mobalik pa ngadto niini. Wala na. Ngano man? Iya kining kinaiya. Mahimong mikaon siya uban kanila sa dugay nang panahon, ug mikaon sa ilang mga basura ug mga pang-sosyalan, apan miabot siya sa usa ka dapit kon diin nakakaplag siya og usa ka butang nga lahi, busa kahibalo siya niini. “Ang Akong carnero nakaila sa Akong Tingog,” ang ingon

ni Jesus, “sa laing magbalantay dili sila mosunod.” Mahimo nga nagasunod sila sa usa ka butang nga langyaw, apan sa kinasuloran nila aduna sa kung unsa nga lahi. Pasagdi nga madungog nila ang Kamatuoran sa makausa, ug bantayi sila. “Ang tanan nga gihatag Kanako sa Amahan magaduol gayud.”

⁹² Oo, Iya siyang gibadlong tungod sa walay pagkahibalo. “Usa ikaw ka magtutudlo sa Israel, ug wala nasayod niining mga butanga? Kinahanglan nga igaanak ka pag-usab!” Karon, ang natural nga tawo, gusto ko nga . . . himatikdan ninyo ang usa ka butang dinhi, “Kinahanglan nga igaanak ka pag-usab.”

⁹³ Karon, sa natural nga kinabuhi, kung aduna kita’y kinabuhing natural, aron nga mamahimo kitang buhi niining natural nga kinabuhi, diha sa natural nga mga butang, kinahanglan natural kitang gikahimugso. Dili nga gipatungaha ka lang gikan sa usa ka kahoy sa kung asa man, kita n’yo, nga gibira ka lang pagawas sa kung unsang paagi. Gisulayan nila kini, apan wala kini magpulos. Kinahanglan nga kini tinuod gayud nga pagkahimugso, natural nga pagkahimugso, aron nga mabuhi ka nga magkaaduna ka og lima ka sensya, makalakaw, makasulti, makakita, makapanilaw, makabati, makasimhot, makadungog, makalihok-lihok, uban pa, tungod nga usa ikaw ka tawo na, ug ikaw—napailalum ka sa tanan niini nga mga butang tungod kay kabahin ang mga niini sa natural nga kinabuhi.

⁹⁴ Ug, sa ingon niana nga pagkahimugso, usahay nagka-maalamon na kita sa kalibutanong mga kaalam o sa mga butang sa kalibutan, nahimong mga Presidente ug—ug hanas nga iskolar, ug batid nga mga mekaniko ug siyentipiko, ug uban pa. Ug nahibalo na mo sa una pa, nga sa kinasugdanan, ang mga anak niadto ni Cain ang aduna niana nga matang sa kaalam; dili ang mga iyaha ni Seth, mga kabus lang sila nga mga magbalantay sa carnero. Apan diosnon nga mga tawo ang mga anak ni Seth. Apan ang mga anak ni Cain sa una pa’y mga maalam na, mga hataas, sa siyensiya, mga doktor ug bantugan nga mga tawo. Husto kana. Maoy giingon sa Biblia, kahibalo na mo, kana ang gitudlo Niana. Ug pagka-relihiyoso, pero nangalaglag sa kaulahian. Nahimo kitang maalamon tungod sa atong pag-eskwela, pagpadaghan og kahibalo, ug uban pa, nahimo na kitang maalamon kaayo, mga maantigo na, ug mahimo nang buhaton ang mga butang ug makasulti na og mga butang, ug usahay labwan pa sa pagpanulti ang usa ka tawo nga puno sa Espiritu. Dili ba nag-ingon si Jesus, “Ang mga anak niining kalibutana labi pang maigmat kay sa mga anak sa Ginghamarian”? Sigurado, kay sila, pinaagi sa ilang mga salabutan nga makahimo silang—makapanulti sila ug manglabaw pa sa pagpanulti, ug gamiton ang mga Kasulatan ug tuison Kini aron ipasulti Kini sa mga butang nga dili man ginasulti Niini.

⁹⁵ “Oh, dili man eksaktong ingon niana gayud ang pasabot Niini.” Sa diha nga ang usa ka tawo mosulti og ingon niana,

pagpahilayo kaniya. Ginabantayan sa Dios ang Iyang Pulong, kahibalo na mo, ang ingon sa Biblia. Nahisulat Kini sa paagi nga kinahanglan mamaingon niini gayud Kini. Kita n'yo? Karon, gisulat Kini sa ingon nga pagkasulat aron sa pagpahisalaag, o aron himoon nga ang mga maalam mapandol Niini. Pagkayano Niini, nga mao kana ang hinungdan nga nagakapandol sila Niini. Kita n'yo? Bueno.

⁹⁶ Ang tanan niini nga mga kaalam ug ingon niana nga mga butang nga mahitigum nila, bisan pa man, apan gikan kini sa . . . nagagikan kana nga pagkahimugso sa ubus, sa niining yuta. Gikan kini sa yuta, ug batok kini sa Espiritu sa Dios. Ang unang pagkahimugso, sa pagbuhi kanato dinhi, gihimo kitang mga tawong may-kamatayon, tungod sa kasal-anan nga buhat didto sa tanaman, gihimo nga ang tawo maipanganak sa kalibutan pinaagi sa babaye. Ug ang tawo nga natawo sa usa ka babaye hamubo ra sa panuigon, apan ang tawo nga natawo diha kang Cristo Walay Katapusan. Miingon si Job, “Ang tawo nga natawo sa usa ka babaye hamubo ra sa panuigon ug tugob sa kasamok.” Himatikdi, apan ang tawo nga natawo kang Cristo, natawo gayud gikan sa Itaas. Karon, apan ang tawo nga natawo sa yuta, nagmaalamon na ug halos nga makapanglabaw na.

⁹⁷ Tan-awa kung unsa ka maliputon ang Yawa, iyang nalimbongan ang tanang sacerdote nga miabot sa yuta. Nahimo gayud niya. Nanglimbong siya, iya sa gihapon kini ginabuhat. Oo, sigurado gyud. Maantigo siya, apan naatubang gayud niya ang iyang kaparang, usa niana ka adlaw, Nga maoy nagbuntog kaniya. Ug ang butang lang nga kinahanglan natong buhaton mao ang pagsandig lang diha Kaniya, nabuntog na Niya siya. Kita n'yo?

⁹⁸ Apan gikan kini sa ubus, ug kini, kining kahibalo nga gitipon sa tawo aron nga pamatud-an ug ipakita ang tanan niining mga butanga kon ngano nga kinahanglan sa tawo nga buhaton *kini* ug kinahanglan nga buhaton *kana*, supak og kaaway sa Dios (ang panghunahuna nga alang sa unod). Maoy giingon sa Kasulatan. Husto. Bisan unsa ka pa ka maantigo, mahimo nila nga matuis kini. Gusto ko kang kinsa man nga ipakita kanako kon asa man nga nagkaaduna ang Dios sukad og organisasyon o nagsugo man og usa, gawas sa kung unsa ang Iyang ginakondena dinhi sa Biblia. Bisan unsaon pa nila pagpaninguha nga mamahimong maalamon nga mahimo nila, supak gyud kini! Kung unsa nga makahimong mobarug ang kaalam ug labwan pa kamo sa mga pagpangatarungan, ug mahimong ipabati nga *ingon niana* lang kamo ka gamay diha sa pagsulti kaninyo bahin niini, apan supak sa gihapon kini sa Kasulatan.

⁹⁹ Aduna niadto miingon kanako, “Igsoong Branham, aduna ko’y usa ka butang nga batok kanimo.” Miingon, “Usa ka ka Jesus Only.”

Ingon ko, “Dili ako ingon niana. Dili ako miyembro sa kung unsa man nga organisasyon.”

¹⁰⁰ Usa ka presbyter nga pinadala sa usa ka estado, sa miaging adlaw, ug miingon, “Adunay miingon kanako nga usa ikaw ka Jesus Only, Igsoong Branham.”

Ingon ko, “Sukwahi kana. Sayup kana.”

¹⁰¹ Miingon, “Gisuginlan ko nila nga nagatoo ka kuno sa paghigugma nga wala na’y kasal-kasal, nga kinahanglan biyaan na sa mga kalalaken-an ang ilang mga asawa ug mangita’g. . .” Karon, kita n’yo, nga bakak gayud kana sa Yawa. Nahibalo na kamo niana.

¹⁰² Ingon ko, “Bug-os gayud akong batok sa ingon nianang mga butang nga wala nagasubay sa Kasulatan! Nagatoo ako diha sa pagkabalaan ug sa pagkaputli. Nagatoo ako nga ang lalaki nabugkos na ngadto sa iyang asawa samtang nga nagapabilin sila nga buhi.” Kinahanglan nga dili mo siya pangasaw-on nga wala mo usá iampo.

¹⁰³ Ug ang Jesus Only, ang grupo sa Jesus Only, wala ko’y bisan unsa man nga batok kanila, ingon sila ka maayo sama sa unsa pa man nga grupo, sa ako. Apan nagapangbautismo sila og sayup, nagabautismo sila alang ngadto sa pagbag-o sa kinabuhi. Nagatoo ako nga ginabag-o ang atong kinabuhi pinaagi sa Espiritu Santo, dili pinaagi sa tubig. Ang gigamit ko nga bautismo ang Ngalan ni Jesus Cristo, ug wala na’y uban pa nga Kasulatan diha sa Biblia nga mosuporta’g. . . nga magpakita nga sukwahi kini. Wala’y tawo diha sa Biblia nga nabautismuhan sukad sa ngalan sa “Amahan, Anak, Espiritu Santo.” Gusto kong moanhi ang si kinsa man nga makapakita kanako og usa ka bahin nga ang usa ka tawo gibautismohan nga sama niana. Kung ingon-ana, kung wala kini nagasubay sa Kasulatan, undangi ang pagbuhat niini!

Moingon ka, “Wala ma’y unsa man nga kalainan kini.”

¹⁰⁴ Adunay kalainan kang Pablo. Gisugo niya sila nga mabautismohan pag-usab, sa Ngalan ni Jesus Cristo, ug dayon madawat na ang Espiritu Santo. Ug miingon si Pablo, “Kon may usa man ka manolunda gikan sa Langit,” Mga Taga-Galacia 1:8, “moanhi, motudlo og uban pa nga Maayong Balita,” kay sa iyang gikatudlo na, “ipatanglo siya.”

¹⁰⁵ Kita n’yo, tradisyon kini. Nahinabi ko ang usa ka inila nga tawo dili pa lang dugay. Miingon, “Igsoong Branham, dili ko mahimo. Nahibalo ako nga husto Kana,” miingon siya, “apan unsa ma’y mahimo kong buhaton bahin niini?”

Ingon ko, “Magtuman ka gayud Niini!”

Miingon siya, “Aba, ako—Duna ko’y kadunganan atubangan sa akong mga tawo.”

¹⁰⁶ Ingon ko, “Apan ang gusto ko ang kadungganan atubangan sa Dios, busa tumana ang Iyang Pulong. Kinahanglan kang magpili, alagaron mo ba ang Dios o ang tawo?”

¹⁰⁷ Apan ginapili nila ang ilang organisasyon, nga ginapatuman kanila kini nga mga deklarasyon, sunod-sunod na dayon. Ang unang higayon nga gigamit kini sukad maoy sa iglesiang Romano Katoliko pa. Husto kana. Gusto kong adunay magpakita kanako sa kung unsa nga lahi. Nagbasa ako og kasaysayan, usab, kahibalo na mo. Busa timan-i, usa kana ka bautismo nga iya sa Katoliko, ug ang tanan nga nabautismuhan sa ingon niana nga paagi nabautismuhan ngadto sa panag-usa sa Katoliko. Pamatud-an ko kana sa dili pa mahuman ang gabii, kon itugot sa Ginoo. Husto kana. Mao kana ang hinungdan nga mobalik gyud ka.

¹⁰⁸ Dili ang Jesus Only. Karon, daghan maayong mga tawo diha sa Jesus Only. Daghan maayong mga tawo diha sa Assemblies of God, sa Church of God, sa Methodist, sa Baptist, sa Presbyterian, ug sa Katoliko. Apan sa mga niini wala ang Iglesia, ni usa kanila. Adunay indibiduwal sa sulod dinha nga nahisakup sa Iglesia. Apan dili kana nga denominasyon nga aduna sila nga nagapahimo kanila nga Iglesia, sama sa ginapaningkamotan sa mga tawo nga himoong ingon niana kini. Sayup kini. Dili magdugay moadto kita sa paghatag kaninyo sa pipila ka Kasulatan sa pipila ka minuto.

¹⁰⁹ Oo, aron mabuhi sa yuta, kinahanglan kang matawo sa natural aron nga mabuhi, ug ang ingon niana nga pagkahimugso nagapahimo kanato nga manggialamon sama sa gikaingon ko na. Kita n’yo? Ug nangahimo kitang maantigo, masalabutanon, ginahatag ang mga niana sa atong salabutan. Apan hinumdumi nga kana nga pagkahimugso, ang mismong kinasugdanan niini, sukwahi na. Yutan-on kini ug supak sa Pulong sa Dios, binuang alang ngadto sa Dios ug sa Iyang plano, burong sa plano sa Dios. Kung dili pa ingon-ani kini, mas nahibalo pa unta si Nicodemo kay sa kang Jesus bahin Niini. Kita n’yo? “Usa man kaha ka ka magtutudlo sa Israel?” Kita n’yo? Nakita n’yo kung asa na paingon ang inyong mga denominasyon, kung asa na ang inyong inila’g maantigong mga tawo nga magtipontipon ug magbuhat sa ilang mga plano, ug mangandam?

¹¹⁰ Sultihan ko kamo niini. Sa matag higayon nga nagapadala ang Dios og Kahayag sa yuta, sa usa ka butang nga anaa sa Kasulatan, tapokan nila kini mismo dayon. Ug pagkawala na niana nga tawo, nagahimo na sila og organisasyon gikan niini. Ug sa diha nga naorganisa na nila kini, gusto kong pangutan-on ang si kinsa man nga magsasaysay (nga ania dinhi karon, o nga sa teyp) nga moanhi ug ipakita kanako. Sa unsa mang panahon nga sukad giorganisa sa tawo ang iglesia, namatay kini mismo dinha ug wala na gayud nakabangon pa pag-usab. Supak gyud kini sa Dios. Supak kini sa Kasulatan. Mao nga

batok ako niini, sa bisan unsa man nga batok ang Dios. Kung ania man ang Dios kanako, nan batok ako sa kung unsa man nga batok ang Dios. Kaaway ko ang Iyang kaaway. Iglesia ko ang Iyang Iglesia. Kinabuhi ko ang Iyang Kinabuhi. Iyang gihatag ang Iyang Kinabuhi, nahimo Siyang ako aron nga ako pinaagi sa Iyang grasya mamahimong sama Kaniya. Kita n'yo? Nagbinaylohay kami og puwesto. Nahimo Siyang usa ka makasasala nga sama kanako ug namatay alang kanako, puli kanako, aron nga mamahimo akong usa ka anak nga lalaki sa Dios sama sa kung unsa Siya.

¹¹¹ Karon nakita n'yo na ba kung asa na napaingon ang inyong mga denominasyon? (Wala pa kita kasugod.) Maalamon diha sa ilang kalibutanong kaalam apan patay ngadto sa plano sa Dios! Karon tan-awon nato balik, mohunong usá dinhi sa kadali.

¹¹² Nakasupak si Adan sa plano sa Dios, tungod kay wala siya mituman sa Pulong. Gisulayan niyang himoan ang iyang kaugalingon og usa ka pangtabon, usa ka relihiyon. Napakyas kini, ug kanunay kining napakyas, kung unsa ma'y ginasulayan nga buhaton sa tawo. Nasayup kaniadto si Nimrod. Nalaglag niadto si Korah. Unsa ma'y gipaninguhaan nila niadto nga buhaton? Motukod og organisasyon.

¹¹³ Ug human niana, sa diha nga sa kaulahian naorganisa na nila ang ilang mga kaugalingon, nakaplagan sila ni Jesus, nga patay! Ang ingon, “May mga mata man unta kamo ug dili man kamo makakita. May mga dalunggan man unta kamo ug dili man kamo makadungog.” Kita n'yo? Ang ingon pa, “Mga buta kamo, nga nagaagak sa mga buta. Kung ginaagak sa buta ang buta, dili ba nga pareho silang mangahulog sa gahong?” Ingon Niya, “Usa ikaw ka magtutudlo sa Israel, ug dili man lang makasabot kung unsa ang bag-ong pagkahimugso? Sa dihang, kung nagpahilayo ka lang unta sa niining mga tradisyon, ug migakus gayud sa Pulong, nasayran mo unta nga paanhi na Ako aron hatagan ang mga tawo og bag-ong pagkahimugso. Naila mo unta ang Akong adlaw. Kung nakaila ka kang Moises, nakaila ka unta Kanako. Naghisgot man si Moises mahitungod Kanako ug miingon siya nga moabot Ako, ug ania na Ako! Ug kung wala Ko ginabuhat ang mga butang nga gisulti na ni Moises ug sa mga propeta nga pagabuhaton Ko, nan ayaw Ako toohi. Kung wala ko ginabuhat ang mga buhat sa Dios, nan ayaw Ako toohi. Apan kung dili ka makatoo Kanako, ingon nga usa ka Tawo, ug kung dili ka gayud makatoo Kanako tungod kay usa Ako ka Tawo ug nga nagapamuhat sa mga buhat sa Dios, toohi ang maong mga buhat tungod kay sila ang nagapamatuod sa butang nga ginapamuhat Ko.” Kita n'yo?

¹¹⁴ Apan bisan pa man, sama karon, kung nabuhi pa Siya sa kalibutan sa karon, magkaaduna'g usa ang Assemblies of God, magkaaduna'g usa ang Oneness, ug magkaaduna'g usa ka Jesus ang tanan. Sigurado, kinahanglan nga dala gayud

sa ilang denominasyon ang bola. Kita n'yo? Kung dili man mamaingon niana, ayaw na lang nila. Gipanagkabulag na ang pagkainigsoon.

¹¹⁵ Mahinumduman ko ang usa ka gamay'ng batang lalaki nga gitawag og "Little David." Usa siya ka hamtong na nga lalaki, minyo na karon, siguro aduna na'y pamilya. Mahinumduman ko ang una niyang pagsugod. Miadto ako kaniadto sa St. Louis. Nakadungog na ako bahin sa mga batang lalaking magwawali, nga mosaka kini didto ug moingon, "Si Jesus, ang usa ka batang lalaki, natawo diha sa usa ka pasungan. Mommy, unsa na gani ang uban pa niadto? Apan dili ingon niana kanang gamay nga bata. Gisalibay niya ang iyang amerikana, mikuha og usa ka teksto ug miwali. Apan unsa man siya? Nahitabo nga usa siya ka Jesus Only. Ang iyang amahan, si Mr. Walker, miyembro sa Jesus Only. Aba, dili mahimong pasagdan lang kana sa Assemblies. Kinahanglan nga aduna pud ilang gamay'ng David. Aba, ang tanan nang uban pa kanila kinahanglan nga magkaaduna usab og ilang gamay'ng David. Ug usa niadto ka higayon sa diha nga nagapahigayon ang maong gamay'ng batan-on og usa ka panagtigum didto sa Florida, iya akong gitawgan aron moadto didto ug tabangan siya. Ug nabasa ko ug ni Igsoong Moore ang duha ka panid sa atubangan nga bahin sa mantalaan, nga wala na'y lain kondili mga gamay'ng David lang, nagkaaduna na og gamay'ng David ang matag iglesia. O, intawon! Aba, kung giila lang unta sa pundok sa mga anciano sa Dios ang gasa nga atua nianang batan-on, nahidala na unta niya ang linibo nga mga kalag ngadto sa Ginghamian, kita n'yo, hangtud nga mahikalimtan na niya ang iyang tradisyon bahin sa mga tawo ug ang niini nga sama niana. May gihatag nga gasa ang Dios sa iyang kinabuhi, gamita n'yo kini!

¹¹⁶ Sa diha nga unang gipaila ang Balaanong pagpang-ayo, ang tanan nagkaaduna na og mga mabati diha sa ilang mga kamot ug makasimhot na og mga balatian. Ug, oh, sus! Ngano man? Gikinahanglan nila nga buhaton kini, naulahi na ang ilang organisasyon sa lumba. Kita n'yo, giunahan sa inyong mga organisasyon ang plano sa Dios, ang dahum ninyo nga nakasubay kini. Apan ginapasulong sa Dios sa gihapon ang Iyang Iglesia, nga usa ka mistikal nga Lawas. Wala ka nagapamiyembro Niana, natawo ka sulod Niini.

¹¹⁷ Maantigo sa kaalam sa kalibutan, apan patay diha sa mga plano sa Dios. Sultihi ako, kung ingon-ana. Sultihi ako, kung ingon-ana. Mahimong isulti mo kanila ug pamatud-an kanila nga sayup sila, pinaagi sa Pulong sa Dios ug sa saad, ug sa gihapon dili nila kini makita. Mahimo kong iplatar mismo ug gamiton ang Pulong ug ipakita kaninyo nga sayup ang pag-denominasyon. Mahimo ko nga ipakita kaninyo nga kanang mga kredo nga aduna kamo sayup, kita n'yo, kining mga kredo nga iya sa iglesia. Maipakita nga sayup kini, ug moingon

sila, “Bueno, sa una pa kaming natudloan nga toohan *kini*.” Nakita n’yo, para kanako, kini—bahog kini, kung nahibalo kamo unsay akong ginahisgotan, pangbahog. Oo, husto kana. Dili sila makakita. Nag-ingon si Jesus, “Kamo, kamo—dili kamo makakita, aron makaduol Kanako ug magkaaduna og Kinabuhi.”

¹¹⁸ Atua si Nicodemo, usa ka halangdon nga tawo, usa ka bantugan nga tawo, usa ka obispo sa iyang iglesia, inila nga tawo, gimahal sa tanan, ug miduol kang Jesus ug nga wala gyu’y nahibaloan bahin sa kinabuhi ingon—ingon nga pagkawa’y alamag. Pagkaburong gayud niya bahin Niini sa dihang gibadlong siya niadto ni Jesus tungod niini, apan may igo siyang pagkamatinuuron aron moduol. Ang tanan nang uban kanila niadto dili man lang moduol. Tolibagbag sila nga ningbarug uban sa mga labaw’ng sacerdote ug kang Obispong *Ingon ani-ug-Ingon ana* ug *Ingon ani-ug-ingon ana*. Kita n’yo? Tolibagbag sila nga ningbarug uban kanila, mas gipili pa ang ilang mga tradisyon sa ilang mga elder kay sa patalinghugan ang Pulong sa Dios.

¹¹⁹ Karon, sultihan mo sila, dili sila maminaw niini. Ang mahimo mo lang gayud... Mahunahunaan n’yo ba... Gusto ko nga pangutan-on kamo og usa ka butang. Dili ko tuyo nga magmapasipad-on. Karon, sa mga kaigsoonan nga nagapaminaw niining teyp, dili ko tuyo nga magmapasipad-on. Mahunahuna n’yo ba ako nga moanhi dinhi, ug—usa ka bukó sa kahoy mangutana kanako, “Giunsa mo man gayud nga nahimo mong makalakaw sama sa imong paglakaw? Aduna ko’y kinabuhi, usa ako ka bukó sa niining kahoy”? Mahimo niyang pamatud-an nga may kinabuhi siya, pero dili mao kini nga matang. Kung gusto niyang makalakaw-lakaw, ang paagi lamang nga makalakaw-lakaw gayud siya, makakita, makapanilaw, mobati, makasimhot ug makadungog, kung mahimo niyang makig-estorya ug moingon kanako ug pangutan-on kana, ang bugtong paagi, maoy gikinahanglan niyang matawo pag-usab sa paagi nga ako natawo. Amen. Dili gayud niya masabtan kini sa unsa man nga ubang paagi. Apan kung natawo siya sa parehong paagi nga natawo ako, kung ingon-ana mahibaloan niya ang mga butang nga nahibaloan ko. Amen. Oh, sus! Oo, sir. Dili mo mahimong iestorya sa bukó kung ginaunsa nato ang paglihok-lihok ug ingon nga himsog, gikinahanglan nga madawat niini ang atong matang sa kinabuhi aron masabtan niya kini. Mao gihapon sa Espiritu! Mao gihapon diha sa Espiritu, o dili mo masabtan Kini. Wala na kinahanglana nga paningkamotan pang tun-an gayud Kini, pagduol lang usá ngadto Kaniya. Kay, “Gawas kon matawo pag-usab ang usa ka tawo, dili man lang niya makita ang Gingharian,” ingon Niya, kana’y, “ang masabtan Kini.” Kinahanglan nga matawo ka pag-usab aron mahibaloan Kini.

¹²⁰ Bueno, moingon ka, “Natawo na ako pag-usab.” Ug nga ginapanghimakak ang Pulong? Giunsa mo man pagkahimo? Ang imo mismong kinabuhi nagapanghimatuud kanimo niini, ang imo mismong grupo nga imong ginapasakupan, kaparehong balhibo nga mga langgam. Kita n’yo? Hulata hangtud nga mahisgotan na nato kana nga mga butang sa pipila ka minuto, kita n’yo.

¹²¹ Nagaabot pinaagi sa Espiritu. Unsaon mo man paghisgot og mga butang nga iya sa Espiritu ngadto sa mga tawo nga wala natawo sa Espiritu? Gikinahanglan nga matawo ka gayud sa Espiritu aron nga masabtan ang mga butang nga iya sa Espiritu. Ang. . . nag-ingon si Jesus, “Mohuros ang hangin kon asa buot niini mopaingon, dili nimo mahibaloan kon diin kini gikan o kon asa kini padulong.” Kita n’yo? Mao usab ang tanan nga natawo sa Espiritu, dili sila makaingon kanimo. Ang tawo nga natawo na sa Espiritu wala na gahunahuna sa iyaha, ang Dios na ang iyang ginapahunahuna.

¹²² Nagahunahuna ba mo nga makatindog ako dinhi sa entablado, mohunahuna ug sultihan ang usa ka tawo dinha sa likod, “*Si John Doe* ang iyang ngalan ug gikan pa siya sa *ingon ani-ug-ingon ana* nga lugar, nabuhat niya *kini*. Ug aduna siya’y uban pang babaye nga gipakaslan kaniadto, baynte ka tuig na ang milabay, ug nagkaaduna siya og mga anak sa niining babaye. Gikinahanglan niyang itul-id *kini* nga butang, ug buhaton *kana*,” nagadahum ba mo, nga sa paghunahuna lang, mahimo kong buhaton kana? Walay ingon-niana nga kaalam sa niining pagkahimugso dinhi sa yuta para niana. Labaw pa Kini sa niana. Sa Itaas na gayud Kini nagagikan. Dayon kung natawo ka na Espiritu, sa Itaas, ang Kinabuhi nga atua Kaniya Kinsa mao ang nagpamuhat niadtong mga butanga, miingon, “Ang mga buhat nga Akong ginabuhat, pagabuhaton usab ninyo.”

¹²³ Gikinahanglan nga mabag-o ang inyong pagkahimugso. Nangalimbongan kamo. Mahimo nga nakasulti kamo sa laing mga dila, mahimo nga nakalukso-lukso na kamo, mahimong nakasinggit na kamo, mahimo nga nabuhat n’yo na ang tanan *niini*, *niana*, ang *uban pa*, nahimo na kamo tingaling usa—usa ka matinud-anon nga miyembro. Mao man usab kaniadto si Nicodemo, kita n’yo, apan kulang siya sa pagkahimugso. Ug sa diha nga ginapanghimakak mo ang Pulong, sulayan nga ipahimutang Kini sa sayup nga puwesto ug mobuhat og usa ka butang ngadto Niini, ug ipakaylap Kini nga sama niana. Kung ingon niana miingon si Jesus, “Kining mga ilhanan maganunot kanila nga nagatoo. Lakaw kamo sa tibuok kalibutan ug iwali ninyo ang Maayong Balita ngadto sa tanang binuhat.” Samtang nga ginawali ang Maayong Balita, maganunot kini nga mga ilhanan. Sultihi ko kon diin nga Iya sukad giwala Kini gikan sa Iglesia. Ipakita kanako ang Kasulatan kon diin nga miingon Siya, miingon gayud nga, “hangtud sa ingon-ana lang kadugay.”

Ang giingon Niya, “Sa tibuok kalibutan ug ngadto sa tanang binuhat!”

¹²⁴ Oo, gikinahanglan nga madawat mo ang matang sa Kinabuhi nga aduna Siya, aron nga ikinabuhi mo ang Iyang Kinabuhi. Ug sa diha nga makita mo ang Iyang Kinabuhi, kung ingon-ana maila mo ang Iyang Pulong. Husto kana. “Sa diha nga Siya,” personal nga pulingalan, dili nga usa ka hunahuna, dili nga usa ka imahinasyon, dili nga usa ka sensasyon, kondili “sa diha nga Siya, ang Espiritu Santo, moanhi, dalhon Niya kini nga mga butang nga akong gipamulong na kaninyo, ug igapadayag ang mga niini kaninyo, ug igapahayag ang mga butang nga umalobot.” Kana ang maong pagkahimugso. Kana ang kapanghimatuuran nga Kini mao ang Pulong. Ug sa diha nga ang usa ka tawo nagapahayag nga aduna siya’y Espiritu Santo, ug ginapanghimakak ang Pulong sa Dios ug ginaplastar Kini sa sayup nga puwesto, unsaon man pagpanghimakak sa Espiritu Santo sa Kaugalingon Niyang Pulong? Karon ipakita kanako ang usa ka organisasyon diha sa Pulong. Tan-awa. Kita n’yo? Bueno.

¹²⁵ Mahunahunaan n’yo ba ang usa ka negosyante. . . Karon ania kung unsa na ka naulahi ang atong iglesia. Mahunahuna n’yo ba ang usa ka negosyante nga misugod pagpatukod sa iyang negosyo dinhing dapita, usa kini ka. . . nagmauswagong gayud kini nga negosyo, ug gikinahanglan niyang makakuha og makatabang mismo dayon, ug moadto siya sa usa ka pundok sa mga patay na nga mga tawo, mga patay’ng lawas na, ug moingon, “Mahimo ba mong moanhi magtrabaho kanako?” Wala sila’y mahatag nga kapuslanan kaniya.

¹²⁶ Mao kana ang hinungdan nga ang organisasyon dili na makabangon pag-usab. Kita n’yo? Usa ka pundok sa patay na nga mga dili-nagapanoo nga ginatipon ang ilang mga kaugalingon sama ni Nimrod, sama ni Korah, sama sa tanan na sa nangaging kapanahonan. Unsaon paghimo. . . Wala gayud Siya migamit niini, wala gayud migamit og usa ka organisasyon. Dili Niya mahimo kini. Gawas na kini sa kabubut-on sa Dios, milagpas na kini. Dili na kini makab-ot, dili na kini mahimong pangitaon pa.

¹²⁷ Unsaon mo man pagdangop ngadto sa usa ka tawo nga dili makalihok, paralisado ang ulo, kamot ug tiil, sultihan siya nga gusto mo siyang moapil para kanimo diha sa usa ka lumba sa dagan, nga modagan sa niining lumba nga malahutayon, nga isalikway ang. . . Kita n’yo? Unsaon man niya pagbuhat niini sa dihang ang maong tawo dili makalihok, paralisado siya? Kinahanglan nga wagtangan mo ang pagka-paralisado gikan sa maong tawo, uná, dayon siya makadagan na.

¹²⁸ Mao kana ang gikinahanglan sa organisasyon, ang usa ka Balaanong pagpang-ayo. Oh, sus! Nagalaum ako nga dili kana

makaplagan nga . . . medyo mahinawayon. Kita n'yo, wala ako nagapangasaway, apan kung ang usa ka lansang wala gayud nakadulot masayon kini nga maibot. Kita n'yo? Mao kana kon ngano nga ang denominasyon dili mahimong gamiton sa Balaang Espiritu. Sa dihadiha nga kini . . .

¹²⁹ Hinumdumi, nagatoo ako nga si Martin Luther adunay Balaang Espiritu. Sa walay pagduhaduha. Tingali dili diha sa sukod Niini sa karon, tungod sa wala pa Kini gihatag niadto. Nahisgotan na nato kini, kamong mga tawo sa tabernakulo, dinhi sa pisara. Apan mitoo gayud siya ngadto sa Dios, “ug ang nagatoo adunay Kinabuhi nga dayon.” Wala gyud ko nagdahum nga adunay usa ka tawo nga mitoo og ingon niana sama kanako, hangtud niining buntaga, nga nadungog ko si Charles Fuller samtang nagapaanhi ako. Nagatoo siya, usab, nga ang bag-ong pagkahimugso dili ang bautismo sa Espiritu Santo. Ang bag-ong pagkahimugso mao ang gipakatawo. Ang Espiritu Santo mao ang bautismo. Kita n'yo? Bueno.

¹³⁰ Karon nahibaloan nato nga kining tawo gikinahanglan nga matawo pag-usab aron nga mabuhi. Bueno, ang matawo sa unod, nan aduna kanimo ang kaalam nga iya sa kalibutan. Ug ginasunod sa kaalam nga iya sa kalibutan ang unodnon nga magtutudlo niini. Husto. Eksaktong ingon niana kon ngano nga ang usa ka tawo nga wala og bag-ong pagkahimugso, ug sultihan man siya sa Pulong sa Dios, mosunod pa sa ilang obispo, sa ilang presbyter o sa ilang organisasyon, imbis nga sa Pulong sa Kinabuhi. Ngano man? Walay uban pang nahibaloan kini gawas niana. “Aba, kahibalo ka, mahimong moabot ang adlaw nga mamahimo akong presbyter.” Aba, usa niadto ka magtutudlo si Nicodemo. Labaw pa kana kay sa usa ka presbyter, labaw pa kana kay sa usa—usa—usa ka pastor, labaw pa kana, usa kana ka pagka-magtutudlo sa Israel. Kita n'yo? Oo, ug usa siya niadto ka bantugan nga tawo, nahisakup siya sa niini nga grupo ug wala gyu'y hibangkaagan bahin sa Dios. Kita n'yo? Ang nahibaloan lang gyud niya mao ang pipila ka kasaysayan.

¹³¹ Unsa ma'y ka maayo sa usa ka pang-kasaysayan nga Dios kung dili Siya mao sa gihapon sa karon? Unsa ma'y ka maayo sa Dios ni Moises kung dili Siya ang mao sa gihapon nga Dios sa karon? Unsa ma'y ka maayo sa usa ka Dios nga makaluwas niadto sa usa ka tawo sa krus nga dili makaluwas og usa diha sa kaparehong kahimtang sa karon? Sama sa kanunay ko nang ginasulti, “Unsa ma'y ka maayo ang mabuhat niini nga hatagan ang imong langgam nga kanaryo og maayong mga binhi ug mga bitamina, aron himoon nga magkaaduna siya og maayo'g malig-on nga mga pako ug matahum nga mga balhibo, ug nga ibutang lang siya sa hawla?” Dili ko masabtan kini. Ginasulayan nga sultihan siya bahin sa gahum sa Dios ug ingon-anang mga butang, ug isulod siya sa usa ka organisasyon nga wala gani nagatoo sa ingon niana nga butang. Kita n'yo? Wala gyud kini

sa lugar. Mao kana ang hinungdan nga napakyas kini, patay na siya. Dili mo mahimong gamiton kini. Wala gyud kini gigamit sa Dios.

¹³² Hunahunaa lang, wala gyud gibuhat sa Balaang Espiritu, sa unsa mang panahon, nga migamit og usa ka organisasyon, wala bisan asa man sa Kasulatan o wala bisan asa man sa kasaysayan. Kung aduna ma'y nagapaminaw niining teyp, o nga ania man, ang makapakita kanako kon diin nga ang Balaang Espiritu migamit og organisasyon ug mihimo'g pagpamuhat diha sa kalibutan, ari ka sultihi ako. Gusto kong isulti mo kanako ang libro sa kasaysayan nga gigikanan niini. Nahibalo mo nga wala kini sa Kasulatan, busa gusto ko ipakita n'yo kanako ang kasaysayan nga gigikanan niini. Wala gayud migamit ang Dios og unsa man nga sama niana. Nagagamit Siya og indibidwal, sa una pa.

¹³³ Bueno, ang matawo gayud sa Espiritu. Karon, ang matawo sa unod, ug ang magkaaduna og kaalam nga iya sa kalibutan, ang maong kaalam mosunod sa unodnon nga magtutudlo niini. Ang matawo sa Espiritu mao ang pagtoo ug pagsunod sa pagtulonan sa Biblia, pinaagi sa Espiritu Santo. Ug ang usa ka tawo nga natawo sa Espiritu magasunod sa Pulong sa Dios sa walay pagsapayan kung unsa ang ginasulti kaniya sa unsa mang tradisyon. Ingon niana gyud kini. Natawo ka na pag-usab, mao kana ang hinungdan nga makita mo. Ang magpahisakup sa organisasyon, aron ipahimutang ang tanan mong paglaum diha niana . . .

¹³⁴ Karon, wala ako nagaingon nga ang mga tawo diha sa organisasyon wala natawo pag-usab. Karon, moanha ko dinha sa pipila ka minuto, kon itugot sa Ginoo. Sigurado, natawo sila pag-usab, apan mga indibidwal sila. Dili ang organisasyon ang natawo pag-usab; ang mga indibidwal dinha ang maoy mga natawo pag-usab. Apan ginapahimulag lang siya sa organisasyon palayo sa Dios, mao lang kana ang ginabuhat niini, ginapahalayo ka. Bueno. Bisn pa nga iya sa unod, ginatudlo sa organisasyon ang iya sa unod, kanunay gyud kining supak sa kabubut-on sa Dios.

¹³⁵ Ang *matawo pag-usab* nagakahulogan og “natawo nga gikan Itaas.” Ang pasabot sa *pag-usab* “gikan sa Itaas.” Siguro nahibalo na mo niana, kita n'yo. Ang *matawo pag-usab* nagakahulogan og “natawo nga gikan Itaas.” Karon, makita na ninyo, mahimo ninyong tun-an kini kung gusto ninyo, ang lexicon niini. Kita n'yo, nagakahulogan og “usa ka pagkahimugso nga gikan sa Itaas.” Tungod kay, natawo ka *dinhi*, karon ang matawo pag-usab gikinahanglan nga matawo ka gikan sa itaas *Dinhi*, aron nga matawo pag-usab. Kung ingon-ana kana nga Gingharian mas hataas kaayo kay sa niining gingharian, mas daku kaayo kay sa niini nga gingharian,

hangtud nga kini nga gingharian binuang alang Niana, ug Kana binuang alang niini.

¹³⁶ Sama sa kanunay ko nang giestorya, ako ug ang akong asawa dinhi wala pa lang dugay miadto aron mopalit og pipila ka mga groseri, mga pipila na ka bulan ang milabay, ug nakakita kami og usa ka babaye nga nakapalda. Ug pagkalahi kaayo kadto nga palda nga sukad namong nakita sa taas nga panahon.

¹³⁷ Bueno, niining buntag, dili ko ginasulti kini nga mapasipadon, napaminawan ko ang usa sa daku og bantugan nga mga organisasyon. Ug nagpaminaw ako niadto ug ang akong anak nga babaye sa radyo samtang paingon kami sa pagdidikar sa usa ka iglesia. Ug ang kanta nga ilang ginakanta niadto, usa ka matang sa kung unsa man nga kanta ni *Ingon niini-ug-ingon niana*, pipila sa niadto nga klasikal nga mga kalantahon nga ang paminaw ko sama sa mga babayeng ginapugngan ang ilang pagginhawa hangtud nga manglagum na ang ilang nawong, ug dayon modahum nga pagkanta na kana. Pagpangtig-ik kana. Gusto ko ang maayo og kinaraang Pentecostal nga pagpanganta, nga nagagikan mismo sa imong kasingkasing. Kung sintonado ka man mokanta, apan nagakanta ka sa gihapon, nagahugyaw nga malipayon ngadto sa Ginoo. Nagtoo ko nga espirituhanon kana. Gusto ko kini. Apan kanang pugngan n'yo ang inyong pagginhawa hangtud nga manglagum na ang inyong nawong, ug dayon mopaubus ug dayon mobalik na usab, kinsa ma'y. . . Wala ka gani nahibalo diha sa imong kaugalingon kung unsa ang imong ginakanta. Unsaon mo man pagpaabot nga mahibaloan ni kinsa man? Kana gyud. Ingon ni Jesus, "Nagasulti kami sa mga butang nga among nahibaloan." Husto kana. Husto kana. Ang angay natong buhaton mao ang pagkanta sa kung unsay atong nahibaloan sulod sa atong kasingkasing, kung unsay atong ginabati.

¹³⁸ Ug sa pagkahuman na nila, ang akong anak nga babaye nga nag-eskwela og musika, ug nag-ingon siya, "Igsoon," ingon niya, "usa gayud ka klasiko kadto."

¹³⁹ Ingon ko, "Oo, pero unsa kaha ka daghan sa nianang mga mag-aawit nga mga singkwenta ka tawo ang tan-aw mo nga nanimaho og sigarilyo? Unsa ka daghan sa nianang mag-aawit ang tan-aw mo, nga kagabii ingon nga gabii sa Sabado, wala kaha nag-inum-inum og diyutay? Pila ba kabuok ang mga babaye dinha nga pinutlan ang buhok? Pila ba kaha kanila ang pintado ang nawong, sa diha ang pastor sa maong iglesia nag-ingon pipila pa ka adlaw ang milabay, 'Gihimo sa Dios nga labi pang matahum ang kalibutan pagka-inbento Niya sa meyk-ap'?" Sa dihang, nasayod kita nga adunay usa ka babaye diha sa Biblia nga gipintalan niya ang iyang nawong, ug gipakaon siya sa Dios ngadto sa mga iro. Ug kita, si kinsa man nga may nahibaloan bahin sa iglesia ug bahin sa mga pagka-pagano, nasayod nga ang pagpintal maoy usa ka pagano nga kinaiya, sa una pa. Ug,

sa gihapon, ginabuhat kini sa mga kababayen-an. Ug mga lalaki nga nagapanigarilyo, nagainum-inum, nagapamuhat og mga dili maayo. Ug manindog didto ug mokanta, mga tingog nga ingon niana. Hisgotan nato kana sa pipila ka minuto mismo dinhi. Bueno. Nahiapil sa maki-organisasyong pangisip, sa dihang, magkaaduna gyu'y pagkapalaw didto sa Paghukom, sa akong pagtoo.

¹⁴⁰ Ang matawo sa Espiritu, mao ang toohan ug magbinatasan mismo sa imong kaugalingon diha sa Espiritu, mao ang masabtan ug toohan sa imong kasingkasing nga si Jesus mao ang Cristo ug nga Kini mao ang Iyang Pulong, nga wala na'y uban nga mga Pulong ang mahimong idugang Niini o taktakon gikan Niini nga dili taktakon usab ang imong ngalan gikan sa Libro sa Kinabuhi. Bug-at kana. Kung modugang mo og usa ka butang ngadto Niini, diha sa inyong tradisyon, o motaktak og usa ka butang gikan Niini, bueno, si Cristo nag-ingon, Mismo, "Pagapanason ang imong ngalan gikan sa maong Libro sa Kinabuhi." Karon, pangita og organisasyon, denominasyon diha sa Biblia. Modagan gyud ka palayo niini! Bueno. Walay pagsapayan sa unod, supak sa Biblia ang denominasyong pagtulon-an. Oo. Ang *matawo pag-usab* nagakahulogan og "usa ka bag-ong Pagkahimugso gikan sa Itaas; gikahimugso gikan sa Itaas." Kung ingon-ana buhi kita sa mga butang nga gikan sa Itaas. Oh, sus! Kay Siya Mismo Kini nga nagapamuhat diha sa Pulong pinaagi kaniyo, nga Iyang sanga, sa maong Punoan.

¹⁴¹ Mao kana ang hinungdan nga miingon si Jesus, "Kung wala Ko ginabuhat ang mga buhat sa Akong Amahan, ayaw Ako toohi." Oh, sigurado gyud! Nag-ingon Siya, "Walay nakasaka ngadto sa Langit gawas lamang Kaniya nga nanaug gikan sa Langit." Himatikdi ninyo Siya dinhi nga ginatul-id si Nicodemo, sa diha nga si Nicodemo. . . Kahibalo mo, abi nila, Siya ingon nga usa ka Tawo, dili mahimo nga Siya'y Dios. Ug miingon Siya, ug didto miingon Siya, "Walay nakasaka ngadto sa Langit gawas lamang Kaniya nga nanaug gikan sa Langit, nga mao ang Anak sa tawo nga anaa karon sa Langit." Sobra gayud kadto alang kaniya. Giunsa man Niya pagkahimo, nga Anak sa tawo, mikanaug gikan sa Langit; nga mikanaug gikan sa Langit; ang mao rang mikayab ngadto sa Langit; ug ang mao rang Usa nga nagatindog dinhi ibabaw niini nga balay, nga nagapakigsulti pa gyud kang Nicodemo, nga anaa pa gyud karon sa Langit? Bueno, angay unta nga nakita na niya nga ang Dios na kadto. Siya ang anaa-sa-tanan, sa tanang dapit! Kita n'yo? Apan siya, diha sa iyang mga tradisyon, wala nahibalo niana. Dili siya maka-espirituhanong maghunahuna. Karnal ang panghunahuna, ug dili gayud makuha kini.

Nagaingon Siya, "Sumala sa sulti sa mga tawo kinsa man kono ang Anak sa Tawo?"

"Ang ingon sa uban, bueno, 'Siya ang Anak ni David'"

¹⁴² Miingon Siya, “Kung ingon-ana nganong si David diha sa Espiritu gitawag Siyang ‘Ginoo,’ nagaingon, ‘Ang Ginoo miingon sa akong Ginoo, “Lumingkod Ka sa Akong toong kamot, hangtud nga ibutang Ko ang Imong mga kaaway nga tumbanan sa tiil”?”” Kung unsa nga Siya ang parehong Gamut ug Kaliwat ni David; Siya nga una pa kang David, Siya niadto si David ug pagkahuman kang David. Kita n’yo? “Siya ang Gamut ug ang Kaliwat ni David,” ingon niini ang sulti Biblia, parehong Gamut ug Kaliwat ni David. Unsaon man Niya pagkahimo nga mamahimong Anak Niya kung ingon-ana? Unsaon man Niya pagkahimo nga Ginoo Niya? Ang ingon sa Biblia, “Sukad niadto wala na sila nangutana pa Kaniya og bisan unsa man.” Siguro maayo kadto nga butang, usab. Oo, sir. Sige.

¹⁴³ Natawo pag-usab gikan sa Itaas. Buhi kita kung ingon-ana, buhi sa mga butang nga gikan sa Itaas, ug, tungod kay ang Iyang Kinabuhi ania kanato, nga mao ang Iyang Pulong nga nagapanghimatuud sa Pulong Mismo. Ang Espiritu nga anaa kaninyo mao ang Pulong nga nahimong unod diha kanimo. Ginabantayan sa Espiritu ang Pulong, ug nga buhi diha sa pagpanghimatuud sa Pulong.

¹⁴⁴ Karon, dili buhi ang Espiritu diha sa bisan unsa man nga denominasyon. Walay kaikag Kini sa pagtukod og organisasyon, tungod kay ang Espiritu Mismo supak sa organisasyon. Nagatan-aw ang organisasyon sa kalibutanon nga mga butang, ang panghunahuna nga iya sa kalibutan, ug nagatukod sila og dagkung mga templo ug maanindot nga mga butang, ug dagkung maanindot nga mga organisasyon, hinashasan nga mga magwawali, ug uban pa nga sama niana, ug ang pinakamaayo nga mga klase diha sa siyudad. Kon diin usab, ang Espiritu nagapaninguha og pagpangita sa matitud-anon nga mga kasingkasing nga gikahinaman sa Espiritu nga makapahayag Kini ug makapamatuud nga ang matag Pulong sa Dios Matuod. Unsaon mo man pagkahimo, unsaon man pagpamuhat sa Espiritu diha sa organisasyon sa dihang nagapanghimakak kini, ginapili ang kredo imbis ang Pulong? Dili kini mahimo. Busa, kita n’yo, patay kini. Wala ang Dios nagaadto sa niini nga matang sa mga lugar aron pangitaon ang mga Iya, usa—usa ka pundok sa mga tawo nga malihokan Niya, tungod kay ang mga niini patay na. Dili sila mga magtotoo sa Pulong, o wala sila unta dinha. Kita n’yo? Karon, buhi kita diha sa mga butang nga gikan sa Itaas. Karon, ginabantayan sa Espiritu ang Pulong. Karon, husto kana, tungod kay ang Espiritu ang nagahatag og Kinabuhi sa Pulong. Kita n’yo? “Ang sinulat nga kasugoan nagapatay; ang Espiritu nagahatag og Kinabuhi.”

¹⁴⁵ Karon, sa pagpaanhi ko dinhi karong adlaw, milantaw ako sa dagku og matahum nga mga punoan didto sa kakahoyan, sa dagkung mga bungtod, nga may mga kapihon, dalag, kanunay-lunhaw’ng mga tulbok sa mga niini. Ingon ko, “Kahibalo ka ba

kung unsa kana?” Ingon ko, “Bag-ohay lang kita nagkaaduna og kamatayon, ug ang Dios nagpagawas sa Iyang pongpong sa mga bulak, nga ginapatibaw sila diha sa maong mga bungtod. Panglubong kini nga mga bulak. Mibalik na ang kinabuhi ngadto sa abog. Bag-ohay pa gilubong sa Dios ang tanan Niyang mga binhi gikan sa mga bulak ug ingon-anang mga butang, gilubong sila balik, ug Iya lang gipangpabukad ang Iyang pongpong sa mga bulak. Mitan-aw Siya sa yuta tungod nga panglubong kini nga mga bulak. Apan sa diha nga mosubang na usab ang adlaw, mabuhi na usab kana nga binhi.” Amen. Bueno.

¹⁴⁶ Interesado ang Espiritu sa pagpanghimatuud sa Pulong. Ug kung gidawat mo ang tradisyon imbis nga ang Pulong. . . .Karon, moingon ka, “Bueno, nagatoo kami Niini tanan, pero, Igsoong Branham, kahibalo ko nga wala kami nagatoo *Niini*.” Kung ingon-ana dinha ka na mismo nagahunong.

¹⁴⁷ Giestoryahan ako sa usa ka chaplain usa ka higayon nga siya’y. . . nga adunay usa—usa ka kapitan ang miingon, o siguro usa kadto ka major, miingon, “Chaplain, adtoi didto, adunay usa ka kapitan nga naghimalatyon na. Naigo siya sa machine-gun.”

¹⁴⁸ Giadtoan niya didto, ug ang maong kapitan nagatinga na. Gipasulod nila siya sa usa ka tolda sa Red Cross, ug miingon siya, “Kapitan.”

¹⁴⁹ Mihangad kini nga nagatilagak og dugo, ug misulti siya, “Oo, sir.” Ug miingon kini, “Ikaw ang chaplain.”

“Oo.” Miingon siya, “Himalatyon ka na, kapitan.”

Miingon kini, “Nahibalo ako.”

Miingon siya, “Usa ka ba ka Cristohanon?”

Miingon kini, “Sa una.”

¹⁵⁰ Miingon, “Asa mo ba Siya gibiyaan, kapitan?” Miingon siya, “Didto mo Siya makaplagan mismo kon asa mo Siya gibiyaan.” Husto.

Ang ingon sa kapitan, “Dili ko na madumduman.”

¹⁵¹ Ang giingon sa chaplain, “Mas maayong dumdomon mo gyud, wala ka na’y nahibilin pa gawas sa pipila na lang ka minuto, sa pagtinga mong ingon niana.” Minganga siya, mga dugo nga nagagawas na gikan sa iyang baba ug sa dalunggan, ug puno siya sa mga bala sa machine gun. Ingon pa, “Agpasa na, nagakapuno na ang imong baga.”

¹⁵² Ug misugod paghunahuna ang maong kapitan, nga nakahigda didto samtang nagatinga na kini. Usa ka pahiyom ang nagpasanag sa iyang nawong, miingon, “kahibalo na ko.”

Giingnan, “Asa mo ba Siya gibiyaan? Mosugod ka dinha.”

¹⁵³ Miingon kini, “Karon mohigda na ko aron matulog.” Dinha niya Siya gibiyaan, dinha niya Siya nakaplagan.

¹⁵⁴ Sa diha nga ang inyong organisasyon motudlo na og butang nga supak sa Pulong, dinha na ninyo Siya mismo ginabiyaan. Pagbalik dayon, tungod kay buhi Siya sa pagpanghimatuud ug sa pagpatinuod nianang Pulong. Mao kana kung unsa kaniadto si Jesus, kanunay nga ginabuhat ang kabubut-on sa Amahan. Kita n'yo? Bueno.

¹⁵⁵ Busa, kita n'yo, ang pang-organisasyon nga pagsabot ni Nicodemo walay pulos ngadto sa Dios. Karon, bisan kung siya usa pa ka inila, sama sa tawag nato niini, diha sa organisasyon, nga usa ka magtutudlo sa Israel, ang tanan niya nga mga nakat-onan ug mga salabutan walay pulos kana [Ginapalagitik ni Igsoong Branham ang iyang tudlo—Ed.] sa diha nga mitindog siya sa atubangan ni Cristo, nahimong usa pa ka pagsaway ngadto kaniya. Karon, mahunahuna ko nga moingon ang tanan nga mga tawo niadto, “Balaan nga amahang, Nicodemo. Balaan nga amahang, Nicodemo. Nagayukbo kami kanimo, sir.” Apan sa diha na kang Jesus, nga mitindog siya sa atubangan sa Dios, Iya siyang gisaway tungod sa iyang kawalay-hibangkaagan. Busa, nakita n'yo kung sa unsa paingon ang tanan niana, kalimti n'yo na kini! Ari kamo, adto kita sa Dios. Husto kana. Bueno.

¹⁵⁶ Ni ang taas nga panabot ni Korah kaniadto nagkaadunay kapuslanan, o kang Adan man, pareho nilang ginapanghimakak ang gipanghimatud-an nga Mensahe sa Dios. Karon maminaw kita og maayo karon, hisgotan nato ang pipila ka mga hataas nga tubig sa pipila ka minuto. Kita n'yo, ang matag usa nila, ang hinungdan nga nagkaproblema sila kaniadto, si Nicodemo, si Korah, si Nimrod, ug ang uban pa, maoy tungod nga wala nila ilha ang mensahero sa Dios nga dala ang gipanghimatud-an nga Pulong alang nianang adlaw. Karon, nasayod niana ang si bisan kinsa man. Karon, mahimo kitang mopabilin dinha sa hataas nga oras. Apan nagasulti na daan ang Dios nga magakahitabo ang usa ka butang; motukod ang tawo og mga organisasyon, eksaktong ipahiandam gayud ang mga tawo. Gitooan nila nga adunay usa ka moabot nga Mesiyas. Oh, sila nga mga Judio, oh, sus, mao gyud! Apan sa dihang miabot si Jesus sa paagi nga miabot Siya, nanag-ingon sila, “Dili mahimong Siya kana.” Napakyas sila nga masabtan ang Pulong. Karon, wala si Jesus mianhi nga sukwahi sa Pulong (gihimo ba Niya?), apan ang pagkaanhi Niya supak sa pang-organisasyon nga interpretasyon sa Pulong. Wala miabot si Moises nga sukwahi sa Pulong, miabot siya nga eksakto gayud sa Pulong; apan napakyas si Korah nga makita kini. Ug sa tanan nang panahon hangtud karon ingon niana na kini.

¹⁵⁷ Karon tan-awa. Kining Mensahe sa maong panahon dili usa lang ka butang nga nagaingon “aduna kanato ang Kamatuoran ug aduna kita *niini*, *niana*,” gikinahanglan nga gisulti na kini daan diha sa Iyang Pulong! Ug dayon human nga naipahayag na

ang Pulong, gikinahanglan nga mapanghimatud-an kini sa husto pinaagi sa Pulong.

¹⁵⁸ Gipanghimatud-an sa husto sa Dios si Jesus, pinaagi sa Pulong. Miingon Siya, “Kung nakaila pa kamo kang Moises, naila unta ninyo ang Akong adlaw.” Nagsulti og ayo ang mga propeta niadto bahin Kaniya, nagsulti og ayo ang tanan nga mga propeta kung unsa Siya. Ug sa gihapon nabutahan sila niini, dili nila masabtan kini. Kita n’yo? Apan si Jesus kaniadto’y . . . Karon ayaw’g. . .

¹⁵⁹ Gusto kong isulti kini alang diha sa teyp, ug alang kaninyo, usab. Kita n’yo, ang mensahero nga dala ang Mensahe sa maong panahon!

¹⁶⁰ Karon, kung moadto ka, ang Seventh-day Adventist moingon, “Ania kanamo siya, tumana lang ang Sabbath!” Ipakita n’yo kanako kana diha sa Kasulatan. Miingon si Miss Eddie Baker nga aduna siya niini. Ipakita kini kanako. Miingon ang Jehovah Witness nga aduna sila niini. Ipakita kini kanako. Kita n’yo? Moingon ang Methodist nga aduna sila niini. Ipakita kini kanako. Moingon ang mga Baptist nga aduna sila niini. Ipakita kini kanako. Ipakita kanako ang unsa man nga mga organisasyon. Igapamatud-an ko kaninyo nga sila, ang matag usa kanila, wala sa kabubut-on sa Dios. Ang matag usa kanila’y supak, ginapanudlo ang mga tradisyon nga hinimo’g tawo imbis nga ang Pulong sa Dios. Wala ko’y nahibaloan nga adunay usa kanila nga modawat sa mga butang nga nahisulat gayud sa Biblia sumala sa pagkasulat gayud Niini. Husto kana. Apan sa diha nga adunay moabot ug moingon, “Dala ko ang Mensahe sa maong panahon,” gikinahanglan nga makita usá siya nga husto ug nga gisulti nang daan nga moabot.

¹⁶¹ Sa dihang milakaw didto si Juan nga Bautista, nanag-ingon sila, “Ikaw ba ang Cristo?”

Miingon siya, “Dili.”

Nanag-ingon, “Ikaw—ikaw—ikaw ba ang Elias?”

Miingon siya, “Dili.”

Nanag-ingon sila, “Kinsa ka man?”

¹⁶² Mahimo niyang ilhon ang iyang kaugalingon, aduna kaniya ang Mensahe sa maong takna. Miingon siya, “Ako mao ang tingog nga nagasinggit diha sa mga awaaw, sa gikaingon na ni propeta Isaias. Karon, kung ang akong pagkahimugso ug kinabuhi wala nagasubay niana, ayaw—ayaw ako dawata.”

¹⁶³ Sa diha nga miabot si Jesus, mao ra gihapon nga butang, mao rang butang. Ang mensahero nga may dala nga Mensahe, gikinahanglan nga usa ka gikasulti nang daan nga Mensahe sa Dios. Ug dayon ang Dios, nagasulti pinaagi niini nga mensahero, nagapanghimatuud nga kini ang Kamatuoran. Nadungog ba ninyo kini? Nasabtan ba ninyo kini? Sabta kini! Gikinahanglan

una nga kini MAO KINI ANG GINAINGON SA GINOO, nga una nang gisulti daan. Ug dayon ang mensahero nga dala ang Mensahe, gikinahanglan nga mamahimong eksakto gayud kung unsay gisulti sa Dios nga motungha nianang panahona.

¹⁶⁴ Ingon niana si Moises kaniadto. Mao kana ang hinungdan nga miyukbo siya atubangan sa Dios, ug miingon, “Dios, gipadala Mo ako.”

Miingon Siya, “Ipahalayo ang imong kaugalingon gikan niana nga pundok.”

¹⁶⁵ Nakita n’yo ba kung unsay akong pasabot? Kini ang butang nga sa una pa nagpatuis sa hunahuna sa tawo, ang nagpasimang kanila sa kabubut-on sa Dios. Karon hinumdumi, una nang gisulting daan sa Iyang Pulong ug gipanghimatud-an sa husto sa Iyang Pulong. Karon, nag-ingon si Jesus, “Kung wala Ko ginabuhat ang maong mga buhat, nga iya sa Dios, kung ingon-ana ayaw pagtoo Kanako. Kita n’yo, kung nasipyat Ako . . . Sige, kinsa man kaninyo ang maka-akusa Kanako og sala? Kinsa man kaninyo ang makapakita Kanako nga Ako usa ka dili-magtotoo?”

¹⁶⁶ Miingon si Nicodemo, “Nasayod kami nga Ikaw . . . Rabbi, gikan Ka sa Dios, tungod kay walay makahimo niadtong mga butanga gawas lamang kon ang Dios anaa uban kaniya.” Kita n’yo? Busa nagpakita kini nga usa Siya ka magtotoo.

¹⁶⁷ Karon, kita nga mga nakahibalo sa kasaysayan sa iglesia. Karon panggamita ang inyong mga kalo sa panghunahuna. Dili pa gabii kaayo, kita n’yo, busa paminaw og maayo karon ug paningkamotan ko nga dalion sa mahimo ko. Ako—gusto kong . . . Paminaw og maayo sa teyp. Karon, ang si kinsa man nga nakabasa na gayud sa kasaysayan sa iglesia, nasayod nga ang pinakaunang higayon nga naorganisa gayud ang Cristianismo, mao ang iglesiang Romano Katoliko. Karon, kung aduna pa ma’y mga naorganisa na nga wala pa kana, gusto kong dalhon ni kinsa man ang maong kasaysayan ug ipakita kanako. Usa ako ka suod nga higala ni Paul Boyd, sa daghang mga magsasaysay. Aduna ako didto sa akong tun-anan og, *The Post Nicene Council*, *The Nicene Council*, *The Nicene Fathers*, ang tanan nga sagradong mga sinulat bahin sa iglesia, nga nahibaloan ko. Gitun-an ko ang mga niini sa traynta’y-tres ka tuig, gisusi ko ang mga niini. Wala gyu’y sukad og organisasyon. Ang iglesiang Katoliko ang maoy inahan sa organisasyon. Nasayod kita nga mao kana ang kamatuoran. Walay iglesia sukad nga naorganisa, nga nahimong denominasyon, hangtud ang iglesiang Katoliko na. Ug ang pulong *katoliko* nagakahulogan og “pang-tibuok kalibutan.” Ug nagtukod sila og usa ka relihiyon nga pang-kagamhanan nga iglesia, ug gipa-padumala kini sa tibuok ginsakupan sa Roma, ug nasakup niini halos ang—ang pinakamaayong bahin sa kalibutan niadtong panahona. Mao kadto ang pang-

kagamhanan nga iglesia, ug ginapamatay kadtong dili motuman niini. Sa Konseho sa Nicaea, kinse ka adlaw nga madugoon ang pagpakigbugno niadto, sa diha nga ang tinuod nga mga propeta sa Dios niadto, sa diha nga ningbarug sila didto bahin kadtong . . .

¹⁶⁸ Ang Katolikong iglesia, ngano nga nasugdan kini, aba, nahibalo na kita tanan niini, gitudlo ko na kini dinhi. Kung unsa nga, sa tinuod, si Aquila ug si Priscilla mao kaniadto ang pastor, si Aquila mao kaniadto ang pastor sa—sa iglesia sa Roma. Sa diha nga mikanaug ang Espiritu Santo niadtong Pentecostes, miabot kini sa mga Judio nga atua sa tanang nasud ubos sa langit. Apan pipila ka adlaw human niadto, nagkaaduna si Pedro og usa ka panan-awon didto sa atop sa balay, nga adtoan si Cornelio, nga usa ka Romano, matarung nga tawo, ug nga miampo kini ug miabot kaniya ang Espiritu Santo. Wala magdugay ang talahuron nga mga tawo misugod na pagdawat niini. Si Aquila ug Priscilla miadto sa—sa Roma ug giorganisa nila, o, wala gyud nag-organisa, kondili nga gihan-ay ang unang iglesia sa Roma. Ug, sa nahan-ay na nila, nagkaaduna sila og ilang—ilang mga kaigsoonang lalaki og babaye.

¹⁶⁹ Ug si Claudius, diha sa iyang paghari, giekskomunikar ang tanang mga Judio gikan sa Roma. Ug kana ang panahon mismo nga gipahayag sa iglesiang Romano Katoliko nga atua kono niadto si Pedro sa Roma. Pakitai ko og usa ka Kasulatan kon diin nga si Pedro nakaadto sukad sa Roma, o unsa man nga kasaysayan nga nagaingon nga nakaadto gayud siya. Wala siya nakaadto, sumala sa Pulong sa Dios, ug mao Kana ang akong ginatoohan. Ug unsaon man pagkahimo ni Pedro, nga usa ka Judio, mapasagdan man lang ang mga pagsimba sa mga diosdios ug mga butang nga aduna sila, bahin sa maong mga pagsimba sa diosdios ug ingon nianang mga butanga? Kon diin nga . . . Kita n'yo? Unsaon man niya pagsupak sa kaugalingon niya mismong pagtulon-an dinhi? Binuang. Pareho lang niana ang mga Protestante usab. Hulata n'yo, hisgotan nato kini unya, pagkataudtaod, kon itugot sa Ginoo. Himatikdi. Himatikdi karon, makita nato nga sa maong panahon mismo nga nagaingon ang iglesia nga si Pedro atua kono kaniadto sa Roma, nagaingon ang kasaysayan nga si Claudius (ug giingon usab sa Biblia) nagmando nga pahawaon ang tanang mga Judio gikan sa Roma.

¹⁷⁰ Ug sa pag-agi ni Pablo sa Efeso ug nahiaabot ngadto sa kayutaan didto sa ibabaw, nakaplagnan niya kini nga mga tinun-an, ug didto siya nga nakaduaw didto kang Aquila ug Priscilla. Pagkahawa na nila, ang Romanhong mga kaigsoonan niining iglesia mingsugod dayon nga nagbuhat-buhat na og ilang kaugalingong mga ideya, ug gidugang na nila ang pagsimba sa diosdios. Ug sa diha na dayon kang Constantine, nga ang iyang inahan usa niadto ka tinuod nga Cristohanon ug naglaum kini nga ang anak nga lalaki niini mamahimo usab, apan usa

siya niadto ka politiko. Ug nakita niya nga ang kadaghanan sa Roma, o ang daku nga bahin niini, ang mga kabus, nakadawat na og kaluwasan pinaagi kang Cristo. Ug dayon misugod na sila nga nangahimong inila na kaayo, tungod kay gitangtang na nila si Venus ug gipuli si Maria, ug gitangtang si Jupiter ug gipuli si Pedro, ug uban pa nga ingon niana ug—ug sa mga tinun-an, ug bantugan na kaayo kadto nga relihiyon. Ug pagkamaisogon kaniadto nila. Sila, sila nga mga Cristohanon nga andam niadtong mamatay!

¹⁷¹ Ug ang ingon sa iglesiang Katoliko, “Kami ang una.” Eksaktong mao gyud kana ang kamatuoran, misugod ang iglesia Katoliko sa Adlaw sa Pentecostes. Apan ania kung unsa ang nagpasimang kaniya, nag-organisa siya ug gipasulod (sa Pulong) ang mga dogma. Ug ang pinakabag-o nga dogma, kamong mga sobra na sa napulo ka tuig ang panuigon makahinumtum pa sa maong pinakabag-ong dogma, mga napulo na ka tuig ang milabay, bahin sa pagkayab kono ni Maria sa langit. Usa pa ka dogma nga gidugang ngadto sa iglesia. Imbis nga Kasulatan, dogma! Ug ipasabot nila kaninyo mismo karon, nga sila “wala’y pagpanumbaling kung unsa man ang ginaingon sa Kasulatan, importante kung unsa ang ginaingon sa iglesia.”

Sila, ang ingon sa pari kanako, miingon, “Ang Dios anaa sa Iyang iglesia.”

Ingon ko, “Anaa ang Dios sa Iyang Pulong.”

¹⁷² Miingon siya, “Buena, kanang Biblia usa lang ka kasaysayan sa nahaunang iglesiang Katoliko.”

¹⁷³ Ingon ko, “Kung ingon-ana apil ako sa nahaunang Katoliko.” Ingon ko, “Nagapahimo kana kanako nga mas Katoliko pa kay kaniyo, ingon nga usa ka pari.” Kita n’yo? Ingon ko, “Kung ingon niana man kini, nan ingon niana ako.” Ingon ko, “Nakita mo, eksakto akong nagatoo sa kung unsa ang mga gipanudlo sa mga apostoles kaniadto. Ginatoohan mo kung unsa ang gipasulod sa tawo ngadto niini.” Ug eksaktong ingon niini gayud ang napaingnan niini. Sigurado, mao gayud. Napaingnan niana kini, sa eksaktong ingon niana gayud.

¹⁷⁴ Karon timan-i ang kasaysayan. Dayon misugod na sila pagdugang og mga dogma, dogma. Ug sa diha nga miabot si Pablo, nahibalo kita, nga sumala sa kasaysayan, nga wala gani siya miduaw nianang unang iglesia, tungod kay dili niya maantus ang pagsimba sa diosdios. Ug giduaw niya ang ikaduhang iglesia nga ila niadtong gitukod, ang ikaduhang iglesia sa Roma.

¹⁷⁵ Ug sa diha nga miabot ang Konseho sa Nicaea, kon diin nakita ni Constantine ang ideya nga aron mahiusa niya ang iyang gingharian. Ang pinakamismong butang nga gibuhat ni Ahab kang Jezebel, ang pagpakigminyo didto. Kita n’yo? Ug pagkakita niya sa kahigayonan nga mahiusa niya ang iyang katawhan ug

makahimo og usa ka daku og makagagahum nga nasud pinaagi niini, nahunahunaan niya nga gamiton nila ang ilang relihiyon, busa gihimoan niya sila og pang-iglesia og pang-gobyerno nga relihiyon. Ug sa napahigayon nila kadtong Konseho sa Nicaea, ug nangtungha kini nga mga pangutana kung aduna ba'y usa lang ka Dios, o tulo ba; kung mobautismo ba sila sa Ngalan ni Jesus Cristo, o sa Amahan, Anak ug Espiritu Santo; ang tanan niining uban pa nga mga pangutana nahiabot ngadto—ngadto sa usa ka pagpakigsangka didto. Ug, sa dihang nahitabo kini, ang uban sa kadtong mga tigulang nga mga propeta mitambong didto nga wala'y bisan unsa kondili mga panit lang sa carnero ang nakaputos kanila, ug nga mga utan lang ang ginakaon. Husto! Apan ang kadtong dagkung mga inilang tawo naipasulod na nila ang ilang mga pamaagi sa iglesia, gipahilum sa mga niining inilang tawo sila pinaagi sa kalibutanon nga kaalam. Apan aduna sila niadto og MAO KINI ANG GINAINGON SA GINOO. Napaingon siya ngadto sa paganong kangitngit sulod sa mga usa ka libo ka tuig.

¹⁷⁶ Apan migitib siya pag-usab, aron maglimbukad. Husto kana. Dili mo mahimong patyon Kini. “Akong pahaulian, ingon sa Ginoo, ang tanang mga tuig nga gipangkaon sa niining mga butanga.”

¹⁷⁷ Nangdugang og dogma sila nga mga denominasyon. Ug aron nga mabuhat kini, ang pagdugang og dogma, ang bugtong paagi nga ang unsa mang iglesia, ang bugtong paagi nga ang unsa mang denominasyon mahimong mapahilayo gayud sa Pulong sa Dios, mao ang pagdugang og dogma imbis nga ang balaang mga Kasulatan, mao ang pagsulay og paghimo og inyong tradisyon o doktrina sa inyong iglesia, bisan pa nga supak kini sa mga Kasulatan. Kung ingon-ana unsaon man ninyo pagkondena sa Katolikong iglesia, sa dihang ginahimo man ninyo ang mao rang butang nga ginahimo nila? Nasabtan ba ninyo? Bueno. Sa dihang, karon hunahunaa lang, dili mapakyas ang mga Kasulatan! Bakak ang mga dogma, sa sinugdanan pa. Ug sa dihang dawaton mo ang denominasyon, aduna ka na'y dogma, tungod kay kini usa ka butang mga gidugang. Wala kini sa Kasulatan. Wala kini sa Kasulatan.

¹⁷⁸ Wala gayud kanang butanga ang organisasyon. Wala gayud nag-ingon si Jesus, “Ginasugo Ko kamo nga manglakaw sa tibukod kalibutan, mangtukod og organisasyon.” Wala, sir, wala'y ingon niana nga butang! Ang pagbuhat niini, mao ang pagsalikway sa balaang mga Kasulatan. Sa dihang nahimo kini, napulihan kini gikan sa “Iglesia nga pinaagi sa pagkahimugso” ngadto sa “iglesiang pinaagi sa dogma ug kreda.” Dili diay *iglesia*, pasayloa ako; kapunongan! Gikahimugso ka sa Iglesia, apan nagapamiyembro ka sa usa ka kapunongan. Dili kini nga iglesiang Baptist, iglesiang Methodist, iglesiang Pentecostal. Kapunongan kini sa Baptist, kapunongang Pentecostal,

kapunongang Methodist, nagapamiyembro ka niini. Dili mo mahimo nga magpamiyembro sa Iglesia. Wala'y ingon niana nga butang. Gikahimugso ka sulod Niini. Giingnan si Nicodemo niana. Busa nakita n'yo na kung asa na kamo? Oh, sus!

¹⁷⁹ Mao kana kon ngano nga batok ako niini. Dili nga batok sa mga tawo sulod niini; sa sistema ako nga batok. Tungod kay dili nila mahimong . . . Ang usa sa niining mga elder o unsa pa man, diha sa usa niining mga kasimbahanan pagmowali og usa ka butang sa Biblia nga supak nianang doktrina, nianang lagda sa katukuran nga aduna sila nianang iglesiaha, palagpoton siya dayon mismo nga sama niana. Oo, sir. Ang uban kanila grabe na kaayo nga dili man lang nila tugotan nga adunay moabot nga rebaybal sa ubang iglesia gawas kung usa kini sa ila mismong mga kalalaken-an. Aba, sila gayu'y . . .

¹⁸⁰ Usa ka higayon adunay usa ka tawong mohatag niadto sa usa ka magwawali . . . Dinhi mismo niining lugara, usa ka tigulang nga magwawali ang nagatindog kaniadto dinhing dapita sa dalan, nga nagahilak ug nagapakiluoy alang sa paghinulsol, ug nagaingon, “Duol mo, dawata si Cristo, nga magpapuno sa Espiritu Santo,” ug mga butang nga sama niana. Ug adunay tawo nga gikan sa usa ka Pentecostal nga organisasyon ang miduol ug gihatagan ang tawo og usa ka dolyar sa iyang mga kamot, ug nga maghinulsol tungod kay nakahimo siya og panapaw batok sa iyang iglesia. Mora gyud og Katoliko! Husto kana. Ug nahibalo na mo kung unsay akong ginahisgotan, usab; o nga nahibaloan na niining iglesia, bisan pa man. Sige.

¹⁸¹ Ang pagbuhat niini, ang pagsalikway sa mga Kasulatan, sa dihang nabuhat na kini, mausab na kini dayon sa diha nga midugang kamo og dogma ug nagpasakup sa usa ka organisasyon, dihadhiha nadawat n'yo na ang una n'yong dogma, tungod kay dili kini subay sa Kasulatan, mao nga butang kini nga gidugang. Ug ang dogma maoy usa ka butang nga gidugang, “ang mipuli sa,” ginapulihan niini ang pagkahimugso. Sa diha nga nagadawat kamo og usa ka denominasyon, nagdugang kamo og dogma. Bueno. Pagnabuhat na kini, nan napulihan na kini gikan sa “Iglesiang pinaagi sa pagkahimugso” ngadto sa “kapunungan pinaagi sa dogma o kredo.” Tungod kay, kita n'yo, dogma kini mismo, ingon nga dili subay sa Kasulatan.

¹⁸² Karon, wala gayud nag-ingon si Jesus, “Panglakaw kamo sa tibuok kalibutan ug mangtukod og denominasyon, lakaw og organisaha ang tanang mga tawo.” Ang ingon Niya, “Lakaw og panghimo og mga tinun-an.” Nagatoo ba kamo niini? [Nagaingon ang kongregasyon “Amen.”—Ed.] Amen. Busa, nakita n'yo, bug-os kamong anaa sa gawas.

¹⁸³ Paminaw, himatikdi dinhi. Isarado nato kini sa usa pa ka butang dinhi, ipatataw nato kini nga hugot mismo niining higayona. Pila ba ang adunay usa ka Griyegong lexicon, ang

Emphatic Diaglott nga gikan sa karaang manuskrito, nga Griyego? Sige. Basaha kini, pagkuha og kinsa man nga iskolar nga gusto ninyo. Pag-adto sa library og kuhaa ang lexicon, ang Griyegong lexicon. Basaha ang Pinadayag 17, ug sa dihang mabasa mo dinha, ang King James Version nagaingon dinhi, ug kini, “Iya akong gidala diha sa Espiritu; ug nakita ko ang usa ka babaye nga nagakabayo sa usa ka mananap nga mapula, nga nalukop sa—sa mga ngalan sa pagpasipala.” Karon, mao kana ang giingon sa King James. Apan ang orihinal nga hubad nag-ingon:

. . . *gidala ako diha sa espiritu . . . ug nakita ko ang usa ka babaye . . . nga nalukop sa mga ngalan nga masipad-anon,*

¹⁸⁴ Adunay daku kaayong pagkalahi tali sa “mga ngalan sa pagpasipala” ug “sa mga ngalan nga masipad-anon.” Karon himatikdi. Nasabtan natong tanan ug nahibaloan nga kadto ang iglesiang Romano nga nagalingkod diha sa pito ka mga bungtod, nga nagakontrola sa mga gahum sa kalibutan. Ug gitawag siya nga usa ka “bigaon,” ug siya mao ang “inahan sa mga bigaon.” Himatikdi! Unsa man ang bigaon? Mahimo bang lalaki kini? Usa gyud kini ka babaye. Busa kung usa kini ka babaye, usa gayud kini ka iglesia; siya mao ang inahan sa mga bigaon, pareho kaniya. Ug tan-awa, himatikdi, “Diha kaniya!” Ipatuhop gyud kini. “Diha kaniya mao ang mga ngalan nga masipad-anon.” Unsa man kini? Karon, mga ministro nga ania dinhi ug nga nagapaminaw sa teyp, relaks lang kamo. Unsa man kana nga mga ngalan nga masipad-anon? Methodist, Baptist, Presbyterian, Lutheran, mga Pentecostal, uban pa. Mga ngalan nga masipad-anon, tungod kay mga organisasyon kini, nga alang sa Dios mga pagpamiga, sama gayud kaniya.

¹⁸⁵ Ug sila, diha sa maong mga grupo, nagaingon ang mga tawo, “Aba, usa siya ka Methodist, ug ginahimo ang *ingon niini*. Pentecostal siya, ug ginahimo ang *ingon niini*. Presbyterian siya, ug ginahimo ang *ingon niini*.” Ginahimo nila ang tanan nga anaa sa kalendaryo, nahibalo kamo niana. Ug unsa man kini? Ang mga ngalan niini nga angay unta og pareho kang Cristo ug nga tawgon unta sa ngalan nga Cristohanon, ug mga ngalan na kini nga masipad-anon! Dili sila mga iglesia. Sayup ang pagkatawag kanila nga “iglesia.” Sila’y mga kapunongan! Karon nakita n’yo na kon ngano nga batok ako sa organisasyon, dili sa mga tawo? Sa sistema nga organisasyon, kita n’yo, mga ngalan, mga ngalan nga masipad-anon (himatikdi) sa mga kapunongan, nasaypan tawgon nga mga iglesia. Iglesiang Methodist, iglesiang Baptist, iglesiang Presbyterian, iglesiang Pentecostal, iglesiang Lutheran, iglesiang United Brethren, wala’y mga butang nga ingon niana. Dili kana subay sa Kasulatan.

¹⁸⁶ Adunay usa lang ka Iglesia, ug dili ka mahimong magpamiyembro Niini. Natawo ka sulod Niini. Gikatakda

ka nang daan ngadto Niini. Ang mitikal nga Lawas ni Jesus Cristo . . . ang mistikal nga Lawas, diay, ni Jesus Cristo dinhi sa yuta, nga dala ang Pulong nga gipadayag. Mga anak sa Dios nga lalaki ug babaye, dili sila nahisakup sa ni usa man sa mga niini. “Gumula kamo gikan kanila,” ang ingon Niya. Oo.

¹⁸⁷ Himatikdi, sa pag-agpas karon. Dili ko gustong kapoyon kamo, apan kung hatagan n’yo ako og pipila pa ka mga minuto karon, agpason ko kutob sa mahimo ko, apan gusto kong masigurado nga makuha ninyo kini, aron nga dili n’yo masipyatan kini. Kita n’yo?

¹⁸⁸ Hinumdumi, ang inahang Roma, nakaplagan diha kaniya, nga nalukop sa masipad-anong mga ngalan, usa ka inahan sa mga bigaon. Dayon, kung mga bigaon sila, unsa man ang usa ka bigaon? Unsa man ang usa ka dautang babaye? Pareho ra ingon nga usa ka bigaon. Usa kini ka babaye nga nagkinabuhi nga dili-matinuuron sa iyang sinumpaan nga kaminyoon! Ug ang unsa mang iglesia nga nagaangkon nga mao ang Iglesia ni Cristo, ug nagapanghimakak sa Pulong, dili siya matinuuron sa iyang sinumpaan nga kaminyoon. Kung ingon-ana nagapanapaw siya pinaagi og pagpangdugang og dogma, pagpamiga diha sa kalibutan ug sa iyang kaalam, imbis og pagdawat kang Cristo ug sa gahum sa Iyang pagkabanhaw, sa gahum sa Espiritu Santo. Ug siya mao ang inahan sa mga bigaon nga mao usab gihapon ang gipamuhat. Wala ginatawag sa kulon ang kaldero nga “sebohon,” kahibalo na mo; kita n’yo, unom sa usa, ug tunga sa dosena sa usa pa. Ang uban niini nga mga tawo mouban-uban lang aron kataw-an ang mga Katoliko, ug nahisakup sila mismo ngadto sa usa sa niining mao ra gihapong butang. Siya mao ang inahan sa mini nga bautismo sa tubig. Siya ang inahan sa mini nga kapanghimatuuran sa Espiritu Santo, ug ginasunod-sunod mismo ninyo siya. Karon tan-awon nato.

¹⁸⁹ “Tinuod ba kana, Igsoong Branham?” Relaks lang kamo sa kadali.

¹⁹⁰ Kita n’yo, inahan siya sa masipad-anong mga ngalan, sa mga kupunongan nga gipasakupan sa mga tawo, ug nga nagadala sa kaulawan, nagakinabuhi nga bisan unsa na lang, nagapanul-ob og mga syort, mga babayeng pinutlan ang mga buhok, nakapang-meyk ap, mokanta sa mga koro, manigarilyo, modawat og komunyon, tanan na nga matang sa kahugawan sa kalibutan, ug usa kini ka kapandolan ngadto sa dili-magtotoo. Dili ba nagahisgot man niini si Timoteo, ang Balaang Espiritu? Bantayi. Kita n’yo, siya, ang Roma, mao ang inahan sa matag usa kanila. Kita n’yo? Gipamuhat ninyo mismo diha sa inyong organisasyon ang sama gayud kung unsa ang iyang gipamuhat, gipasulod ang mga dogma imbis ang Pulong, tungod sa usa ka grupo sa kalalaken-an ang nagplastar niini tanan, mga presbyter ug mga obispo ug uban pa nga nanag-ingon nga kinahanglan mamaingon *niini* kini, ug eksaktong ingon niana gayud ang

nahitabo didto sa Roma. Ug ginapaninguhaan mo, igsoon kong pastor, nga dawaton ang tibuok Pulong sa Dios, ug, tan-awa kung asa ka na paingon, padiretso na pagawas sa pultahan! Karon tan-awon nato kung giingon ba kanimo sa Dios, o dili, diha sa pipila lang ka minuto. Kita n'yo? Bueno.

¹⁹¹ Kita n'yo, siya ang inahan sa tanan, tungod kay siya mao ang una nga nangtaktak og mga sinulat sa Kasulatan ug gidugang ang dogma, tungod kay gipangsalikway niya ang dinihogang mga propeta nga ang kinabuhi niini gipanghimatud-an, sa Pulong. Tungod sa ilang mga kahibalo, maantigong mga tawo, Romanhong mga Emperador, ug uban pa, nga nanagdawat sa Cristianismo, apan gusto ang... dawaton kini diha sa ilang kinaugalingong pamaagi. Kita n'yo? Husto kana. Gusto nila kini sa ilang kinaugalingong pamaagi.

¹⁹² Gusto ni Naaman niadto nga mawala ang iyang sanla didto sa mga tubig sa kaugalingon niyang nasud, wala niya nagustohan ang pitaon nga mga tubig sa Jordan. Apan kung gusto niya gayud nga matangtang ang iyang sanla, gikinahanglan niyang motuslob didto niadtong pita ingon sa eksakto gayud nga gisulti kaniya sa propeta. Kita n'yo, wala ang Dios may ginapalabi nga tawo.

¹⁹³ Himatikdi, siya niadto ang unang denominasyon. Tan-awa ang iyang mga anak nga babaye, gipamuhat sa gihapon ang mao rang butang, ningdugang og mga kredo ug mga dogma imbis ang Pulong. Ayaw ko sultih; pakitai ko og usa nga wala misimang Niini. Pakitai ko og usa ka pastor nga modawat na og Kamatuoran, nga dili nila palagpoton tungod niini, gawas lamang kon inila gyud ka kaayo, kahibalo na mo, kinahanglan pugngan ka nila tungod sa imong pagkapopular o unsa man. Okey lang.

¹⁹⁴ Karon tan-awa ang Pinadayag 18, sa pipila lang ka minuto, ang sunod nga bersekulo diha, ang sunod nga kapitulo, human nga masusi sa Pinadayag 17 ug—ug nga nahipadayag ang tinago niining Miss Babilonia. Ginasaysay sa ika-17 nga kapitulo sa Pinadayag nga usa siya ka iglesia nga naglingkod diha sa pito ka bungtod, ang Siyudad sa Vatican, nga ginakontrola ang tanan nga mga hari sa kalibutan (eksaktong mao gyud kana ang tinuod), ug ang mga Presidente usab, ug uban pa. Uh-huh. Mao nga, gani atua siya didto, nga gikuptan sa iyang kamot ang bahandi sa iyahang kalibutan. Eksaktong ingon niana gayud. “Kinsa man ang arang makiggubat kaniya?” Husto kana. Nasayod kitang tanan niana. Apan ngano nga magpahisakup man kamo ngadto sa usa ka butang nga konektado kaniya? Karon himatikdi diha sa ika-18 nga kapitulo, ang mismong kapitulo human nga gisaysay na ang iyang tinago. “Naglingkod diha sa templo sa Dios.” Karon, ania na, ang...

195 Zella Braitman, ania ka ba karong gabhiona, Zella? Gidala niya, atua kini sulod sa kuwarto dinha karon, ang *Our Sunday Visitor*, ang mantalaan sa Katoliko. Ug ginatubag sa maong mantalaan sa Katoliko ang usa ka ministro. Miingon, “Ginaingon mo ba, reverend, nga ang. . . Diha sa mga numerong Romano didto sa Vatican, o didto sa ulohan sa trono sa Papa, nga nahisulat ang ‘Vicarivs Filii Dei,’ nagakahulogan kini, nga atua pa kini sulod sa mga Katolikong dyosis, nga kana mao ang—ang numero sa maong mapintas nga mananap sa Apocalipsis?”

196 “Aba,” miingon siya, “sigurado, mao gyud. Kini eksaktong, maihap nga unom ka gatus ug saysenta’y-sais. Eksakto gyud.” Ug giangkong kini sa Romanong dyosis, nga mao gayud. Apan ania ang ilang tubag, maantigo, puno sa pagkamaalam, miingon, “Apan, kahibalo ka, ang imong ngalan sa ubang pinulongan mahimong maihap nga mao usab.”

197 Ingon niining lalaki, “Ang akong ngalan, halos mao usab diha sa ubang pinulongan.” Iyang giuhap kini. Miingon, “Kita mo, halos unom ka gatus ug saysenta’y-sais usab ako.” Ang ingon, “Nagkaaduna na og mga ginatus kanila.” Ingon pa, “Sa matag higayon nga aduna ma’y motungha, may tawong adunay numero nga unom ka gatus ug saysenta’y-sais.” Ug ang ingon, “Reverend, kahibalo ka ba nga diha sa usa ka pinulongan ang kaugalingon mong ngalan mahimong maihap nga anticristo?” Ingon dayon, “Nganong nagatan-aw man ka sa ingon niana nga mga butang?” Ang kaalam ang tan-awon n’yo.

198 Apan mas nahibalo ang Balaang Espiritu. Himatikdi. Mamahimo nga, ang akong ngalan mahimong maihap nga unom ka gatus ug saysenta’y-sais, apan wala man ko mihaum sa tanan niining uban pang mga kwalipikasyon. Wala man ko nagalingkod diha sa usa ka bungtod. Wala man ko nagingon *niining* mga butanga. Dili man ko usa ka tigpamuno, nakita n’yo. Husto kana. Mao kana ang Iyang ginahisgotan. Busa ang kalibutanon mong kaalam napaingon lang sa walay kapuslanan, sir, husto kana, diha sa Presensiya sa Balaang Espiritu. Wala ko mihaum sa tanang uban pa niini, apan mihaum gayud siya. “Nagalingkod sa templo sa Dios, nga nagapasundayag sa iyang kaugalingon ingon nga Dios, ug nagalingkod sa pito ka bungtod.” Wala man ko nagalingkod diha sa pito ka bungtod, kung maihap man gyud kini nga unom ka gatus ug saysenta’y-sais. Wala ko mihaum sa tanan nang uban pa niini, apan mihaum siya. Kita n’yo, tan-awa. Kita n’yo? Busa pagsalig lang diha sa Balaang Espiritu, “Dili kamo magkaguol kung unsay inyong igasulti, tungod kay dili kamo mao ang magasulti; ang Amahan na kini.”

199 Busa unsaon man pagkahimo nga ang inyong kaalam ug ang inyong bag-ong Pagkahimugso gikan sa Itaas maitandi sa niining mga butang dinhi sa yuta, sa niining—niining mga batid nga mga madyikiro niini? Aba, nahibaloan nila ang matag

gamay'ng tikas ug suuk-suuk. Unsaon man pagkapadayon ni Moises nga sa dihang gisunod niya ang mga sugo sa Dios, nga ibalibag ang iyang sungkod ug nahimo kini nga usa ka bitin, ug ania miabot ang mga madyikiro ug gibuhat ang mao rang butang? Apan relaks lang niadto si Moises, nga nahibalo nga gisunod na niya ang Pulong sa Dios, ug gikaon sa iyang bitin ang tanan nang uban pa niini. Kita n'yo? Busa kung gituman mo na ug nagka . . . Unsa man ang mahimo niyang buhaton niadto sa diha nga gipangunahan niya sila ngadto sa yutang saad, ug atua ang Dagat nga Mapula nga naga-ali kanila, apan ang dalan sa Dios midiretso mismo palatas niini. Amen. Miingon, "Pabilin sa inyong nahimutangan, ug tan-awa ang Kahimayaan sa Dios!"

²⁰⁰ Pag-anaa kini sa dalan sa pangatungdanan, sa pagsunod sa Pulong, pagpabilin dinha ug tan-awa ang pagbuka niini. Amen. Singkwentay-tres na ang panuigon ko, nga nag-alagad na Kaniya sa mga traynta'y-tres na ka tuig, unta aduna pa ko'y napulo ka milyon ka tuig nga alagaran Siya. Wala ko pa gayud Siya nakita nga napakyas, pag-gituman ang Iyang Pulong. Husto kana.

²⁰¹ Karon tan-awa, dihadhiha pagkahuman sa iyang kasal-anan, nabutyag ang iyang mga tinago. Dugay na natong nahisgotan kini, nahibalo na kita niini.

²⁰² Karon ang sunod nga kapitulo, tan-awa ang Pinadayag 18. Hisgotan ko lang kini sulod sa pipila ka minuto. Usa tingali kini ka maayong hisgotanan, dili man ta magdugay dinhi kondili modugay-dugay lang og pipila ka minuto, ug mahimo nga magkahulogan kini og gamay'ng butang alang kaninyo. Mao ang ginalaum ko.

²⁰³ Karon makita nato dinhi, diha sa ika-17 nga kapitulo, sa ika-5 nga bersekulo.

. . .nahasulat sa iyang agtang ang usa ka ngalan, TINAGO, ANG BANTUGANG BABILONIA, ANG INAHAN SA MGA BIGAON, ANG KANGIL-ARAN SA YUTA.

Ug himatikdi.

Ug nakita ko ang babaye (iglesia) nga nahubog sa dugo sa mga balaan, ug sa mga dugo sa mga gipamatay nga saksi ni Jesus: . . .sa nakita ko siya, nahibulong ako og daku nga kahibulong.

²⁰⁴ Kita n'yo, pagkakita kaniya, ingon niana siya ka pagkatahum nga butang. Ug siya ang inahan sa mga bigaon, bigaon nga relihiyon, mga denominasyon, eksakto gyud kung unsa ang gibuhat niya, kita n'yo, tungod kay nangpasulod sila og mga dogma sama sa gibuhat niya. Karon tan-awa, tan-awa sa Pinadayag karon, kana ang ika-17 nga kapitulo, nga nagatapos sa ika-18 nga bersekulo. Karon himatikdi.

...sa human niining mga butanga, human nga nabutyag na ang iyang tinago, sa human niining mga butanga akong nakita nga nanaug gikan sa langit ang usa usab ka manolunda, nga may dakung pagbulutan;...

²⁰⁵ Karon, ania nagaabot ang usa pa ka mensahero nga mikanaug, sa sunod nga kapitulo, nga nabutyag ang iyang tinago. Karon, kini na karon ang pagkabutyag sa iyang tinago ug sa tinago sa iyang mga anak. Kita n'yo, masabtan na nato karon sa eksakto kung unsa ang nagpa-bigaon kaniya: tungod kay nagpanapaw siya batok sa Pulong sa Dios. Ug mao kana ang nagpa-organisasyon kaniya. Dili siya makapabilin ingon nga usa ka maki-Biblia nga iglesia ug nga dawaton kana. Ug ni ang unsa man nga organisasyon nga dili nagadawat sa matag Pulong Niini (sa paagi nga pagkasulat Niini) ang mahimo gayud nga usa ka maki-Biblia nga iglesia. Ug wala ni usa kanila ang ingon niana, sa nahibaloan ko, wala ni usa. Busa dinha, kita n'yo, dihadiha nga nagaorganisa na siya sa mga butang nga ginabuhat niya, (parehong pinaagi sa Kasulatan ug kapanghimatuuran) namatay siya mismo dinha, ginadawat na niya ang dogma. Karon tan-awa, karon mao kana ang nahitabo.

²⁰⁶ Nagsugo ang Dios, diha niining ika-18 nga kapitulo, og usa ka gamhanang manolunda, human nga nahibutyag na kana nga tinago, usa ka gamhanang manolunda, o, usa ka mensahero. Himatikdi dinhi.

...sa human niining mga butanga akong nakita nga nanaug gikan sa langit ang usa usab ka manolunda, nga may dakung pagbulutan; ug ang yuta ginaiwagan sa iyang himaya.

Ug misinggit siya...sa usa ka makusog nga tingog,... ang bantugan nga Babilonia (kalibugan) nagakagun-ob na,...ug nahimo siyang puloy-anan sa mga yawa,... tagoanan sa tanang mahugaw'ng espiritu, ug halwa sa tanang malimpyo ug dulumtan...mahugaw og dulumtanan nga langgam.

Ug ang tanang kanasuran nanagpakainum sa bino sa kaisug sa iyang mga pagpakighilawas, ug ang mga hari sa yuta...mga nakapakighilawas kaniya, ug ang mga magpapatigayon sa yuta nangadato gayud sa gahum sa iyang mausikong pagpatuyang.

²⁰⁷ Tan-awa, dihadiha human nga nahibutyag ang iyang tinago, kung kinsa siya, kung unsa siya, kung kinsa ang iyang mga anak nga babaye, nga naipahibalo na ang tinago, nan nagsugo ang Dios og usa ka manolunda, usa ka mensahero aron nga (unsa?) mangtawag na. "Panggula na kamo!" Ang Mensahe sa maong panahon!

... *Gumula kamo gikan kaniya, katawhan ko, aron dili kamo makaapil sa iyang mga hampak...*

Pagatunglohon Niya siya. Bantayi.

²⁰⁸ Gumula kamo gikan kaniya! Nagsugo ang Dios og daghang... gamhanang manolunda, o, usa ka mensahero. Ug ang iyang Kahayag wala diha sa usa lang ka suuk, mikaylap Kini sa tibuok kalibutan. Gumula kamo gikan kaniya! Sa unsa? Kaniya, ug sa iyang igsoong mga babaye, usab. Aron dan-agan ang kalibutan, ug tawagon pagawas ang Iyang mga tawo gikan kaniya. Karon, nahibalo kamo nga mao kana ang Kamatuoran. Usa ka mensahero ang gipadala gikan sa Langit, aron tawagon ang mga tawo sa Dios pagawas gikan sa Babilonia. Ug midan-ag ang iyang Kahayag sa kalibutan, ang gamhanan nga Balaang Espiritu.

²⁰⁹ Himatikdi, nag-ingon ang Biblia, “Usa siya ka halwa, ug nakasikip og dulumtanan, mahugaw nga mga langgam.” Dili mga agila, ha, dili, dili, dili, dili gayud. Mga buitire, “mahugaw’ng, dulumtanan nga mga langgam,” mga ingon niana ang mga nakahalwa sa sulod palibot kaniya. Usa siya ka halwa nga puno sa mga niini, usa ka tibuok halwa nga puno. Sa unsa? “Sa mga masipad-anong ngalan,” nga supak sa Kasulatan. Nag-ingon ang Ikaduhang Timoteo 3, nga ang Balaang Espiritu ang nagasulti, “Sa kaulahiang mga adlaw managpamiya sila gikan sa Pagtoo ug magapatalinghug sa mga malimbongon nga espiritu.” Nag-ingon usab Kini, ang Balaang Espiritu ang nagsulti nga “Sa kaulahiang mga adlaw magmagahi’g ulo na sila, hambugiro, madinumtanan (‘Dalaygon ang Dios, magpamiyembro ka kanamo, o dili gayud malista ang imong ngalan diha sa among libro, malaglag ka’). Dulumtanan! Mahugaw!” Nagalaum ako nga wala ako nakapasakit, nagalaum ako nga maayo lang ang ginabuhat ko. Dulumtanan, mahugaw’ng mga langgam, nakahalwa sila kaniya.

²¹⁰ Hinumdumi, usa ka agila ang Dios. Gitawag Niya ang Iyang Kaugalingon nga usa ka agila. Ug gitawag Niya si Jacob nga usa ka agila. Ug Iya kita mga gagmay’ng agila. Amen. Iyang gitawag ang Iyang mga propeta nga “mga agila.” Ug kini nga manolunda mikanaug aron mangbutyag ug aron manawag!

²¹¹ Sama sa hamubo kong mensahe bahin sa *Ginauyog-uyog Sa Agila Ang Iyang Salag*. Nagsige sunodsunod didto sa nataran ang kadtong gamay og luoy’ng agila sa niadtong tigulang nga himongaan, nga nagaklak-klak, apan dili niya makaon kadtong mga pagkaon nga ginakaon niini, mga pang-sosyal, ug mga babayeng pinintalan ang nawong, pinutlan ang buhok, ug nga mga naka-syort. Dili niya mahimo kadto. Apan wala siya’y nahibaloan nga uban pa gawas niadtong pagpangklak-klak niadtong maong himongaan. Apan usa niana ka adlaw

nakita siya sa inahang agila. Misinggit kini, nga ginatawag siya, miingon, “Anak, dili ka kapareho nila. Gumula ka gikan kaniya!”

Ang ingon, “Mama, unsa ma’y mahimo kong buhaton?”

²¹² Miingon, “Ikapakapa ang imong mga pako ug sugdi na.” Sa unang lukso, nabunggo siya sa poste, sa kinatung-an mismo sa usa ka organisasyon. Miingon, “Anak, kinahanglan kang molukso pa og mas hataas pa kay niana o dili ta ka masalo. Kinahanglan nga mahialsa mo ang imong mga tiil gikan sa yuta.” Pagadalhon siya niini diha sa usa ka paglupad. Nakaplagan niya nga makalupad diay siya. Mianhi kini aron nga tawgon siya pagawas. Husto kana.

²¹³ Apan kining Inahang Babilonia nakasikup alang kaniya og usa ka pundok sa mga manok, maliputong mga manok, pinintalan, pinutlan ang mga buhok, nga nagapatawag sa ilang kaugalingon nga “Mga Cristohanon.” Aduna siya’y halwa nga puno kanila. Kamong mga magwawali nga nagatindog diha sa pulpito ug nga ginapasagdan sila nga mga kababayen-an sa mga niana, makauulaw kamo, aron lang nga mapadaghan pa ang inyong denominasyon. Pagapanilngon kana sa Dios sa inyong kamot. Gumula kamo gikan niini! “Ang Akong carnero nagapatalinghug sa Akong Tingog.” Usa ka halwa sa mga dulumtanan, gahi’g ulo, hambugiro, mahigugmaon sa mga kalingawan labi pa kay sa paghigugma sa Dios, mas pasulabihon pa nga mahisama sa kalibutan kay sa mahisama kang Cristo. Sa dihang makakita ka og usa ka babayeng naka-meyk-ap og ayo, nagapakita kini nga walay sulod diha kaniya. Dili siya matuud sa sulod. Eksakto gyud kana. Kung ang babaye. . . Nakakita ko og usa sa miaging adlaw, nga berde ang buhok, tinuod kana, may mga berde pa nga butang dinha sa iyang mga mata.

²¹⁴ Karon, kung ikaw—kung—kung wala ka ma’y buhok, ug—ug gusto mong magsul-ob og peluka, okey lang kana, apan, pagsul-ob og usa nga daw tawo tan-awon. Ug kung wala ka’y bisan unsa man nga kuko, ug—ug gusto mong magkaaduna og mga kuko, ayaw pagkuha niining mga daw sa tipaka sa mga navy bean, pagkuha—pagkuha og tinuod nga mga kuko. Kung wala ka man og bisan unsa niining mga butanga, okey lang. Kung wala ka’y bisan unsa man nga ngipon, pagpataud kung tauran ka man nila og ingon niana, pagpataud niini. Apan ayaw ipaibot ang mga ngipon nga gikahatag sa Dios kanimo tungod lang kay medyo nagkasungki-sungki ang mga niini, ug nga maayo pa kini nga mga ngipon, aron pulihan og lahi. Ayaw ipatina ang inyong buhok, o unsa man, ug makita nga daw sa gikan mo sa kung asa nga lunangan. Ayaw! Kung wala man ka’y kolor, ug gusto mong himoon ang imong kaugalingon nga daw sa may kolor kon tan-awon, okey lang, mahunahunaan ko na. Apan ayaw himoa ang imong kaugalingon nga daw si Jezabel kon tan-awon, maingon sa daw sa usa ka kamalig nga napintalan.

²¹⁵ Ug kamong mga kaigsoonang Pentecostal, ginatugotan n'yo silang mga kababayan-an nga putlon ang ilang buhok, sa dihang giingon na sa Biblia nga mao kana ang iyang himaya! Ug dili gani angay alang kaniya nga moampo nga ingon niana ang iyang buhok. Ug sa gihapon pasakaon pa siya sa pulpito ug ipawali sa Maayong Balita, pakantahon diha sa choir, patudloon og Sunday school. Makauulaw kamo! Angay kamong maulaw sa inyong kaugalingon. Ngano nga batok man ako sa organisasyon? Sa hunahuna n'yo ba nga puyok-puyokon ko ang usa ka butang nga sama niana? Nahibalo ako sa hinungdan nga ginabuhat mo kini, igsoon. Mas nahibalo ka, pero kung motudlo ka man batok niana, dalhon ka dayon didto sa punoang-buhatan, ug palagpoton ka nila. Dalaygon ang Dios sa imong kaisug kung buhaton mo kini. Husto kana. Pagapasidungan ka sa Dios.

²¹⁶ Unsa ba'y giingon sa niining manolunda? "Gumula kamo gikan kaniya!" Oo, sir. Miabot kini nga manulonda ngadto sa yuta, ug mianhi siya aron dalhon ang Kahayag, ug gipadangan niya ang maong Kahayag sa tibuok kalibutan. Usa siya ka gamhanang manolunda. Ug mianhi siya aron nga imantala ang mensahe nga "Panggawas kamo sa Babilonia! Ayaw paghikap sa iyang mahugaw'ng mga butang!"

²¹⁷ Aduna siya'y tibuok halwa nga puno sa mga niini, miingon, "Siya ang maong halwa sa tanang dulumtanan nga langgam." Oo, aduna siya'y usa ka halwa nga puno sa mga niini karon, ang World Council of Churches, o mga kapunongan. Naihalwa niya ang maong tibuok grupo karon, nagahiusa na silang tanan. Nahimo siyang usa ka halwa, bueno, nga puno sa mga dulumtanan nga mga langgam. Husto kana. Sulayi pagpakigsulti kanila usa ka higayon, sulayi lang, dong, mga maantigo diha sa mga kalibutanong kaalam, apan wala gyu'y hibangkaagan bahin sa Dios sama sa usa ka rabbit bahin sa mga sapatos nga pang-niyebe. Tinuod kana. Gayu'y, ingon niana gyud kini, kita n'yo, ang nahibaloan lang nila maoy kung unsang kahibalo nga mahimo nilang ipahimutang *kini* ug buhaton *kana* dinha. Apan paghisgotan na ang pag-ila Kaniya? Huh! Oo, nangasikap diha sa iyang halwa inubanan sa iyang mga dogma. Misugod sa mao ra usab ang mga protestanteng kaiglesiahan, nga nangahimo nga iyang mga anak nga babaye, nagkaingon-niini tungod sa pagpanghimakak sa Pulong sa Dios. Ingon niana ang iyang ginabuhat. Ginapanghimakak niya ang Pulong. Ug kung nagadawat ka sa kung unsang laing butang imbis ang Pulong, ginapanghimakak mo na Kini mismo. Ug sa dihang nagapahisakup ka sa usa sa mga niini, napanghimakak mo na ang Pulong usab. Dili gusto sa Dios nga maingon niana kamo, walay lugar kini sa Kasulatan.

²¹⁸ Himatikdi, kini ang manolunda sa Kahayag, timan-i, ang ulahing manolunda, kini ang manolunda sa kapanahonan sa iglesiang Laodicea. Kini mao ang mensahero sa Laodicea,

nga, kini na ang kaulahian, tungod kay ang sunod mismo nga kapitulo maoy ika-19 na nga kapitulo, nga mao ang nagasingabot na nga Pangasaw-onon. Ug kini, diha sa Kasulatan, ang ulahing manolunda nga mianhi aron magdala og Kahayag sa dili pa moabot ang pagtagbo sa Pangasaw-onon kang Cristo. Kini ang Kapanahonan sa Iglesiang Laodicea, kung ingon-ana. Unsa man ang mensahero sa Kapanahonan sa Iglesiang Laodicea? Ang pagtawag kanila pagawas sa Babilonia! Tan-awa! Mga kaiglesiahan nga nasikup sa iyang halwa uban kaniya, pinaagi sa iyang mga dogma, sa pagpanghimakak sa Pulong ug sa pagdawat og mga dogma. Kini ang manolunda sa Kahayag ngadto sa iglesiang Laodicea nga nagsalikway kang Cristo ug sa Iyang Pulong, tungod sa dogma, ug nga nagpahigawas Kaniya. Ug nagtindog Siya diha sa pultahan, nga nagapanuktok, nagapaninguha nga makasulod. [Nagapanuktok si Igsoong Branham ibabaw sa pulpito—Ed.] Kita n'yo? Gisalikway sa maong kapanahonan sa iglesia si Cristo, ug si Cristo mao ang Pulong, ug gisalikway Kini, ug atua na Siya sa gawas. Ang maong kapanahonan lang sa iglesia nga makita nato si Cristo nga atua sa gawas, nagapanuktok, nagapaninguha nga makasulod. [Nagapanuktok si Igsoong Branham ibabaw sa pulpito.] Ug ang Mensahe niining manolunda, nga mensahero nga gikan sa Dios, ginapalanog niya ang iyang Mensahe ibabaw sa yuta, aron nga “Manggawas kamo sa Babilonia! Manggawas kamo sa mga organisasyon!” Ang Balaang Espiritu karon, ang kapadayagan sa Balaang Espiritu mao kanang manolunda nga nagapaninguhang ibalik ang mga tawo ngadto sa Pulong, tungod kay ang Balaang Espiritu panghimatud-an lamang ang Pulong. Dili mahimo Niini panghimatud-an ang mga dogma, walay kinabuhi diha sa mga niini. Siya ang Kinabuhi. Himatikdi, gisalikway Siya sa Kapanahonan sa Iglesiang Laodicea, gisalikway Siya, ug gipahigawas nila Siya.

²¹⁹ Himatikdi, kini nga manolunda mao ang kaulahiang mensahero sa dili pa ang pag-abot ni Cristo diha sa ika-19 nga kapitulo sa Pinadayag. Ang maong Tingog sa mensahero! Kung nahimatikdan nato, sa diha nga gihatag niya ang iyang Tingog ibabaw sa yuta, adunay Tingog nga milanog pag-usab didto sa Langit. Ika-4 nga bersekulo, kung gusto ninyong basahon kini. Sige, ika-4 nga bersekulo, sa ika-19 nga kapitulo. Kini nga mensahero sa yuta may kahilig gyud kaayo sa Dios hangtud nga, sa dihang gisulti niya kini diha sa yuta, gipalanog sa Dios ang mao mismong butang gikan sa Langit. Unsa man ang hubad nianang ika-4 nga bersekulo? Unsa ma'y pasabot niini? Ang Tingog sa Dios nga nagapakigsulti ngadto sa Iyang pinili nang daan nga mga tawo, nga nagaingon, “Gumula kamo gikan kaniya!” Eksakto gayud kung unsa niadto ang Tingog! Napahigawas Niya tanan ang maong mga tawo gikan didto, napahigawas tanan gikan sa Babilonia. “Gumula kamo gikan kaniya, aron dili kamo makaambit sa iyang mga kasal-anan,”

oo, sir, pagawas nianang dogma ug mga kredo, ngadto sa Pulong nga nahimong Espiritu ug Kinabuhi. Amen.

220 Himatikdi, ang ika-19 nga kapitulo mao na ang sunod, “Sa human niining mga butanga.” Nahimatikdan ba ninyo dinhi sa ika-19 nga kapitulo, “Sa human niining mga butanga”? Himatikdan ang unsa? Pagkahuman sa unsa? Pagkahuman na sa Mensahe nga “Gumula kamo gikan kaniya!” “Sa human niining mga butanga,” bantayi, “mao ang hugyaw sa mga balaang Pangasaw-onon, kauban na ang Pamanhonon, paadto na sa Kasal sa Cordero.” Unsa na gayud kita ka haduol kung ingon-ana, igsoon? Unsa man ang ulahing pagtawag? Panggawas kamo sa Babilonia!

221 Karon, mga igsoon ko, mao kana ang hinungdan nga batok ako niini. Wala kini sa kasulatan. Dili kini ang unang naandan na. Napamatud-an na nga mini kini. Wala ang Dios niini, wala Siya niini kaniadto pa, wala gayud sa gihapon Siya sa umalabot. Karon, wala ako nagaingon nga walay mga tawo sa niining mga organisasyon, nga nagalangkub sa iglesia. Apan, samtang nga nagapabilin ka niana nga sistema, kabahin ka niini.

222 Kung nagapabilin ako sa Estados Unidos, usa ako ka Amerikano. Samtang nga ako usa ka lungsuranon o usa ka miyembro niining Estados Unidos, kabahin ako niini. Kung moadto ako sa Alemanya ug isalikway na ang akong pagkamiyembro dinhi, o ang akong pagka-lungsuranon, gikuha ko ang pagkalungsuranon sa Alemanya, dili na ako usa ka Amerikano, usa na ako ka Aleman. Ug kung moadto ako sa Japan, o kung asa man, sa Rusya, mahimo na akong usa ka lungsuranon didto.

223 Ug sa diha nga magpasakup ka sa usa ka pagka-lungsuranon... usa ka sistema, ug nahimo na nga usa ka lungsuranon sa nianang sistema, nagapakita ka kung unsa ikaw. Ug sa niining kaulahiang mga adlaw, ginatawag sa Dios ang mga tawo pagawas niini. Ingon niana ang giingon sa Biblia, “Gumula kamo gikan kaniya, aron nga dili kamo makaambit uban kaniya, ug pagadawaton Ko kamo. Ayaw paghikap sa iyang mahugaw’ng mga butang, kita n’yo, ug pagadawaton Ko kamo. Ug mamahimo kamong mga anak nga lalaki ug babaye nganhi Kanako, ug mamahimo Akong Dios nganha kaninyo.” Kita n’yo?

224 Mao kana ang hinungdan nga misulti ako batok sa maong iglesia, sa—sa maong kapunongan. Dili ko matawag kini nga usa ka iglesia. Adunay usa lang ka Iglesia, kana ang Iglesia sa Lawas ni Cristo. Apan kining mga kapunongan nga gitawag og “iglesia,” nagaingon ang akong Biblia nga mga masipad-anon sila nga mga ngalan, tanan sila, tanang mga organisasyon. Unsa ma’y ilang ginapasipala? Ang *pagpasipala* mao ang “pagsupak ngadto,” o, “ang pagsulti batok.” Sa diha nga nagaingon ang Dios “ari ka magpakahimugso,” ug moingon sila “ari ka

magpamiyembro ka.” Kita n’yo? Sa diha nga ang bautismo sa Espiritu gipulihan na og sayup alang sa usa ka ostya sa iglesiang Katoliko, sa usa ka paglamanohay sa iglesiang Protestante, ug sa emosyon sa iglesiang Pentecostal, imbis sa Persona ni Cristo nga nagasulod inubanan nianang tanang pagtukod sa piramide nga atong nahisgotan sa miaging adlaw.

²²⁵ Idugang sa inyong pagtoo, ang maligdong nga batasan, ug uban pa, ang tanan niini nga anaa diha sa Unang Pedro, sa unang . . . Ikaduhang Pedro, nagtoo ko, sa unang kapitulo, kon diin kining tanan gidugang sa imong pagtoo, ang tanan niining mga butanga, ang pagkadiosnon, ug ang kaputli, ug ang pagkabalaan, ug tanan na, ug dayon selyohan ka na sa Espiritu Santo.

²²⁶ Pero sama lang kini sa usa ka tawo nga sila’y . . . nagapangangkon ang mga tawo nga aduna sila niini nga wala man, tungod kay natudloan sila sa sayup. Mobati ang mga Methodist og kataw-anan, sa una, ug medyo mangurog, o—o manggisayaw diha sa Espiritu. Ang mga Pentecostal mosulti og laing mga dila, o—o mohimo og pang-emosyon nga butang. Nagatoo ako nianang mga butanga, sigurado, apan kana nga mga butang nga wala niining uban pa walay pulus.

²²⁷ Sama sa gikaingon ko na sa miaging adlaw, nga sama kini sa usa ka peacock . . . o usa ka blackbird nga naninguha nga sul-oban ang iyang kaugalingon og balhibo sa peacock, o usa ka buitire nga naninguha mogamit og mga balhibo sa salampati. Wala gyud mitubo ang mga niini dinha, iya lang gipangtusok kini sa iyang kaugalingon. Gipangtanum lang sila, denominasyon sila. Apan sa diha nga ang Dios na ang mobutang og unsa man dinha, natural gayud kini. Ginapaingon mo ang imong kaugalingon, “Nakapamiyembro na ako sa iglesia kagabii. Dili na ako makagawas-gawas, dili na ako makainum-inum, dili na ako makahimo pa *niini*. Nakapamiyembro na ako sa iglesia.” Kita n’yo, nagapaninguha ka lang nga sul-oban og mga balhibo sa peacock ang imong buitireng lawas. Husto kana. Kita n’yo? Kita n’yo? Kinahanglan kang matawo pag-usab! Kinahanglan mong dawaton si Cristo. Ug sa dihang dawaton mo si Cristo, dili mo madawat si Cristo nga dili mo ginadawat ang Iyang Pulong, tungod kay Siya ang Pulong. Ug sa diha nga aduna ka’y dagway sa pagkadiosnon, ug ginapanghimakak Kana, kung ingon-ana mahibulong ako. Kita n’yo? Ug makapahisakup ka sa gihapon sa tanang organisasyon nga gusto mo ug nga magkaadunay dagway sa pagkadiosnon, ug wala ka sa gihapon Niini.

²²⁸ Karon, tan-awa, mga higala. Kana ang tibuok butang. Panalanginan kamo sa Dios. Hinaut tabangan kamo sa Dios. Wala ko ginasulti kini aron nga mamahimong lahi. Ginapaklaro ko lang ang akong kaugalingon. Ingon nga adlaw kini sa armistice, wala ako nagapakig-pirma og usa ka kasabutan sa pakigdait uban kaninyo nga mga ministro, wala gayud, siguro

angay kamong makigpirma kanako; dili kanako, kondili sa Dios, sa Pulong. Husto kana. Husto kana. Isulti lang kung unsa ang ginaingon sa Biblia, isulti Kini sa paagi lang nga ginasulti Kini Niini. Tungod kay nag-ingon ang Biblia, “Ang si kinsa man nga motaktak o modugang ngadto Niini.” Ug nakita n’yo, dili subay sa kasulatan ang organisasyon, ug sa diha nga gidawat n’yo ang unang dogma maayo pa nga dire-diretso na lang kamo mobalik mismo, tungod kay gilabang n’yo na mismo dinha ang linya. Kung mobalik kamo ngadto sa bag-ong pagkahimugso, magalakaw kamo diha sa Kasulatan kung ingon-ana.

²²⁹ Ug moadto ka sa usa ka denominasyon, moingon sila, “Kahibalo ako, nga wala kami nagatoo sa mga *Niini*. Ang mga obispo sa among simbahan nagatudlo nga usa kami sa mga pinaka-karaang mga iglesia. Wala kami nagatudlo og. . .” Dili mahinungdanon kanako kung unsa man ang wala nila ginatudlo. Kung ginatudlo kini sa Biblia, ang Balaang Espiritu nga anaa kanimo magakaon Kini diha sa Pulong. Bisan kon unsa pa ka maantigo ang usa ka tawo ug kung ginaunsa man niya pagpaningkamot sa pagsaysay Kini nga pahalayo, mahimo nilang isaysay kini pahalayo. Mahimong gamiton sa usa nga wala nagatoo sa Dios ang Biblia ug pahalayo nga isaysay ang Dios kaninyo.

²³⁰ Busa, walay tawong aduna’y katungod sa pagwali sa Maayong Balita gawas kon siya, sama kang Moises, atua didto niadtong balaang kabalasan kon diin natagbo niya ang Dios nga siya lang, nga gawas nga natawo pag-usab ang usa ka tawo ug nga atagbo ang Dios didto nawong sa nawong, ug nga nahibalo. Walay ateista, walay sikolohiya, walay mga pagsaysay, walay maalamon sa kalibutan ang makapahalayo Niana kanimo. Atua ka didto sa dihang nahitabo kini! Oo, sir. Nasayod gyud ka kung unsay nahitabo.

²³¹ Dayon moingon ka, “Nagkaaduna na ko’y ingon niana nga matang sa kasinatian, ug nagkaaduna ko’y espiritu nganhi kanako.” Ug kung ginapanghimakak niini ang Pulong sa unsa mang paagi, aduna ka’y sayup nga espiritu. Moingon ka, “Ako—dili ko madawat ang mga butang nga sama Niini. Nahibalo ko, apan ang among iglesia. . .” Uh-huh, kana ang sayup nga espiritu. Kana ang marka sa imong pagkaila. Cain, namarkahan ka na. Oo, sir.

²³² Gamay lang nga Pulong ang giduhaduhaan ni Eva; dili nga ang tanan nga gisulti sa Dios, usa lang ka gamay nga Pulong, ug nahimo kining hinungdan sa matag kagul-anan ug kasubo, ug kamatayon, ug kasal-anan, ug mga gubat, ug tanan nang uban pa, matag lubnganan, matag ambulansya nga miwangwang, matag ospital nga natukod alang sa mga masakiton. Ang gamay niyang pagduhaduha sa gamay nga Pulong sa Dios, ang nahimong hinungdan sa tanan niini. Ug gipalayas siya, sa diha nga wala gayud unta kini nahitabo. Unsaon mo

man pagsulod, nga ginaduhaduhaan ang usa ka Pulong Niini? Moingon, “Nahibalo ako nga *Ingon Niana* ang ginaingon Niini, apan Kini . . .” Ingon Niana gayud ang pasabot Niini!

²³³ Karon tan-awa. Kinahanglan nga hukman sa Dios ang kalibutan pinaagi sa usa ka butang. Dili mahimo nga aduna ka’y paghukom gawas kung aduna ka usá og usa ka kasugoan. Gikinahanglan nga aduna gyu’y usa ka butang, kinahanglan nga aduna gyud ka’y gilapas aron nga mamahukman. Kita n’yo? Ug dayon dili mahimo nga magkaadunay paghukom, nga husto, nga walay silot. Karon, kita n’yo, dili mahimo nga magkaaduna ka’y balaod sa gamay’ng lungsod nga nagaingon “lima ka dolyar ang multa sa magpadagan nga nakapula ang suga,” ug moingon ang sunod nga balaod “dili, libre siyang makapadayon.” Kita n’yo, dili mo mahimo kana. Busa dili mahimo nga adunay duha ka balaod nga dungan sa usa ka higayon. Ug adunay usa ka balaod, usa ka Dios, usa ka Libro, usa ka Cristo. Kana lang. Usa ka Pagtoo, usa ka paglaum. Kana lang. Kana mao ang Biblia, si Cristo.

²³⁴ Himatikdi karon, diha niini, kung aduna ma’y ginadugang ngadto Niini, ang tawo gayud ang nagdugang niini. Dili mahimo nga uban pa gawas sa . . .

²³⁵ Ug kung pagahukman sa Dios ang kalibutan pinaagi sa usa ka iglesia, sama sa ginaingon sa Katoliko, kung ingon-ana sa unsa nga Katolikong iglesia pagahukman Niya kini? Aduna ma’y ubay-ubay kanila; adunay usa, nga Romano; ang usa, Griyego; ug, oh, adunay tanan na nga nagkalainlain nga klase. Hain man nga Katolikong iglesia pagahukman Niya kini? O, tingali pagahukman Niya kini pinaagi sa Lutheran? Bueno, kung ingon-ana, ug tingali pagahukman Niya kini pinaagi sa Presbyterian? Kita n’yo? Unsa na ma’y Iyang buhaton? Dili Niya kini pagahukman pinaagi og usa ka iglesia. Pagahukman Niya kini pinaagi sa Iyang Pulong. Bueno, kung ingon-ana, wala gayud Niya . . .

²³⁶ Kita n’yo, dili Siya mahimong mokuopot og usa ka pundok sa mga tawo, sama sa panan-awon sa usa ka igsoong babaye sa miaging gabii, gibubo ang Balaang Espiritu, milahus Kini niana nga kahon. Sigurado, walay unsa man nga makakupot Niini. Pang-indibidwal Kini. Gikahatag Kini aron hinloan ang iglesia, apan dili mahimong kuptan niini Kini. Walay organisasyon ang makakupot Niini. Kana lang. Dili gyud mahimo niini kini. Aduna na mo og tanan na dinha, ug dili n’yo mahimong buhaton kini. Dili mahimong buhaton kini sa organisasyon. Apan ang indibidwal ang adunay Balaang Espiritu. Karon himatikdi.

²³⁷ Dayon kung pagahukman sa Dios ang kalibutan pinaagi sa Iyang Pulong, kung ingon-ana sigurado gayud nga gibantayan Niya Kini ug gitipigan ang kahimtang Niini. O, kung Kini gikaduhaduhaan na gayud, unsaon man Niya pagpahigayon og

paghukom? Kita n'yo? Kinahanglan mamahimong usa gyud ka butang. Ug wala gayud Siya miingon, "Ang si kinsa man, pinaagi sa iglesia." Ang ingon Niya, "Ang si kinsa man nga magataktak og usa ka Pulong gikan Niini, o dugangan Kini og usa ka Pulong, siya usab ang pagatangtangan (iyang bahin) sa Libro sa Kinabuhi." Busa, alang kanako, Dios kini, ang Iyang Pulong ug ang paghukom. Karon, kung pagahukman ako ug dawaton ang Pulong, ug makita nga namatay si Cristo para kanako, kung ingon-ana magapangamuyo ako alang sa Iyang Kinabuhi nga mosulod ug mogiya kanako. Ug kung ang Iyang Kinabuhi mao ang Pulong, ug Siya ang nagsulat sa Pulong, unsaon man pagkaania sa Iyang Kinabuhi kanako, ug nga ako nagaangkon nga adunay Balaang Espiritu, ug nagadugang og dogma imbis nga Pulong? Dili gyud kini magpulos. Unsaon ko man pagdugang og denominasyon sa dihang batok Siya niini, ug nga napamatud-an kini, ug naipakita kini sa kasaysayan, nga sa matag higayon nga nagdenominasyon sila nangamatay sila, sa espirituhanon? Oh, milambo sila sa mga miyembro, sigurado. Tinuod kana. Nagadaghan ang ilang mga miyembro. Apan, sa espirituhanon, wala gyud sila'y gikapaingnan. Ipakita kanako, sultihi ko diha sa kasaysayan kon diin sukad ang usa ka iglesia . . . Human nga naorganisa kini, namatay kini dihadiha mismo, gibiyaan kini sa Balaang Espiritu. Wala na'y mga milagro pa ug mga ilhanan, ug napaingon na siya diretso ngadto sa kagubot.

²³⁸ Eksaktong ingon niana ang nahitabo sa atong mga kaiglesiahang Pentecostal. Gipamuhat nila sa eksakto kung unsa ang gibuhat sa ilang inahan. Sa sugod, ninggawas sila, usa ka katawan nga gisalikway ang mga denominasyon. Karon, ang uban kaninyong mga kaigsoonan nga nagapaminaw niining teyp, uban kaninyong mga edaran na nga mga kalalaken-an, nasayod nga sa mga katuigan nang milabay, kuwarenta, singkwenta ka tuig na ang milabay, kung makig-estorya sila kaninyo niadto og bahin sa organisasyon, sultihan n'yo sila niadto nga masipad-anon kana. Apan karon miyembro na mo sa butang nga gihunahuna n'yo niadto nga masipad-anon. Kamong mga kababayan nga ginaputol ang inyong mga buhok ug ginapintalan ang inyong nawong, batok niana ang inyong inahan kaniadto, kadtong maayo—maayo'g tigulang na nga balaang Pentecostal. Unsa ma'y nangahitabo kaninyo? Ingon ni Pablo, "Midalagan kamo og maayo, unsa ba'y nakapababag kaninyo?" Kita n'yo? Gawasnon kamo nianang mga butanga kaniadto, apan gusto n'yong mahisama na sa tanang uban pa kanila.

²³⁹ Eksakto gayud sa giingon kaniadto ni Samuel. Ang Israel aduna niadto og usa ka Hari, ug ang Dios kadto. Ug nanag-ingon sila, "Samuel, nagakatigulang ka na. Hatagi kami og usa ka hari, gusto namong mahisama sa tanan nang uban pa sa kalibutan. Gusto namong mahisama sa ubang mga nasud. Gusto namo og

usa ka hari nga modala kanamo sa pagpakig-away, gusto namo og usa ka hari nga mahimong pakig-awayan ang among mga gubat.” Ug wala kini nakapahimuot kang Samuel.

²⁴⁰ Miingon siya, “Aduna ba ako og bisan unsa man nga gikuha sukad gikan kaninyo? Nagkuha ba ako sukad og kuwarta gikan kaninyo? Mihangyo ba ako kaninyo sukad og usa ka baka o unsa man? Aduna ba ko’y sukad gihangyo og bisan unsa man gikan kaninyo?”

Nanag-ingon sila, “Wala. Wala gyud ka’y gihangyo og bisan unsa gikan kanamo.”

²⁴¹ O nagaingon, “Aduna ba ko’y sukad og bisan unsa man nga gipangsulti kaninyo sa Ngalan sa Ginoo nga wala nangatuman?” Husto ba kana? Miingon siya, “Kung ingon niana ayaw pagdawat nianang hari, tungod kay mangahulogan kini og kagubot nganha kaninyo.

²⁴² Karon gusto kong pangutan-on kamo og usa ka butang, ang Branham Tabernacle. Papalambo na kamo ngadto sa usa ka daku nga tabernakulo karon. Mahimong mapahalayo ako sulod sa hamubong panahon. Mahimong makaadto ako kung asa man. Malisud ingnon kung asa ako pagatawagong sa Ginoo; mahimong kuhaon na ako sa esena, mahimong pabalikong usab ngadto sa misyon, mahimo tingali nga tawagong Niya ako ngadto sa kamingawan. Dili gyud ako mahibalo kung asa Niya ako pagatawagong hangtud nga moabot na si Jesus. Gusto kong pangutan-on kamo og usa ka butang. Mihangyo ba gayud ako sukad kaninyo og bisan unsa man? [Nagaingon ang kongregasyon, “Wala.”—Ed.] Nagpakilimos ba gayud ako kaninyo og kuwarta? [“Wala.”] Aduna ba ako’y gisulti kaninyo sukad, sa mga linibo na nga mga butang nga ako napangsulti kaninyo diha sa Ngalan sa Ginoo, apan, wala ba kini nangahitabo? [“Amen.”] Kung ingon-ana ayaw gayud pagpamiyembro sa usa ka organisasyon. Batok kini sa Pulong sa Dios. Panggawas kamo niini kung anaa pa kamo sulod niini, ug magpalain kamo ug dawata ang Pulong sa Ginoo.

Iduko nato ang atong mga ulo.

²⁴³ Gamhanang Dios sa mga propeta, ang Dios ni Abraham, ni Isaac, ug ni Israel, dugangi og kusog, Ginoo, kining putol-putol nga Mensahe nga ania na sa akong kasingkasing sa dugay nang panahon, nga maihatud sa akong mga kaisgoonan. Daghan kanila nga atua didto, Ginoo, ang adunay sayup nga pagkaila kanako. Nagadahum sila nga gusto ko lang magmalahi. Ang hunahuna nila nga nagapaninguha ako nga mamahimong usa ka nahibalo-sa-tanan-niini. Giingnan nila ang mga tawo nga ginalimbongan ko kuno ang mga tawo, ilabina na sa ingon nianang mga hilisgutanan sama sa *bautismo sa tubig* nga diha sa Ngalan ni Ginoong Jesus, ug diha sa *binhi sa serpente*, ang *dakung bigaon*, ug daghan pa niadtong mga teyp nga nanggawas

nga walay lain kondili ang walay-sagol lang nga Kamatuoran. Ug gipanghangyo ko sila, “Pagduol ang pipila kaninyo ug ipakita kanako kung asa ako nakasala, o wala mitoo o gipasayup man ang pagsaysay sa Pulong.” Ug wala’y ni usa ang nagpakita. Nagapangamuyo ako Kanimo, Amahan, nga ipahibalo sa niining mga kalalaken-an nga wala nila makita kining maong panahon. Managpaabot sila nga ulahi na kaayo, kung dili sila magbantay. Hinaut nga sila, ang matag usa . . .

²⁴⁴ Ginoo, sigurado ako niini, mohugno ang akong kasingkasing kung kining Kasulatan dili tinuod kanako, sa dihang nag-ingon Ka, “Ang tanan nga gihatag Kanako sa Amahan, magaduol. Nagapatalinghug ang Akong carnero sa Akong Tingog.” Kung ingon-ana, Ginoo, alang kanako ang Ginharian tinuod nga sama gayud sa Imo nang giingon, nasayod ako nga mao gyud kini, sama kini ngadto sa usa ka tawo nga mikuha og usa ka pukot ug miadto sa lanaw, gitaktak ang maong pukot ug nakapamira og nagkalainlaing matang. Nagkaaduna og, sa walay pagduhaduha, og isdang scavenger, nagkaaduna og mga bao, mga damang sa tubig, mga bitin, tanan na nga nangasikup sa pukot sa Maayong Balita. Apan sa kaulahian, pagkataudtaud, mibalik sa tubig ang lambay, milingkawas ang bao, mialingisngis ang bitin ug mibalik sa yanang, sama sa usa ka iro ngadto sa suka niini o sa usa ka baboy ngadto sa lunangan niini. Apan adunay tinuod nga isda didto, Ginoo. Ug aduna ako niining kahupayan, sa pagkasayod, nga bisan wala pa sila nasikup sa pukot, mga isda na sila kaniadto pa. Natawo silang, gikatakda nang daan nga isda. Ug mao usab ang pukot sa Maayong Balita nga nagapanikup didto sa mga rebaybal. Naila Mo ang mga Mismong Imoha. Ang bugtong butang nga katungdanan ko, Amahan, kutob sa nahibaloan ko, mao ang magpabilin nga matinuuron ngadto niining Pulong. Ikaw Ang Maong nagabuot kung hain man kanila. Ug nasayod ako nga pareho lang sa bao nga dili mahimong usa ka trout nga isda, mao usab ang usa ka lalaki o usa ka tawo, nga adunay bungol nga mga dalunggan ngadto sa Maayong Balita, dili gayud makasabot sa Kamatuoran. Tungod kay nakita na kini daan sa Amahan, ug gikasaad Mo nga ang tanan nga Iyang gihatag Kanimo magaduol.

²⁴⁵ Langitnong Amahan, nagapangamuyo ako Kanimo nga ang matag tawong nakadungog niining gamay’ng Mensahe, nga ang Kahayag nga naiwali na, ug ang mga kahulogan nga ania sa akong kasingkasing para sa akong isigkatawo, mga tawo nga alang kanila namatay Ka. Ug mga kalalaken-an, nga ang uban kanila dinha, Ginoo, sama sa mga atua sa pundok ni Korah, matinuurong mga tawo, nga nagiyahan sa sayup, nga dala-dala pa ang incienso diha sa ilang kamot, apan nangalaglag. Aba, dili gani nila tugotang mahiapil sa mga niini ang maong mga incensario sa kalayo; gikinahanglan nga pangkuhaon kini, sa

anak nga lalaki ni Aaron, nga si Eleazar. Ug nanaghimo sila og mga timailhan para sa altar gikan niadtong mga incensario, nga usa ka taming, sa pagpakita, ug nga mamahimong usa ka handumanan niadtong makakalilisang nga butang, nga nagsulay niadto si Korah nga motukod og usa ka organisadong pundok batok sa mensahero sa Dios. Malayo unta kini kanamo, Ginoo. Hinaut nga kanunay kaming pagapanalipdan sa Balaang Espiritu.

²⁴⁶ Nagapasalamat kami Kanimo, Ginoo, nga ang among gamay'ng iglesia, niining gamay'ng balaang dapit. Daghang mga tuig na ang milabay, sa mga traynta na ka tuig, miluhod ako dinhi sa maong lim-aw nga puno niadto og mga sagbot ug tubig, ug among gididikar kini nga dapit nganha Kanimo, kining gamay'ng gambalay. Ug sulod dinha nianang kanto sa tabernakulo napahimutang kana nga panan-awon. Nga eksaktong natuman gayud. Anaa dinha sa gihapon. Dili nila kini pagagubaon, Ginoo, ila gayud kining. . . nagkadaan na kini, ug ila kining iga-preserba pinaagi sa pagpatong og usa pa ibabaw niini. Dios, itugot nga kining bulawanong Maayong Balita nga nahisulat sa mga pinanid dinhi, hinaut nga dili gayud biyaan Niini kining maong gamay nga iglesia hangtud sa pag-abot na ni Cristo. Hinaut nga ang matag kabahin, matag kabahin sa Lawas ni Cristo, nagapanganhi sila nga gikan pa sa nagkalainlaing bahin sa nasud ug sa tibuok kalibutan, hinaut nga madawat sa matag usa kanila ang Kahayag, ang Maayong Balita, ug managlakaw dayon Dinhi ug nga dawaton si Cristo.

²⁴⁷ Ug hinaut nga mamahimong tinuod gayud kini nga matuman ang Iyang Pulong, “Ang mga buhat nga Akong ginabuhat, ila usab pagabuhaton. Ang nagapatalinghug sa Akong mga Pulong, ug nagatoo Kaniya nga nagpadala Kanako, adunay Kinabuhi nga Walay Katapusan.” Ug sa diha nga misulod na ang Kinabuhi nga Walay Katapusan, natawo na sila gikan sa Itaas, ug ang mga buhat nga gikan sa Dios nagapadayag na mismo, tungod kay kini ang mao rang Kinabuhi nga atua Kaniya kaniadto. Dili Kini makapamuhat og laing uban pa.

²⁴⁸ Busa, Amahan, dili gayud ipahanugot nga isalig sa niining iglesia ang ilang Walay Katapusang padulngan diha sa usa ka sensasyon, diha sa usa ka organisasyon, diha sa kung unsa man nga gawas kang Cristo Mismo nga nagakinabuhi diha kanila, nga nagapahimatuud sa Iyang Pulong pinaagi kanila ug sa Iyang saad. Hinaut, nga gikan sa pinaka-gamay'ng bata dinhi karong gabhiona, hangtud ngadto sa pinakatigulang nga tawo, madawat kini nga kasinatian. Ug hinaut nga ang matag lalaki og babaye, batan-ong lalaki o batan-ong babaye man, nga nagapaminaw niining teyp, hinaut nga mao usab kini kanila, Ginoo, ug ihatag kanila ang pagsabot nga nagapaninguha lang ako nga magpasidaan ug magpanawag, tungod kay ulahi na kining taknaa kay sa among pagdahum.

249 Ug makita namo ang Babilonia, ang inahang bigaon, ug ang tanan niyang anak nga mga babayeng bigaon nga ginahiusa na ang ilang mga kaugalingon. Dios, nasayran namo nga nagaingon ang Kasulatan nga ang mga bunglayon gikan sa talamnanan sa trigo pagabugkoson una, nga pinungpong. Ug nabugkos na sila sa pinungpong, ginatawag ang ilang kaugalingon sa masipad-anong mga ngalan nga dili gayud nakapahinungod ngadto kanila, dili kini nagapahinungod ngadto sa Iglesia, usab; mga kapunongan kini, dili nga mga iglesia. Adunay usa lang kanila, Amahan, ug kana ang maong usa nga alang niining maong usa namatay Ka.

250 Ug nagaampo ako, Amahan, samtang nga makita namo silang nahibugkos na karon alang sa usa nga nagakaduol na nga kalayong atomika, nagaampo ako, Ginoo, nga tugotan Mong mahipuno na ang trigo ug nga magbug-at pa. Itugot kini, Ginoo. Hinaut nga mangtubo kami ug mangdan-ag og Kahayag, ug nga mahisama kang Jesus, “Kung wala Ko ginabuhat ang mga butang nga gisugo Kanako sa Dios nga pagabuhaton, kung ingon-ana wala Ako’y Kinabuhi nganhi Kanako. Apan kung nagapamulong ang Dios ug ginapakita ang Iyahang Kinabuhi, kung ingon-ana nagapamulong Kana sa Iyaha Mismo.” Itugot kini, Ginoo. Akong ginatugyan kini nga Mensahe nganha Kanimo, ug nga Imo Kining pagabantayan, ug maghatud sa tig-napulo ka linibo, Ginoo, o, sa tanan Mong mga gikatakda nang daan nga mga kaanakan ngadto sa Maayong Balita. Diha kang Jesus Cristo, Nga mao ang Pulong, sa Iyang Ngalan nagaampo ako. Amen.

I love Him, I love Him
 Because He first loved me
 And purchased my salvation
 On Calvary’s tree.

251 Mangutana ako sa maong pangutana. Pila ba karong gabhiona sa niining makita nga mga tigpaminaw dinhi, sa niining matahum og daku nga simbahan sa mga tawo, o nga balay sa mga tawo, diay, sa niining balay-simbahanan, nga nagatoo sa tibuok ninyong kasingkasing, nga ang inyong kinabuhi nagatandi sa sukaranan (ikaw) sa Dios ug sa Biblia, ug nagatoo kamo nga, pinaagi sa pagsusi diha sa kaugalingon ninyong kinabuhi, ug kung unsa ang pagpanglihok sa Espiritu diha kaninyo, nga ginatoohan ba niini ang matag Pulong sa ingon nga pagkasulat Niini, ug nga ginatuman ba Kini? Nga nagatoo ba kamo Niini? Pagapanalanginan kamo sa Dios. Hinaut nga padayon Niya gayud igapabilin ang Iyang Espiritu diha kaninyo.

252 Ug sa akong higala diha sa teyp, hinaut nga makita mo unta kining mga tigpaminaw dinhi karong gabhiona, siguro dili moubos sa nobenta porsiyento sa mga tawo ang nagpataas sa ilang mga kamot, nga ilang ginatoohan ug ginatan-aw ang

Biblia, (dili nga kung unsa ang ginasulti sa iglesia) kung unsa ang ginasulti sa Biblia, (dili nga kung unsa ang ginasulti sa kapunongan) kung unsa ang ginasulti sa Biblia, ug nga nakita nila nga naka-replektar Niini ang Kinabuhi ni Cristo.

²⁵³ Kahibalo mo, sa kaniadtong mga adlaw nga wala pa sila niadto og mga tunawanan, ang—ang mga mananalsal-og-bulawan sa una ginadukdok pa kaniadto ang bulawan pinaagi og usa ka maso. Siguro nakadungog na mo bahin niini. Sa una nga wala pa kini ginadala sa tunawanan, ila kini ginadukdok. Ug ang bulawan ang maong pinakabug-at nga ginamina, mas mabug-at pa kini kay sa tingga. Ug mao nga medyo nakapamulawan pud ako kaniadto, ug mahimo kang mokuha og mga balas diha sa mga hinugasan na didto sa disyerto, ug ibagnos ang maong mga balas diha sa imong kamot, ug dayon (whoosh) huypan nga sama niana, ug mangapalid ang maong mga balas ug tanan na, ang mga bato, apan pagkabug-at gayud ang bulawan nga nagapabilin kini dinha. Ug dayon kung pudyoton mo kana nga bulawan, nataputan kini'g ayo og mga yuta hangtud nga nagkadaghan kini nga nagkadaghan. Ug nga paglabay sa mga panahon sa pagbuto sa mga bolkan sa diha nga nagakadaghan kini, naputos kini og mga lapok ug tanan na, mga iron pyrite ug uban pang mga materyales ang nagakasagol niini. Kuhaon sa magdudukdok kining bugol sa bulawan ug dukdukon kini ug balihon kini, ug dukdokon ug balihon na usab kini, hangtud nga nadukdok na niya ang tanan nga nakatapat niini pahimulag niini. Ug kahibalo ba mo kung giunsa niya pagkahibalo nga napahimulag na niya ang tanang hugaw gikan niini? Makita na niya ang kaugalingon niyang itsura nga naka-replektar na diha niini.

²⁵⁴ Ug ingon niana ang ginabuhat sa Dios sa Iglesia. Iyang ginadukdok ang matag kredo, matag denominasyon, matag dogma nga hinimo sa tawo, hangtud nga makita Niyang naka-replektar na ang Kaugalingon Niyang Kinabuhi diha kaninyo. “Kung wala Ko ginabuhat ang mga buhat sa Akong Amahan, ayaw Ako tohi.” Kita n’yo? Kung unsa man ang gikatuyo para sa Iglesia, kung ang Kinabuhi nga anaa kang Cristo wala naga-replektar diha kaninyo, ayaw gayud pagpahimutang kung wala ka’y pagpailub, maligdong nga batasan, tanan niining mga butanga, ug ang pagpugong sa kaugalingon, ug—ug ingon-anang mga butang, ug pagkadiosnon, ug pagbati nga inigsoon, ug tanan niining mga butanga nga ginakinahanglan diha kaninyo. Bisan kung unsa pa ang nabuhat mo na, bisan giunsa mo pa pagsinggit, kung unsa pa kadaghang mga iglesia ang imong napamiyembrohan, unsa pa kadaghang mga balhibo ang gituslok mo sa imong kaugalingon, dili gyud mao kini. Hulata hangtud nga sa pagkamatinuuron, diha sa imong kasingkasing, mahimo mo ang pagpasaylo, hangtud nga diha sa imong kasingkasing aduna ka’y pagbati nga inigsoon. Bisan pa kon

ibtan ka nila og usa ka kumkum nga mga bungot sa usa ka aping, mahimo mong iatubang ang usa pa ka aping nga may pagkamapainubsanon, kita n'yo, hangtud na nga ang maong mga maayong kinaiyahan, bisan kon unsa pa ang ilang ginaingon kanimo.

²⁵⁵ Sa gitabonan nila og trapo ang tibuok Niyang nawong ug gihapak Siya sa ulo, miingon, “Karon, nagaingon sila kanako nga usa Ka kuno ka Propeta.” Karon gihablol ang trapo gikan sa Iyang nawong, ug ang usa kanila nga naggunit sa bunal, miingon, “Kinsa man kanamo ang mihapak Kanimo? Pagpanagna ug sultihi kami, aron nga, sa ingon-ana motoo na kami nga usa Ikaw ka Propeta.” Wala gayud Niya gibuka ang Iyang baba.

²⁵⁶ Pagmay-madungog kamong usa ka nagatungha nga propeta, nga adunay tanang tubag sa matag gimik nga mahimo ninyong mapagawas, hinumdumi, dili siya usa ka propeta. Sa karong panahon nahibalo na gyud sila sa tanang butang, kung kanus-a ba mosakit ang imong ngipon ug kung kanus-a ba mosakit ang imong tiyan, ug tanan nang uban pa, ug sultihan ka sa tanan bahin niini. Dili ingon niana ang kinaiya sa atong Dios. Tan-awa ang mga propeta, tan-awa si Jesus.

²⁵⁷ Tan-awa si Pablo, sa diha nga mahimo man niyang butahan ang usa ka tawo, ug gitugotan niyang pahawaon siya sa usa ka mananalsal-og-tumbaga pagawas sa usa ka lugar, “Siguro nawad-an na siya og gahum sa pagpangbuta.”

²⁵⁸ Si Jesus, Nga mahimong banhawon ang patay, ug sa gihapon giingon nga gilud-an siya diha sa nawong sa usa ka sundalong hubog, ug gitaluthoan ug gilud-an ug gibira ang mga bungot sa Iyang nawong, ug gihapak Siya sa ulo, nga nakatabon ang trapo Kaniya, nanag-ingon, “Pagpanagna ug sultihi kami kung kinsa ang mihapak Kanimo.” Ug wala Niya gibuka ang Iyang baba.

²⁵⁹ Ayaw pagtan-aw niining mga magbubuhay sa mga gimik. Apan hinumdumi, nagapanug-an lang sila, nagatug-an lang ang usa ka mini nga dolyar nga adunay usa gyud ka tinuod nga dolyar kon asa man. Sa dihang makita mo kining mga butang nga organisasyon nga nagasige daku ug nagauswag, sama sa gikaingon na “pauswagon ang paglimbong diha sa iyang kamot,” timan-i lang, adunay usa ka gamay'ng Iglesia sa Dios kon asa man, nga puno gayud sa Espiritu Santo, lunsay, nga nagapasaka na sa hagdanan. Ayaw tan-awa ang maong dagkung organisasyon.

²⁶⁰ Unsa ma'y mas gamhanan pang iglesia ang gikahisgotan sa Biblia kay sa ang sa kapanahonan sa iglesiang Efeso? Ug sa nalatas na ni Pablo niadto ang kayutaan ibabaw sa Efeso, ug nakaabot sa niining iglesia, adunay dose ka tawo niini. Husto kana. Ug maayo sila nga mga tawo tanan, nanaghugyaw ug nagakalipay, apan wala pa nakadawat sa Espiritu Santo. Ingon

ni Pablo, “Wala n’yo pa nadawat ang Balaang Espiritu sukad nga mitoo kamo?”

Nanag-ingon sila, “Aba, wala man mi kahibalo nga aduna diay Espiritu Santo.”

²⁶¹ Ingon niya, “Kung ingon-ana giunsa kamo pagbautismo?” Kung wala kini kalainan, unsa man diay ang gisulti niya sa kadtong iglesia didto?

²⁶² Nanag-ingon sila, “Gibautismohan na kami sa usa sa pinakahalangdong tawo nga sukad miabot sa yuta, si Juan nga Bautista, nga mao ang nagbautismo sa atong Ginoo. Dili pa ba igo kana nga pagbautismo?”

²⁶³ Ingon niya, “Dili, sir. Gikinahanglan nga mabautismohan kamo pag-usab, tungod kay selyado ang Gingharian ngadto sa unsa pa man nga lahing pamaagi.” Ug sa pagkadungog nila niini. . . Ang ingon pa, “Si Juan nagbautismo sa bautismo sa paghinulsol, dili alang sa kapasayloan sa mga sala, nga nagaagda nga kinahanglan kamong managpanoo Kaniya nga magaabot, sa ato pa, kang Jesus.” Ug sa pagkadungog nila niini, nanagpabautismo sila pag-usab diha na sa Ngalan ni Jesus Cristo. Husto kana. Eksakto. Gituman nila ang Kasulatan.

²⁶⁴ Kahibalo mo, diha sa pagdidikar kaganinang buntag, gisunod ni Moises ang sulundan nga nakita niya sa Langit, ug nagtukod og usa ka balongbalong sa pagrepresentar niini. Sa dihang gitukod ni Solomon ang templo, iyang (unsay iyang gibuhat?) gisunod ang maong sulundan nga gibuhat ni Moises, sa maong balongbalong, nga padayon ginapatakdo ang Kasulatan.

²⁶⁵ Ug sa dihang miabot ang Dios ngadto sa Iyang Templo alang sa kaulahiang mga adlaw, kini nga Templo, ang Espiritu Santo, “Usa ka lawas Kana nga Imong gitagana,” mikanaug ang Espiritu Santo sa Adlaw sa Pentecostes, ang mensahe niadto, “Maghinulsol, ang tagsatagsa kaninyo, ug managpabautismo sa Ngalan ni Jesus Cristo alang sa pagpasaylo sa mga sala, ug madawat ninyo ang gasa nga Espiritu Santo. Kay ang saad alang kaninyo ug sa inyong mga anak, ug sa tanan nga atua sa halayo, bisan sa matag-usa nga pagatawgon sa Ginoo nga atong Dios.” Kung gusto ninyong tawgon nga doktor ang inyong ministro, gisulat ni Doktor Simon Pedro ang reseta, ang usa ka resetang Walay Katapusan. Mao kana kung unsa ang nagaayo sa mga masakiton.

²⁶⁶ Pasagdan mo nang maninguha kining mga mini nga mga mananambal, pinaagi og denominasyon, nga sulatan kini og ubang pamaagi, mao kana ang hinungdan nga sila. . . Kahibalo mo. . . kung wala ninyo ginadugang ang. . . ginapasobrahan n’yo ang reseta, mahimo n’yong. . . sa sobra nga hilo, mahimo n’yong mapatay ang pasyente. Kung dili n’yo usab kini butangan og igo, inyong. . . nga walay pang-kontra, kung dili n’yo buhaton, dili

kini makahatag og maayo sa inyong pasyente. Nahibalo na ang inyong mananambal kung unsa lang gayud ang ireseta.

²⁶⁷ Ug si Cristo, ang Espiritu Santo, mao ang Magsusulat og Reseta, ug Siya ang nagsulat Niini. Ayaw gayud pagdugang Niini o pagtaktak man gikan Niini, dawata lang ang maong Tambal sa kung unsa gayud kini. Kini ang Tambal sa tanang balatian. Panalanginan kamo sa Dios. Nahigugma ba kamo Kaniya? Amen.

I love Him, I...[Blangko nga bahin sa teyp—Ed.]
 Because He first loved me
 And purchased my salvation
 On Calvary's tree.

²⁶⁸ Karon samtang nga atong laylayon kini, lingia ninyo karon ug pagpakiglamano sa inyong katapad dinha. Oh, usa siya ka magpapanaw usab, nga nagalabay lang.

I love Him, I love Him
 Because He first loved me
 And pur-...-vation.

[Adunay kaestorya si Igsoong Branham—Ed.] Salamat kanimo, igsoon.

I love Him, I love Him
 Because He first loved me
 And purchased my salvation
 On Calvary's tree.

I love Him, (kantahon nato kini karon), I love Him
 Because He first loved me
 And purchased my salvation
 On Calvary's tree.

²⁶⁹ Iduko nato ang atong mga ulo karon, ipiyong ang atong mga mata, itaas ang atong mga kamot ug ang mga tingog ngadto sa Dios karon, samtang nga itugyan ko kamo sa inyong pastor. Malipayon kami nga mahiuban kamo dinhi. Dili kita denominasyon. Wala kita'y balaod kondili gugma, walay kredo kondili si Cristo, walay libro kondili ang Biblia. Wala mga pagpamiyembro; ang pagpakigkauban lang sa usa'g usa pinaagi sa Dugo ni Jesus Cristo nga nagalimpyo kanato gikan sa tanang kawalay-pagtoo.

²⁷⁰ Sige, dungan ang tanan karon. "I...I..." Panalanginan kamo sa Dios. Pagbalik mo ug bisitahi kami pag-usab.

'Cause He first loved...

Sige, pastor, igsoon. Ang Ginoo...Panalanginan kamo sa Dios. "And..."



NGANO MAN NGA BATOK AKO SA
GIORGANISA NGA RELIHIYON CEB62-1111E
(Why I'm Against Organized Religion)

Kining Mensahe ni Igsoong William Marrion Branham, una giwali sa Ingles niadtong Domingo sa gabii, Nobyembre 11, 1962, sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2014 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org